


CITAMPI CIINAYI

 Mwoyi wènu awu dilòlò edi. Tudi twinyika mitù yètù mpindyewu ànu bwà katanci kakesè cyanaàna, bwà disambila.

² Taatù wetù wa mu Dyulu nè wa Musànggeelu, nyèwù tusemena cyàkàbìdì Kùdì dilòlò edi, mpindyewu, mu Dìna dyà Mukalenge Yesù, bwà kuKusàkidila bwà ditùkù dikwàbò. Nènku tudi tulòmba mpindyewu mabènesha Èbè bwà masangisha à dilòlò edi. Nyumà Mwímpè àlwekù bwà àtùpèeshe dyumvwija dyà maalu atùdi takeba nè mbàbì ne mwètù mwònsò aa. Èyi Nzambi wa yààya, swàkù bwà biikalè byà mushinga mukolè mu mùshindù wà twètù bwònsò bafwànyine kubwela mu bwobùmwe banyungùlùkile Dìyi mu mùshindù wà, nè, patùumukà, twìkala bakùmbànyine mwà kwamba nè: “Myoyi yètù kayivwakù yilakuka kapyà munda mwètù pàvwàYe wàkula neetù mu njila apu anyi?” Tudi tuKusàkidila bwà cidìYe kutùdi, nè batwishùbwe nè Yèyè neàshaalè neetù patùdi twenda tuya mu njila apa, bwalu tudi tulòmba nùnkù mu Dìna dyà Yesù. Amen.

³ Ndi nè disànkà dyàbùngì bwà kwikala mwalùkile mu nzùbu wa Mukalenge, dilòlò edi, mu mudimu cyàkàbìdì! Nènku tudi nè disànkà. Ndi nè disànkà dyàbùngì dyà nè. . .

⁴ Mwva ànu ndyàmbidila nè Eci nùnkù kacivwa mwà kulwa to, kàdi ndekeelu wa byònsò Cyàlu’s. Nè pa nànkù ndi nè kusàkidila kwàbùngì, bu mùdiye wa ndekeelu wa ku babàndì bàà pa tùbalù bànaayi abu, wùndì ngèèla meeji nè ngùmwe wà ku Mikenji minène mitùmina Èkèleeziyà mu cikondo eci.

⁵ Ncyèna mumanyè cidì cikwàbò Aci to. Ndi ncyàngata ànu ku ditùkù nè ku ditùkù, ànu mùdìYe ùCìbuulula amu. Ndi nteeta bwà—bwà kuCìfila, ku. . . ànu mùdìYe ùCìmpèesha amu.

⁶ Nudi nusankila di—dibènesha anyi? [Disangisha didi dyàmba nè: “Amen.”—Muf.] Nudikù bamòne mùdìCì ànu, mu dipetangana nè bikondo byà èkèleeziyà abi’s, ànu mùdìCì ànu menemene cinwàngana ànu menemene naabi’s? Ki mùdìbi. . . Bwànyì mémè, bìdì bìleeja nè cidì—cidì n’Nyumà Mwímpè mwèumwè wàkafila bikondo byà èkèleeziyà awu, Nyumà Mwímpè umwèumwè awu ngudi dìbà adi ùfila Eci, nudi numòna’s, bwalu cidì citwàngaja pàmwè; cyònsò ncyenzedi cinènè cyà Nzambi, ùDìleeja mu mishindù mishihilèshihilàngane.

⁷ Mònaayi nè, pààkaDìleejàYe kùdì Danyèlè, mu bikèènà-kumòna apu, kùvwa kufwànyine kwikala cifwànyikijilu kampàndà cyà cintu cimwè, bu mùdì mbù—mbùji pa ewu mwaba, anyi pàmwàpa mucì; nè mwaba wùdì wùlondà ncifwànyine kwikala lupingù. Nè—nè—nè bintu byàkenzàYe, mwikàle úcyènza, cintu cimwècimwè aci dìbà dyònsò, bwà

kwikala ànu batwishìibwe nè katwèna tupangila kucimòna nànsha.

⁸ Mpindyewu, mvwa cyà bushùwà mutùpìke nè disànka ànu katanci kakesè aka, pámwà nyiikilangana nè inábànzà mukesè udi musòmbe kaaba aka, wa bidimu bitwè ku makùmi mwandamukùlù nè bitaanu. Nè yêyè. . .

⁹ Kí nkwanjì kwenza ntàntà to, ànu pabwípi menemene nè mèmè kuumuka kuya ku wesètè, mòna's, kùvwa mwànà mukesè wa—wa bakàjì mu Ohio mwàmwa, uvwa, ngèèla meeji nè mmùdìbi, uvwa upùnga nè lufù mu cipidi cyà ndekeelu cyà disaamà dyà kànsèrè kàà mu mashi. Mpindyewu, leucémie nkànsèrè kàdi mu musùlù wà mashi. Nènku, kaa, mwànà mukesè awu ùvwa, nudi bamanyè's, mu mùshindù wà wènza nè bwòwà, byenzè nè kakùcivwa kàbìdì ditèkemena nànsha dyètù dyà kànà edì to bwèndè yêyè nànsha kakesè. Bwà byàkudyà bàvwa bà mudìshila mu mijilu, dimupanda. Nè pa nàнку bàvwa díkù dyà balanda bàà menemene. Nènku bwòbò. . .

¹⁰ Mándàmù Kidd, udi apa ewu, nè Mwanèètù Kidd, kubàmbilabò bwà Mukalenge udi wandamuna bikolè ku masambila. Ki kudisangabò, ngèèla meeji, nè kufutabò muntu kampànda, nè kulwabò nè mwànà mukesè wa bakàjì awu. Wa bwalu awu ùvwa mwànà mukesè wa bakàjì mulenga wa dikèma, wa bidimu bu, kaa, bisambòmbò, mwandamutekètè nàнку awu. [Mwanèètù wa bakàjì kampànda ùdi wàmba nè: “Bidimu citèemà.”—Muf.] Bidimu citèemà. Nè—nè ùvwa ùsanganyiibwa paanyimà pààpa mu cibambalu. Nènku ewu. . .

¹¹ Nènku patwàkayà kumpàlà kwà Mukalenge, Nyumà Mwimpè kumupàye diyì kampànda. Nènku byàkakèngela bwà kulwabò nendè, bikèngela kulwabò nendè biikàle bà mudìisha, nudi bamanyè's, mùshindù awu. Kàdi pààkuumukàye, ùvwa ùdila ùkèba dyàmpà dyela minyìinyi, nè, pa nàнку, mwikàle ùdìila byàkudyà byèndè mukana. Ki kumupèeshabò dyàmpà dyela minyìinyi adì, nè kutungunukabo ànu nè kumudìisha mu mùshindù wà ciibidilu.

¹² Paanyimà pàà ntàntà mukesè, matùkù makesè cyanààna, kwalukilabò nendè kwà ngàngàbukà. Ki bwòbò. . . Ngàngàbukà kàvwa ànu mwà kubyùmwa to. Kwambayè nè: “Mbyenzè ànu bu nè kàvwa, kàvwa mene bu mwànà wa bakàjì umwèumwè awu to.” Yêyè nè: “Mòna's, kakwèna—kakwèna kamanyinu nànsha kàmwè kàà kànsèrè kàà mu mashi to, mwaba nànsha wùmwè, mwaba nànsha wùmwè wètù ewu.” Pa nàнку, nènku, yêyè ùkaavwa ùpùnga nè lufù. Bàkaavwa bamanè kumulekelela; biikàle ànu bà mudìishila mu mijilu. Ùkaavwa mumanè kwandamuka mubidi mushààle wà kàlaabi. Nwènu's nudi bamanyè mùtùbo bashààla amu. Nè pa nàнку bwòbò. . . Kàdi patùdì twakulangana apa ùdi mu kàlaasà, ùnàya nè bânà nendè, mwikàle nè disànka nè mwèndè mwònsò.

13 Cidi cimvùlwija bwalu bukwbò bwà mùshindù awu. Dìngà ditùkù, mvwa ànu mwalùkile kumbèlu, kùvwa . . . Mémè ncìyi mutùpàkàne to, bàvwa anyi ba-Épiscopaliens anyi ba-Presbytériens, bàvwa balwè nè mwànà mukesè wa bakàjì bafùme nendè ku Kansas abu. Nènku bangàngàbukà bàkaavwa bamulekèlèlè, nè kànsèrè kàà mu mashi aku. Nènku bàkaavwa bamupèèshe, ngèèla meeji, matùkù ànaayi bwà kwikalayè nè mwoyi; ùkaavwa mushààle bibì bè. Ki kwambabò nè mbàpicishilè miinè matùkù ànaayi awu ànu mu lwendu lwà dilwa mwab'ewu, bènda bàpicila mu mishiki yà nèjè nè bikwbò, bàkòsolola ditùnga dijimà, bwà mémè kumusambidila. Ki kakwèndè mulùme, muntu wa mmwènekèlu mulenga, muntu mushindàme, ùkaavwa nè mvya.

14 Nènku bwòbò, bàkaavwa bamanè kwenza nendè, matùkù àbìdì, muneemu emu mu kaacilààla-beenyi kakesè. Ndi—ndi ngèèla meeji nè kakàcyènakù kàbìdì to patùdì twakulangana apa, dyàmùnù dyà musùlù wà Silver Creek edi. Ki pa nàнку mémè kuya bufùku abu bwà kumusambidila. Tuvwa dindà bwèbwebe. Mémè kwalukila bufùku abu, mfùmina pambèlù pàà cimenga, nè mémè kuyakù. Nè taatù mushindàme awu . . . kakwèndè awu ùvwa ùtwa eku ùtwa eku mwaba awu. Nè, maamù awu, ùteeta bwà kubeeja mwànà awu.

15 Nè díbà dímvwà mutwè binù nsambila adi, ki Nyumà Mwimpè kunsokolwela bwalu búvwa busokòme búvwa pankaci pàà—pàà maamù nè taatù, bwà cintu kampàndà cívwbò bènzè. Mémè kubàbìikidila ku luseke nè kubàkonkabù. Bwòbò kubanga kudila, kwambabò nè: “Ncyà bushùwà.”

16 Pashìshe mémè kutàngila paanyimà, ke mémè kumòna mwànà mukesè wa bakàjì awu ùtùpika mwonji, wènda, ùnàya. Kàdi mpindyewu mwànà mukesè awu . . . Mu ntàntà wa mbingu mitwè ku yisàtù nàнку, kuntùminabò fòtò wa mwànà mukesè wa bakàjì awu, mwalùkile mu kàlaasà, ùnàya mwonji, nè kàciyi nè kànsèrè kàà mu mashi aku to, nànsha kakesè.

17 Mpindyewu, mpindyewu, majaaniki awu kakùyì mpatà to àdi bulelèlè bushùwashùwàlè, nwamònu's. Pa nàнку, Nzambi wetù twètù ngwa cyà bushùwà menemene, nudi numòna's. Tudi ànu tuMukwàcila mudimu nè—nè tuMwitabuuja. Nè—nè mémè—mémè ndi mumanyè nè Yèyè ngwa cyà bushùwà.

18 Mpindyewu, ndi ngenza nè mwànyì mwònsò mpindyewu, nè piinè apu mpàcìdì cintu kampànda, munda, munkaci mwètù, ciikàle cìDìpengela njila. Nènku mpindyewu netwikalè mwà kuteeta, dilòòlò edi, ku ngàsà wa Nzambi, bwà kwangata Cìtampì Ciinàyi eci, bwà kumòna cìikalà Nyumà Mwimpè nè cyà kutwàmbila, mu Cyòci aci.

19 Mpindyewu nèngiikalè mwà—mwà kubala Bwàkabuulwibwà, nshapità mwi6, biikàle tubangila ku mvensà

wa 7; wa 7 nè wa 8. Kùdi misangu yònsò ànu mvensà yìbìdì; wa kumpàla ndimanyisha, nè mwibìdì ncyàkamònàye.

Nè pààkamanàye kukàngula citampì ciinàyi, ngákumvwa dīyī dyā cīfūkūibwā ciināyi—ciināyi dyamba nè: Lwā ùmonè.

Nè ngàkatàngila, nè kumòna kàbalù kàà cisengàsengà: nè uvwa musòmbepù dīnā dyèndè (uvwa musòmbepù awu) uvwa Lufù, nè Ifernò uvwa wènda . . . ùmulonda. Nè bààkabàpèèsha bukòlè pa bitùpà bīnaayi byā buloba, bwā kushebeyangana nè mwelè wā mvitā, nè nzala, nè lufù, nè . . . nyama yā pa buloba.

²⁰ Mpindyewu, Mukalenge àtùkwàcìshèku mpindyewu bwā kuumvwa Cyòci eci. Mbwalu busokoka.

²¹ Mpindyewu, ànu didyànjila-kumòna dikesè, bwā kwambululakù, bu mutùvwā benzè nè bikondo byā èkèleeziyā amu, babàndì bàà pa tùbalù aba nè dilamuna dyā Bitampì ebi. Mpindyewu, pa nànkù tudì ànu tubitèèka mu meeji, twakula ndambù too nè patùdì tudyùmvwa nè cikondo cyā kwakula cyàkùmbànyi.

²² Mpindyewu, twamònu mpindyewu, nè, dilamuna dyā Bitampì adi, m’Mukàndà wā Bupikudi mutwā bitampì. Nè pashìishe Mukàndà awu mmuvùnga mùtù movùngu amu, ànu menemene mùvwā mùshindù wā kale amu.

²³ [Mwanèètù Branham ùdi ùkwàta mudimu nè mabèjì à mukàndà bwā kuleeja mu cīfwànyikijilu cyā divùnga nè dilamuna dyā movùngu—Muf.] Kacìvwa mukàndà wā mùshindù ewu nànsha; bwalu ewu mmufùme ku dibwela mu cyalu ànu àbìdì àdì panshì aa, mikàndà yā mùshindù ewu eyi, mmu, kaa, ngèèla meeji bidimu lukàmà nè makùmi àtaanu bishààle ebi, anyì cintu kampànda, nkàmà yìbìdì. Nènku dībā adi bàvwa bàwùvùnga, pashìishe bàshìya lusongo alu lulembèlèlè. Ànu mùmvwā munwàmbile mùvwàci cyènjiibwā, nè Mifùndu, mwaba wā kucipeta, nè mu Yelèmiyā, nè bikwàbò. Pashìishe wùvwā wùlonda wùvwa wùvùngiibwā, pashìishe bàshìya lusongo lulembèlèlè, nè mùshindù ewu.

²⁴ Nè cyònsò cìvwa n’Cìtampì. Nè cìvwa m’Mukàndà mutwā bitampì mwandamutekètè, nè cìvwa . . . Muntu nànsha umwe . . . Pàvwàbò . . . Cìvwa m’Mukàndà wā Bupikudi mutwā bitampì mwandamutekètè. Mfwilaayikù luse.

²⁵ Nènku, dībā adi, muntu nànsha umwe mu Dyulu anyì pa buloba, anyì mwinshì mwā buloba, kàvwakù mukùmbànyine bwā kuWùbuulula anyì nànsha mene kuWùtàngila to. Ke Yone kwasayè mwadi, bwalu kàvwa mwā kupeta muntu nànsha umwe . . . Bwalu, Mukàndà wòwò awu kawùyi mwangàciibwe mu cyanza cyā Mwenawù wa ku cibangidilu awu to . . . Byòbì biinè, Wùvwa mujimija kùdi Adàmà nè Evà, nè mwalùkile,

paanyimà pàà bwôbò bamanè kujimija makenji àbò à ku Díyì, milayì, bumpyànyì bwàbò.

²⁶ Bòbò, vùlukàayi nè, bàvwa bàkòntonona buloba. Yèyè ùvwa—yèyè ùvwa nzambì wa kànàkànà, bwalu ùvwa mwànà wa Nzambì. Nè mwànà wa Nzambì ùdi nzambì wa—wa—wa kànàkànà. Mpindyewu, aci kí ncibèngàngàne nè Mifùndù nànsha. Ndi mumanyè nè aci cidì cyùmvwika cyà pabwàci.

²⁷ Kàdi Yesù wàkamba nè: “Kàdi piikalàbi nè, nutu nubiiikila aba bàvwa Díyì dyà Nzambì dilwa kùdìbo...” Nè nkùdi mbanganyì kùvwa Díyì dyà Nzambì dilwila? [Disangisha didi dyamba nè: “Baprófetà.”—Muf.] Baprófetà. “Piikalàbi nè, nutu nubiiikila aba bàdi Díyì dyà Nzambì dilwa kùdìbo nè ‘mbanzambì,’ mmunyi munùdiku mwà kumpiisha Mémè pàNdi ngamba nè Ndi Mwànà wa Nzambì?” Nwamònu anyi?

Nènkù, mpindyewu, bàvwa banzambì.

²⁸ Nènkù muntu, wèwè mulediibwe mu dikù nè dìnà dyèbè dyà dikù, wèwè’s udi mwànà wa balùme, citùpà cyà ku tatwèbè.

²⁹ Nènkù díbà adi—díbà adi pàakabwelà mpèkaatù, tudi basangàne nè muntu wàkasambuka cipòngòpòngò aci. Nè—nè mashi à bimpàngà byà ngombe nè à mbùji àvwa àbwikila, kàdi kaàvwa àlekeleela nànsha, too nè pàakalwà Bwanga butòkeshi, bùvwa mwà kuumusha katobà kàà mpèkaatù nè kukàkòsolola tutùpà tutùpà kwònsò nkòong nè kukààluja pa munyangakaji wakù wa ku cibangidilu, uvwa Sataànà awu.

³⁰ Pààkaalukilàku kùdi Sàtaanà, yèyè mmwindile cikondo cyèndè cyà dibùtudiibwa dyà Cyendèlèlè. Mpindyewu, aci cidì cileeja citùdi twètù twitabuuja. Tudi twitabuuja kakùyì mpatà to nè neùmushiibwe yèyè yònsò nkòong nè neàbutudiibwè.

³¹ Mémè ndi ngiitabuuja nè mpèkaatù neàsùsuludiibwè. Nè pàdiye ùtondiibwa, bishindàmèene pa Mashi à Yesù Kilistò, mbyenzè bu kumacisha kwà dimata dyà màyi mafiiikè à mufùndu mu mushiki wà bwanga butòkeshi bwà Javel. Bùdi ànu bùdisùsulula mu tuubintu twà mushindà, nè bùdyàluja buludi kùdidi difùmine aku. Nwamònu anyi? Nè mùshindù awu ke wùdi Mashi à Yesù Kilistò ènza.

³² Díbà adi, aci cidì cyàluja cyàkàbìdi muntu luseke lukwàbò lwà cipòngòpòngò aci, bu mwànà wa balùmè wa Nzambì. Nwamònu anyi? Nè díbà adi ùdi—díbà adi ùdi ùlwa mwà—mwà... Mòna’s, ùdi mene... Bukolè bwà Nzambì bufùki bùdi munda mwèndè amu. Nènkù, bwòbù bukesè, díbà dyònsò didi Nzambì mwà kutùma díyì bwà kwenjiibwaci adi, necyènjiibwè. Nè twètù tudi twalukila. Bwà nè pàdi—pàdi... .

³³ Mòsà, mwinshi mwà mashi à bimpàngà byà ngombe, kàdi pàakatwilanganàye nè Bukènkè abu, Dikunji dyà Kapyà adi mu kaacipuka kàvwa kàlàkuka kapyà aku, nè kwimanayè kuntwaku mu mudimu mumutùma naawù wùvwa Nzambì

mumupèeshe, kàdi's yéyè ùvwa mupròfeta, nènku pàakalwà Dìyì dya Mukalenge kùdiye, wàkaakula, nè nànsha mene bintu byàkafùkiibwa ku Dìyì. Nwamònu anyi?

³⁴ Mpindyewu, piikalàbi nè necyènzè nànkù, mwinshi mwà mashi à bimpàngà byà ngombe, netwàmbè cinyi bwà Mashi à Yesù? Kaàvwa mayibwikile nànsha; kàdi àvwa mayilekèlèlè, yònsò mu kaabujimà. Nènku wèwè udi mwimàne mu Bwikadi bwà Nzambi, bu mwànà wa balume mupikula. Mpindyewu, nwamònu's, Èkèleeziyà ùdi kule kwinshì kwà cipiminu cyà nsòmbelu wendè. Nè ndi ngèèla meeji nè, misangu mipitèpité búngi, twètù tudi twenda tubaabata pamutù pàà kupàtukila ànu patòoke cyà bushùwà nè kukungamangana nè bwalu bùdi panshì.

Ndi nè cintu kampànda cìndi muswè kwamba, kàdi nèn—nèncyàmbè pààlwà díbà.

³⁵ Nènku mpindyewu mònaayi nè kùdi cintu kampànda cidi kaciyi cyènda bìmpè mwaba kampànda mu maèkèleeziyà. Nè mémè ndi ngèèla meeji nè n'ndongolwelu yà cyena-màngumba yidi mikònyàngaje meeji à bantu, nè bikwàbò, mu mùshindù wà nè kí mbamanyè mwà kucyènta nànsha. Ncyà bushùwà.

³⁶ Kàdi mbatùlayè nè Cìvwa mwà kubuuludiibwa. Nènku mpindyewu kùdi Bitampì Mwandamutekètè bìdi Mukàndà ewu mutwìbwe naabi. Nè byòbì Bitampì Mwandamutekètè abi mpindyewu . . .

³⁷ Nè pashìishe paanyimà pàà Bitampì Mwandamutekètè ebi bimanè kujika, tudi tusangana nè, mu Bwàkabuulwibwà 10, kùvwa Mikungulu mwandamutekètè yidi kayiyi yùmvwika yìvwà Yone mutùmìbwe nè mudimu wà kuyifùnda, kàdi pashìishe bamukàndike bwà kufùnda yòyi ayi. Nè pa díbà dya yòyi Mikungulu ayi, tudi tusangana Kilistò, anyi: “Mwanjèlò wàkatùùluka nè mwanzankòngòlò, nè wàkatèèka makàsà Èndè pa buloba bùme nè pa mbù, wàkadìcipa nè cikondo cìvwa cijikè, pa dyòdi díbà adi.”

³⁸ Nè pashìishe tudi tusangana—tujandula nè, mu kubuulula kwà Bitampì, bwà nè Mwànà wa—wa mùkòòkò ùvwa mushiye mudimu Wèndè wà butwàngaji bu Mwakwidyanganyi, nè ùvwa musemène mpindyewu bwà kunana makenji Èndè, byònsò bìvwàYe mupikùle ku lufù Lwèndè abi.

³⁹ Nènku, díbà adi, muntu nànsha umwe kàvwakù mwà kubuulula Mukàndà awu to. Muntu nànsha umwe kààkaWùmvwa nànsha. Wùvwa m'Mukàndà wà Bupikudi. Nènku Nzambi Taatù, Nyumà, nguvwa naaWù mu cyanza Cyèndè, bwalu Kilistò ùvwa pa Nkwasa wa butùmbi bu Mutwàngaji, Mutwàngaji umwèpelè. Ki bwà cinyi, kí nkufwànyine kwikala munsantu nànsha umwe, Màriyà nànsha umwe, Yòzefù nànsha umwe, cintu cikwàbò nànsha cimwè, pa cyoshelu aci, bwalu cilumbù cìvwa ncyà Mashi. Nè ànu Mashi

à Yesù nkààyawù ngàvwà mwà kwenza difuta dyà cibawu, pa nàнку cintu cikwàbò nànsha címwè kacìvwakù mwà kwimana bu Mutwàngaji nànsha. Ncyà bushùwà. Kakùvwakù cintu cikwàbò nànsha címwè to.

⁴⁰ Pa nàнку mmwènenu yònsò ewu wa dyakwilangana nè Yudà bwà cidiidi, nè dyakwilangana nè Cècilià Munsantu bwà cintu cikwàbò kampànda, abi's ndukutukutu. Abi kabyèna. . . Ncyèna—ncyèna ngàmba nè bantu abu kí mbàà kweyemena nè kabèèna nè meeji matòòke to. Ncyèna ngàmba nè kwèna nè meeji matòòke mu dicyèna to, pawikalà ucyèna. Kàdi, udi mu ntùpàkànyì, udi—udi nè meeji matòòke mu ntùpàkànyì. Nè cintu kanà cyònsò. . .

⁴¹ Bàdi bàmba nè: “Èè, Mwanjèlò ewu—ewu, ewu—ewu's wàkamwènekela Bonifer Munsantu è kwambayè *bikampànda*, *bikansanga*, nè *bikankènga*. Nènku's bìvwa bikèngela bwà kwambabò *bikampànda*.” Mémè ncyèna ngèèlakù abi mpatà to nànsha kakesè, mu meeji àànyì, bwà nè muntu kampànda wàkamòna cikèèna-kumòna aci. Ncyèna ngèèlakù mpatà bwà nè Joseph Smith wàkamòna cikèèna-kumòna aci to, kàdi kacìvwa bilondeshile bikwàbò byà mu Dìyì nànsha. Nàнку ki bwà cinyì, bwànyì mèmè, ncyà mafi. Nwamònu anyi? Bìvwa bikèngela kwikalaci cikumbànàngàne nè bikwàbò byà mu Dìyì.

⁴² Wòwò awu ke mùshindù wùdì bikondo byà èkèleeziyà, nè Bitampì, nè bikwàbò byònsò byàCì. Nènku muntu kampànda ní nganyì ní nganyì yèyè údyambidila mùdiye nè Mikungulu Mwandamutekètè ayì, piikalà cyòci aci kaciyì cikumbanangana nè bikwàbò byà Dìyì, kùdi cintu kampànda cidi kaciyì cyènda bimpè to. Nwamònu anyi? Bikèngela cilwe nè, EMU MMÙDÌ MUKALENGE WÀMBA, bwalu *Eci* ke Mukànda. *Eci* ke Dibuludiibwa dyà Yesù Kilistò, mu kaabujimà kààDì.

Mpindyewu, mèmè ndi—ndi ngiitabuujà díbà adi nè Mwànà wa mùkòòkò wàkaseemèna.

⁴³ Kabàvwa bamanyè to. Yone úvwa údila mwadi. Kàvwa mwà kupeta muntu nànsha umwè to, mu Dyulu, pa buloba, bwalu bwònsò bàvwa luseke lukwàbò lwà cipòngòpòngò aci, nwamònu's, mpèkaatù. Kakùvwa muntu nànsha umwe. . . Nènku Mwanjèlò, mu bushùwà bwà bwalu, Yèyè's úvwakù mufwànyine kwikala mukumbànyine, kàdi, twamb'eku twamb'eku, bìvwa bikèngela kwikalaci Cilongo. Bìvwa bikèngela kwikalaci muntu. Kàdi kakùvwa cintu cyà mùshindù awu to, bwalu muntu yònsò úvwa mulela ku disangila dyà mulùme nè mukàjì.

⁴⁴ Byàkakèngela bwà kuMwangatayè Yèyè uvwa kàyì mulela ku cyòci aci to. Pa nàнку Nzambi Yèyè mwinè wàkangata cyòci aci, mu dilediibwa dyà kùdi nsongàakàjì virgò, nè wàkalwa Emanùwèlè. Mashì Èndè, èè, ke Àmwèpelè àvwà makumbànyine. Díbà adi pàakasambukàYe cipòngòpòngò eci, Yèyè mwinè, nè

kufuta mushinga nè kwela cilamba mu njila bwà twètù bakwàbò aba, díbà adi ke kusòmba Yè paanshì, bwà kwikala Mutwàngaji. Nènku Yèyè mmusòmbepù.

⁴⁵ Nè Mukàndà awu wùvwa mubwikila cyà bushùwà, cikondo cyònsò aci. Wùdi mwaba awu, kàdi Wùcidi ànu mu bimfwànyì. Bààka Wùmòna. Nànsha Yone mene wàka Wùmòna. Dimanyisha, pààkapàtukà wa kumpàla awu, yèyè kwamba nè: “Kàbalù katòòke kààkapàtuka; kàvwa nè mukàbàndi mubàndepù; ùvwa nè butà bwà mikete mu cyanza.” Aci’s ncimfwànyì. Aci kí ncibuulula nànsha. To. Cidi ànu cimfwànyì cyanààna. Nènku, bwà muntu wetù kanà yònsò ewu pa buloba, aci ke cyònsò cidìye mufwànyine kwamba. Ncyà bushùwà. Mmufwànyine kutànkakana nè kutètuka, kakùyì mpatà to, kwenza wàlenga mwaba kampàndà *ewu* anyì *wàwa*, nè paanyimà pàà cikondo kampànda.

⁴⁶ Kàdi tudi tujandula, díbà adi, mu Mukàndà wà Bwàkabuulwibwà nè: “Ku Mukenji wà mwanjèlò wa mwandamutekètè, maalu masokoka (maalu masokoka wònsò à Cyòci aci) àvwa nè cyà kwikala mamana kubuulula pa díbà adi.” Mpindyewu, aci m’Bwàkabuulwibwà 10:1-7, bwà nè Cìvwa nè cyà kwikala cibuuulula bilondèshìle cikondo aci, pa díbà adi pààkènzà Yè apu.

⁴⁷ Díbà adi ke Mikungulu Mwandamutekètè ayi kupàtulayì mēyì àayi à pabwàwù awu, nè Yone ùkaavwa wàmba kufùnda. Kàdi, Yone wàkamanya cìvwa Ci, kàdi kàà—kààka Cìfùnda to bwalu bààkamukàndika bwà ku Cìfùndayè. Aci kakùyì mpatà to, nè cyònsò mu kaabujimà, mbwalu busokoka. Kacyèna nànsha mene mu cimfwànyì anyì cintu nànsha cimwè to. Tudi bamanyè ànu cyanààna nè Yèyè. . . Cyàkakungula, kwàjiki.

⁴⁸ Nènku mpindyewu mu kulonga kwà cyòci eci mpindyewu, kanùpu mwoyi to, mpindyewu, mu dyàlumingu, anyì mu dyàlumingu mu dindà, tuvwa buumùshe mudimu wà dyondopa bu mutùvwà bangàtè mandamuna à ku—à ku nkonko yà bantu. Mpindyewu, ndi muswè bwà nwikalèku nè lukonko pa Bitampì Mwandamutekètè ebi, piikalàci cinùtácisha, cintu kampànda cinùdi kanùyì numvwa. Tùlùpetèku pa Bitampì Mwandamutekètè abi. Díbà adi ndi mwà kwamba, patwàmbà kufika ku diisambòmbò dilòlò, ní yìdi bùngi bukùmbàne bwà—bwà kuyàmdamuna, anyì to, nudi numòna’s. Nè díbà adi mpindyewu, bwà kwamba ànu, èè, pa cintu cikwàbò kampànda, anyì nè: “Bìvwa bikèngela bwà mèmè kwenza *cikampànda* anyì?” Anyì—anyì, ncimfwànyine kwikala cilòtò. Byòbì abi, byòbì abi bidi byònsò bintu byà mushinga, mpindyewu, nwavùlukaayi. Mbintu byà mushinga. Kàdi tùshaalàayi ànu nè Bitampì Mwandamutekètè ebi. Pa byòbì abi ke patùdi. Twànjàayi. . . Byòbì ke bidì ma—masangisha aa malongolwela, Bitampì Mwandamutekètè abi’s. Tùshaalàayi ànu nè Cyòci aci.

49 Bidi bikèngela bwà ngààlukilè kwànyì, bikèngela bwà nkenzèku ndambù wa masangisha mu wesètè. Nèngààlukilè cyàkàbìdì pashiishe, mu ntàntà wa mupitekù pa ngondo anyì ngondo yibìdì, anyì cintu bu nàнку, nènku pàmwàpa Mukalenge neányishèku bwà twamòna mwà kwenza cikwàbò cintu kampànda pa bwalu abu, pàmwàpa mudimu wà dyondopa anyì cintu kampànda díbà adi, anyì cyònsò citùdiku. . . cyònsò cìdiku aci.

50 Pashiishe tudi nè Mpungi Mwandamutekètè kaaba aka, yicìdiku mwà kulwa, nudi numòna's. Nè byònsò abi, bilwalwamù kàbìdì. Nè Mpànzà Mwandamutekètè, nwamònu's, yà kupòngolola. Pa nàнку, nè byònsò abi nebibwelakanè ànu mwómò emu, kàdi byònsò bicìdì ànu byà kabìyì byùmvwika to.

51 Mpindyewu, makèèlèlè dilòòlò awu. . . Twàsangànyì nè Cítampì cyà Kumpàla cyàpàtuku, nè mubàndi wa pa kàbalù. . . Nè Mukalenge. . . Ndi ngambilamù, ncìvwakù mucìmanyè kumpàla nànsha. Kakwèna cintu nànsha cimwè cyà ku bintu ebi cínkaavwàku mumanyè kumpàla nànsha. Aci's ncyà bushùwà. Nè ncyènà ànu mumanyè to.

52 Ndi nya ànu kuntwaku, ngangata Bible nsòmbela panshì, nè nshààla musòmbè mwaba awu too nè pàdiCi cibanga kudikàngukila mùshindù awu. Ndi ngambula ànu kasàlà kàànyì mbanga kufùnda. Nè ndi nshààla ànu musòmbè mwaba awu, pàmwàpa munda mwà mèbà, too nè pàdiCi—pàdiCi cijika.

53 Pashiishe ngààlukila, nè njandula, pàndì mmòna mwaba wùdiYe mwambè Cyòci eci. Ndyàmbidila nè: “Èè, s'mbyenzè ànu bu nè nkààdikù mumòne cyòci aci mwaba kampànda.” Ngangata mukànda wànyì wà myaba yìdì myàkù, mbanga kutùma meeji paanyimà. “Kùdikù cintu kampànda cyà cifwànàngane nè Cyòci aci anyì? Kàdi's nCyòci eci *apa* mene. Nè pashiishe's nCyòci eci kàbìdì *apa* nùнку. Nè nCyòci eci *apa* nùнку, nè *apa* nùнку, nè *apa* nùнку.” Pashiishe ndi nCítwàngaja ànu cyanààna. Ndi mmanya nè n'Nzambi awu, pàdiCi ànu cikùmbanangana nè Mufùndù nè Mufùndù mukwàbò. Awu ke mùshindù wùdibi bikèngela kwenzaCi. Bidi ànu mùdì kwibaka kwà nzùbu, bikèngela mabwe àkumbananganè, dibwe nè dibwe dikwàbò.

54 Mpindyewu, makèèlèlè dilòòlò awu tuvwa nè dikàngula dya—dya Cítampì Ciisàtù. Cyà kumpàlè cìvwa nkàbalù katòòke, nènku kàvwa kalondèle kàvwa nkàbalù kakúnze, nè pashiishe kàbalù kafìke. Ki twètù kujandula nè babàndi bàà pa tùbalù abu bàvwa ànu mubàndi wa pa kàbalù umwèumwè awu, díbà dyònsò; nè ùvwa mmufwilakanyì nè Kilistò, kacya ànu ku cibangidilu aku. Kàvwa nè cifulu cyà—cyà butùmbi to, kàdi wàkacipeta pashiishe. Nè pashiishe twètù kusangana nè pashiishe bwòbò kumupèesha mwelè wà mvità, bwà kuumusha ditalala pa buloba, nè twètù kujandula nè ke cyàkenzàye. Nè pashiishe kubwejayè twitabàayi yà kupèeshangana, èkèleeziyà

uvwa nè mfrangà awu, mu kupima kwà bujitu bwà dyeyà bwà *cikampànda*, nè meeyà àbìdì bwà *cikansanga*. Kàdì bwòbò kumukàndìka bwà kàlengi Maanyì nè mvinyò to, bikesè bìvwà bishààle abi.

55 Ki pashìishe twètù kufila, kushiila makèèlèlè dilòòlò, pa cifwànyikijilu cyà cìvwà Maanyì nè mvinyò, nè bipeta kaayi bìvwàBi naabi. Nènku twètù...Bìvwà bifwànyine kwikala byumvwike ndambù bu cyakwidi cikàyàbàle, kàdì mèmè...cìvwà menemene ànu Bulelèlè. Nwamònu anyi? Mpindyewu, twètù kushiila pa...Twànjààyibi, bwà katanci kakesè cyanààna, kumònononakù cyòci aci mpindyewu. Nènku dìbà adi, twètù kushiila pa bukolè bùdì naabù mvinyò, cìvwà Maanyì àleeja, Nyumà. Mpindyewu, ngèela meeji nè nuwva bwònsò bacyūmvwè bilenga too nè ku ndekeelu. Nenùcipetèlè pa mukàbà wà mèyì, panwikalà nwènù kanùyì bacyūmvwè. Nè myaba yà kupetela Mifundu, yà nè, Maanyì àtu misangu yònsò ànu àleeja mu cimfwànyì Nyumà Mwimpè. Cileejilu virgò mikùtākàne yìvwà kayiyi nè Maanyì, virgò yà lungènyì miikàle nè Maanyì, àdì Nyumà Mwimpè awu. Ki pashìishe twètù kwalukila paanyimà, mu—mu bà—baprófetà, nè bikwàbò. Nènku mpindyewu... .

56 Mu bushùwà bwà bwalu, ncyèna nteeta bwà kupàtula Mufundu wònsò mwómò amu nànsha. Nè kùdì bintu byúdi kuyikù nànsha mene bwà kwakulapù to; byàngata dìbà dipite búngì. Kàdì ndi nteeta bwà kutèèka kaaba aka, ku Mifundu nè bikwàbò, bintu búngì bukùmbàne byà kupèèsha bantu bwà byamònakù mwà kubàfikisha ku dimanya nè ku dimòna cimfwànyì cyàCì. Kàdì bu wèwè mwà kusòmbela panshì nè cìmwè cyà ku Bitampì abi, mòna's, ekèlekèle, s'udi mufwànyine kuyiisha mayiisha à ngondo mujimà dilòòlò dyònsò, mwikàle ànu pa Cìtampì aci, kàdì kùyì ànu mene uCilenga to, nwamònu's, pa cimwèpelè cyà ku Byòbi. Nènku's ke mùdì—mùdì búngì bwà maalu àdìMu nànkù. Kàdì, tudi tulenga ànu myaba yàCì minène, dìbà adi udi mwà—udi mwà kumòna cìdìCì pa bwalu abu.

57 Mpindyewu, bu mùdìbi nè Maanyì àdì àleeja Nyumà Mwimpè mu cimfwànyì, dìbà adi tudi tujandula nè maanyì nè mvinyò bìdì bìpetangana mu dikuukwila, nwamònu's, bìpetangana misangu yònsò mu dikuukwila.

58 Nènku mvinyò, múmvwà mwambè, cìdì cilwè kùndì nè, mvinyò ùdì ùleeja mu cimfwànyì nè ùvwà mbukolè—ùvwà mbukolè bwà disaluka difùme ku dibuulula. Nwamònu anyi? Nènku apu mpàdì cintu kampànda cibuułùdìibwe. Didi dipèèsha mwena kwitabuujà disaluka, bwalu ncifidìibwe ku dibuulula. Nwamònu anyi? Ncintu cìdì Nzambì mwambè. Mbwalu busokoka; kabèèna mwà kuCyūmvwa to, nwamònu's. Nènku, paanyimà pàà katanci, Nzambì ùdì ùpweka nè ùCìbuulula, nè pashìishe ùCìshindika.

59 Vùlukààyi nè, pàtù Bulelèlà bùbuuludiibwa, Bulelèlà abu bùtu kàbìdì bùshìndikiibwa. Nzambi, dîbà dyònsò, muntu nànsha yêyè mufwànyine kwikala wa meeji matwè bìshi, nànsha yêyè mufwànyine kwikala wa meeji à njàjàmà bìshi mu mutù wèndè, Nzambi kàyi mutwè cidiye wàmba aci nyama ku mikòlò to, kùdì cintu kampànda kacìyi mu cyôci to. Nwamònu anyi? Cyà bushùwà. Bwalu, cìdì n’Dîyi.

60 Mpindyewu, pàakayà Mòsà kuntwaku mu disonsodiibwa dyà kùdì Nzambi, wàkamba nè: “Njiiji yìlwe,” njiiji yàkalwa. Kwambayè nè: “Ndimbà yìlwe,” ndimbà yàkalwa.

61 Nwamònu’s, kàdì bu nè ùvwa mwàmbè nè: “Njiiji yìlwe,” kàdì kayiyi milwè? Nwamònu’s, dîbà adi yêyè—yêyè kàvwa mwambè Dîyi dyà Mukalenge to, nwamònu’s; yêyè ùvwa ànu mwakùle cyanàànà, ùvwa mwambè dîyi dyèndè yêyè mwinè. Ùvwa mufwànyine kwikala mudyàmbidile nè bìvwa bìkèngela kwikalakù njiiji. Kàdì, kakùvwa—kakùvwa kulwè njiiji to, bwalu Nzambi kî guvwa mumwambileci to.

62 Nènku pàdì Nzambi ùkwambila cintu kampànda, wàmba nè: “Ndà ùkenzè *cikampànda*, nè Mémè nèngùikalè naaci, bwalu eci n’Dîyi Dyànyi,” nè Ùcileejà mu Bible, dîbà adi Nzambi ùdì ùtwa cyôci aci nyama ku mikòlò. Ne cyôci kacìyi cifùnda mu Bible to, nànsha nànkù Nzambi ùdì ùcìtwa nyama ku mikòlò, cyôci ciikàle Dîyi dyà Nzambi. Nwamònu anyi?

63 Nènku dîbà adi cyôci kacìyi aci to, cìdì cìbuuludiibwa kùdì bapròfetà. Tudi bamanyè nè maalu masokoka wònsò à Nzambi àtu àmanyishiibwa kùdì bapròfetà, nè ànu kùdìbo bwòbò nkàâyabò. Nwamònu’s, Amòsà 3:7.

64 Mpindyewu, mpindyewu, bukolè bwà dibuulula bùdì bùtwàla disaluka kùdì mwena kwitabuuja. Bwalu, bukolè bwà mvinyò, mvinyò wa mubidi ewu, bùtukù mbwà kusalulangana. Nwamònu anyi? Bùtukù bwà—bwà kufikisha muntu, udi mucibùlùke yònsò awu, ku disaluka. Nwamònu anyi? Nwamònu anyi? Èè, dîbà adi, mpindyewu, kùdì bukolè kampànda bwà dibuulula dyà Dîyi, didì dîfila disaluka dyà disànka kùdì mwena kwitabuuja, disaluka dyà disànkishiibwa, disaluka dyà nè nDishìndikiibwe, nDijaadikiibwe.

65 Neibiikidiibwe, mu Mifùndu, bu mutùdì baswè kuleedilakù nè, “mvinyò mupyamùpyà.” Tutu misangu yònsò tuleedilakù mùshindù awu, bu: “Bantu aba mbakwàcike mvinyò mupyamùpyà.” Nwamònu anyi? Èyo. Anyi nè, “mvinyò wa nyumà,” ngèèla meeji, ki dyumvwija dyà ditàmbe bwìmpè. Ndifwànyine kwikala nè, “mvinyò wa nyumà.” Ànu mutù mvinyò wa mubidi ùdibuulula mu bukolè bwà disaluka, ke mùdìbi kàbìdì nè mvinyò mupyamùpyà, pàdìCì cìbuulula Dîyi dyà Nzambi, didì Nyumà. Kaa! Mpindyewu kùdì...aci’s... Nwamònu’s, Dîyi Dyòdì diinè didì Nyumà. Nudi nwitabuuja nànkù anyi?

66 Tùcìbalààyaaku. Tùcìbalààyaaku, Yone Munsantu 6. Twánjààyi ànu . . . Èyowà, díbà adi kanwà—díbà adi kanwà—kanwàkwamba nè: “Èè, mpindyewu, muntu kampànda ngudi mwambè nànkú to.” Twánjààyi—twánjààyi kumòna nè Nganyì udi mucyámbe, nènku díbà adi netùmanyè ní cidi Bulelèlè, anyì to. Yone Munsantu, nshapità mwi6. Nènku nshapità mwi6, nè ngèèla meeji nè mmvensa wa makùmi àsambòmb— . . . wa 63, èyo, ngèèla meeji nè nyèyè ewu. Èyowà.

Nyumà ngudi uvwija nè mwoyi; mubidi kawèna nè mushinga mu cintu nànsha címwè to: mèyi àndi mèmè nnwàmbila aa, wòwò ke àdi nyumà, nè wòwò ke àdi mwoyi.

67 Dìyì Dyòdi diinè didi Nyumà. N’Nyumà mu mmwènekèlu wa Dìyì. Nènku díbà adi, nudi numòna’s, pàdiDi divwijiibwa nè mwoyi, anyì divwijiibwa ku mwoyi, Nyumà wa Dìyì ùbanga kukwàta mudimu nè wènza maalu. Nwamònu anyì? Bwalu . . .

68 Mpindyewu tàngilààyi kùneeku. Bikèngela bwà meeji kwikalawù meeji kumpàlà kwà kwikalawù dìyì. Nè pashìishe pàdi meeji èdiibwa patòòke, àdi dìyì. Mpindyewu, eci mmeeki à Nzambi àdiYe mutèèke mu Dìyì. Nè pashìishe patùdi twètù tuDyàkidila difùmina kùdiYe, Didi dilwa Dìyì.

69 Nzambi wàkabuulwila Mòsà cyà dyenza. Mòsà wàkacyàmba, nè cyòci cyàkenzeka. Nwamònu anyì? Ncyòci, pìikalàci cyà bushùwà cifùmina kùdi Nzambi.

70 Mpindyewu tudi tujandula nè—nè, Cìdi—Cìdi cìsalula nè Cìdi cìfila disànka, bwalu Cìdi Dìyì dyà Nzambi. Nènku mvinyò mupyamùpyà awu, mvinyò mupyamùpyà awu ùdi ùsalula . . . pàdiCi cibuuulula Dìyì. Díbà adi, citwàla disànka dipite nè pa cipimu, míngà misangu. Tudi bakenkète cyòci aci nè, nè cidi citwàla disànka mu mùshindù wà nè udi naadi diyiila nè panshi.

71 Mpindyewu, ndi mumanyè nè kùtu dikolesha dyà maalu bùngi cyanààna, nè bantu bàditwa mu bintu. Ndi mumanyè nè míngà misangu bàtu bàcyènza pàtù mùjikì wimba byà bàtùpika bàya muulu bàalukila nè bikwàbò byònsò. Nè ndi mumanyè nè abi bitu byènzekà. Nè mèmè—mèmè pàànyì, ntu ngiitabuuja cyòci aci. Kàdi nkààdikù mumòne bantu mu ditùkù divwà nè, pàvwà mùjikì kacya wàngatangana, bantu bwònsò bàvwà bàtùpika bàtuuta mikòbolo; kàdi pàvwà mùjikì wimana, pààbì biimana. Nwamònu anyì? Mèmè ntu ngiitabuuja . . . Èè, abi, bìcidi ànu bilenga’s, bwànyì mèmè, nudi numòna’s, pàcìdi bantu nè nsòmbelu mujaalàme. Nènku . . .

72 Kàdi, mpindyewu, mwaba awu, kàdi bangààku ànu kuyiisha Dìyì’s! Mpindyewu, aci’s ke cintu cìdi citwàla Mwoyi bulelèlè, n’Dìyì, nè cidi citwàla disànka dyà disaluka dyà ku mvinyò mupyamùpyà. Nwamònu anyì? Èyowà. Nènku’s ke cyòci aci cyàkenzeka dyà Mpenta, pàakashindikiilwà Dìyì.

⁷³ Mpindyewu tàngilàayi. Mpindyewu, Yesù wàkabàmbila, mu Luukà 24:49 nè: “Mònaayi, Ndi ntùma mulayi wà Taatù Wanyi pambidi pèènù; kàdi nwênù bàndaayi ku Yelusàlèma nùshaalè bindile too nè.” Mulayi wà Taatù wùwva ngwà bìshi? Yowèlà 2:28, mòna’s, tudi tujandula nè, Yèyè neikalè mwà “kwicikija Nyumà.” Mu Yeshàayi 28:29, mùvwàbo mwà kwikala nè “mishiku yìkukumina, nè myakulu mikwàbò,” nè bintu byònsò ebi.

⁷⁴ Kubàndabò kuntwaku. Nè mutùvwà bacìkenkète, pàmwàpa umwe ùwva mwambè nè: “Èè, ngèèla meeji nè twindidi ntàntà bule bukùmbàne. Tùcitàbaayi ànu ku diitabuuja cyanàana.” Adì divwa ndilongesha dimpè dyà ba-Baptistes, kàdi kadyàkakùmbanakù nè bàna bèètù abu nànsha.

⁷⁵ Pa nàнку dìbà adì, katancì aka anyì, bìwva bikèngela bwà kulwakù cintu cyà cyà bushùwà. Kì kushàalabò bindile mudimu wàbò wà bwambi, bwà Dìyi kushìndikiibwadi. Nènku paùdi ulwa bwà kukèba Nyumà Mwìmpè, udi wenza cyòci cìmwècìmwè aci.

⁷⁶ Èyo, udi mwà kucìitaba ku diitabuuja. Bidi bikèngela wìtabe Kilistò ku diitabuuja. Ncyà bushùwà menemene. Nènku udi wìtaba Nyumà Mwìmpè ku diitabuuja; kàdi pashìshe lekèlà Nyumà Mwìmpè àlwe àfilè ditengudiibwa, bu bujaadiki bwà nè Yèyè wìtābi diitabuuja dyèbè, nudi numòna’s. Nènku, nwamònu’s: “Abraham wàkiitabuuja Nzambi, nè cyàkabadiibwa kùdiye bu bwakàne.” Kàdi Nzambi wàkamupèèsha cimanyinu cyà ditengudiibwa, bu cishìndiki cyà nè Wàkiitaba diitabuuja dyèndè.

⁷⁷ Pa nàнку aci ke cintu cìmwècìmwè citùdi nè cyà kwenza. Tudi nè cyà kwindila Nyumà Mwìmpè too nè pìikalàYe mwenzè cintu kampànda; kabìyi ànu nè mbwalu tudi baakùle mu myakulu, kabìyi ànu nè mbwalu tudi bajè maja, anyì nè tudi bapetè masaluka, tudi beelè mbilà to. Too nè patwikalà bashintùlùke; too nè pìikalà cyà bushùwà cintu kampànda cyenzèke! Nànsha cyòci cilwè mu mmwènekèlu kaayi. Kwènzekèku ànu cintu, ke cìdi nè mushinga. Nwamònu anyì?

⁷⁸ Nè mèmè ndi ngiitabuuja nè dyakula dyà mu myakulu nè bintu bikwàbò byònsò ebi bidi ànu bimpè, kàdi ànu aci mu cyòci nkàayaci kacýàkukùmbana nànsha. Nè wèwè udi mumanyè nè kacýàkukùmbana to. Pa nàнку, kacýèna nè cìdici cyènta to.

⁷⁹ Mèmè nkàadikù mumòne baamwamùlopò bàakula mu myakulu, mumòne bampàkààmàngà bàakula mu myakulu nè bàja maja mu nyumà. Bushùwà’s. Bātèeka crayon mwaba awu nè ùfunda mu myakulu myenyi. Nè muntu kampànda ùyàndamuna, ncyà bushùwà, nè wamba bulelèlà. Aci’s ncyà bushùwà. Mufunde ànu menemene cìdi cyenzèke, nè cìwva menemene ànu mùshìndù awu. Mubàmòne bàdyèla lupwishi mu mutù, nè bàdìtāpa mpùtā nè twelè, nè bàyìbwikila nè mashi à ngulungù wa mpànda anyì

cintu kampànda, kàdi—kàdi, bushùwà, nwamònu's, kàdi kusòka dyabùlù. Pa nàнку, nudi numòna's, aci kacýèna. . .

⁸⁰ Kwakula kwà mu myakulu kí nkùdi kwèza bwalu to. “Nànsha mèmè ngàakula nè myakulu yà bantu nè yà Banjèlò, kàdi ncíyì nè luse to, kacýèna nè musinga kùndì nànsha. Nwamònu's, nànsha mùndì mwà kucýènzà's!” Nwamònu anyì? Pa nàнку bintu abi kacýèna byùmvwija nè wèwè udi nè Nyumà Mwímpè nànsha.

⁸¹ Kàdi pàdiYe, Mupèrsonà awu, Nyumà wa Kilistò udi kàyi mwà—mwà kufwà awu ùlwa Musùngidi webè sungasunga, nè ùkushintulula, nè wùkùpa mmwènenenu yèbè ayi buludì ku Kàlvariyò nè ku Dìyì edi, cintu kampànda ncyènzèke. Èyowà's, mukalenge. Cintu kampànda ncyènzèke. Kabyàkukèngela bwà muntu nànsha umwe àkwambilèci nànsha. Wèwè nèucimanyè pènzekàci.

⁸² Nèнку mvinyò mupyamùpyà awu, pàdiye ùtwàla dibuulula, díbà adi nCi—nCibuulula.

⁸³ Nèнку ke mùshindù wàkenzekàbi ku Mpenta ngwòwò awu. Bwòbò bàvwa bamanyè nè—nè kùvwa nè cyà kwikala Nyumà kampànda wa dibìcìkijila, nèнку kwindilabò too nè pààkenzekà cyòci eci. Nèнку pààkenzekà cishindiki cyà dibuulula aci, díbà adi disaluka dyàkalwa pambidi pààbò. Ncyà bushùwà nè òvwa pa bwòbò. Kàbidi, bàakatùuka luuya. Bwòbò, bàakapàtuka buludì mu mìsèèsù; kàdi pààbò's, bàvwa nè bwòwà, nè bàvwa bakàngè biibi. Ki bòbò bàkaavwà mu mìsèèsù bàba; kàdi pààbò's bàvwa nè bwòwà bwà kasùmbù kàà bantu; bàkaavwa bàbàyiisha Èvànjeeliyò's! Ncyà bushùwà's. Nwamònu anyì? Cintu kampànda cívwa cyènzèke, bwalu Dìyì dilelèlèlè dyà mulayi dyàkashìndikiibwa.

⁸⁴ Mpindyewu twànjàayi kwimana kaaba aka bwà katanci kakesè. Aci piikalàci citwàdile bantu abu cintu cyà bushùwà cyà mùshindù awu, mu mùshindù wà nè bwòbò—bwòbò. . . Pàmwè nè yònsò wa kùdìbo wàkatwà citampì ku bujaadiki bwèndè nè mashi èndè. Cívwa mwà kubàlwila nànsha ciikàlè cinganyì, pàvwàbò ànu nè mwoyi, kacýàkabàshiyakù to. Cívwa cishààle ànukù, bwalu cívwa n'Dìyì dyà mulayi, dishindika. Dibùulula dyàkalwa dishindika. Nèнку bàakafwa, biikàlè bàtwa citampì ku bujaadiki bwòbò nè mashi àbò sungasunga.

⁸⁵ Mpindyewu tàngilàayaaku mulayi wà matùkù à ndekeelu awu. Kàdi's ntwètù aba tuwùmòna mùshindika kumpàlè kwètù mene, di—dilwa dyà Nyumà Mwímpè dyà mpindyewu nè byènzèdi bìvwàYe nè cyà kwenza abi, nèнку tudi tucimòna munkaci mwètù mene. Nwamònu anyì? Kaa, bìvwa bikèngela bwà twètù. . . Kaa, ekèlekèle! Mmunyì mutùdiku mwà kuumvwa's? Cintu kampànda cidi cyènzèka, ndi nkwambila's, mulundà wanyì! Mwena kwitabuuja wa cyà bushùwà, mulelèlèlè, wa meeji matòoke, mudyànjila kulongolola, pàdi ànu Bukènkè

abu bùlenga dimiinu adi, cintu kampàndà's cidi cibwayika too nè ku Mwoyi mupyamùpyà. Mukàjì mukesè wa ku ciinà cyà mâyi awu's!

⁸⁶ Kàdi pààbì's, baakwidi balongè tùlaasà abu bàvwa bambè nè: "Èè, awu's ndyabùlù. Mmwenà lubùkù. Yèyè's—yèyè's ùdi wènzela bantu abu lubùkù. Nè yèyè's—yèyè's ndyabùlù."

⁸⁷ Kàdi, pààbì's, mukàjì mukesè awu nè dimiinu didyànjila kulongolola adi! Mpindyewu nwènù nudi nwela meeji nè kî ncyà bushùwà anyi? Kàdi Yesù wàkamba nè: "Muntu nànsha umwe kèna mwà kulwa to, pàdi Taatù Wanyi kàyi mumukòke; nè bwònsò bàdi Taatù muMpèèshe nebàlwe." Nènku Yèyè. . .

⁸⁸ Nè mufwilakanyi nè Kilistò, ku matùkù à ndekeelu, neikalè mukùmbàne mwà. . . Nyumà mufwilakanyi nè Kilistò utùdi munkaci mwà kulonga, mu cyena-màngumba awu, nè bajaadike nè cyena-màngumba aci cidi mmufwilakanyi nè Kilistò aci. Mpindyewu, kupita apa, muntu kanà yònsò udi mufwànyine kuumuka apa kuya mùshindù awu awu, yèyè, kùdi cintu kampàndà cidi kaciyi cyènda bìmpè to, pìikalàye mutùngùnùke ànu nè kwitabuuja nè ndongolwelu wa cyena-màngumba kî mmufwilakanyi nè Kilistò nànsha. Pààbì's, kakùyì mpatà to mbijaadikiibwe, ku maalù-malonda, ku byònsò bìdiku, too nè mu Bible mujimà wa Nzambi nè bikwàbò byònsò nè, mmufwilakanyi nè Kilistò. Nè Loomò ngudi mfùmwaçi. Nè èkèleeziyà yìdi bânà bèndè bàà bakàjì ayi yìdi yènda yilonda paanyimà. Nè yèyè nè yôyi yònsò ayi neyèèdiibwè mu ifernò. Aci's ncyà bushùwà. Pa nànkù tudì tumòna cintu eci, mufwilakanyi nè Kilistò, nyumà waci awu.

⁸⁹ Kàdi ditùkù ditùdi nè mwoyi, nè, mòna's, s'bivwa bikèngela cyòci kutùtwàdila "disànkà dyà kadiyi kwamba nè dyùle tètè nè butùmbi." Mukàjì mukesè wa kale awu, cyòci aci ncyenzè ànu cimulenga anyi, ekèlèlèlee, dimiinu kàdi kubwayikadi's wè!

⁹⁰ Mpindyewu, nwavùlukaayi nè, Bible ùdi wàmba nè, mu ditùkù dyà ndekeelu, mufwilakanyi nè Kilistò ewu ùvwa mwà "kuseeswisha buloba bujimà."

⁹¹ Bàvwa mwà kwikala ànu bakesèè, beena mènà àdi mafùnda mu Mukàndà wà Mwoyi wà Mwànà wa mùkòòkò kumpalà kwà difùkà dyà dyulu nè buloba. Nè pàdi dishindika dilelèlè dyà Bulelèlè bubuulula bwà Dìyi dyà Nzambi adi dilenga mwoyi awu, yèyè neàdyèlè mu mâyi, nè àmùpàtùka nè Nyumà Mwímpè, ànu lùkàsà nè mwèndè mwònsò. Nè wèwè kwèna mwà kumupangishakù bwà kucyènza nànsha, bwalu Mwoyi mupyamùpyà awu mmukwàte mudimu.

⁹² Mvwa ngàakula nè muntu kampànda, àbidi àdi panshi aa, ùvwa ùteeta bwà kukòkangana naanyi, wàmba nè: "Wèwè kwènàku umvwa bundù bwà kwamba nè Nzambi wàkafùka maulu nè buloba mu matùkù àsàtù anyi?" Mèmè. . . Anyi nè, ". . . mu matùkù àsambòmbò anyi?"

Mémè nè: “Aci’s ncidi Bible mwâmbè.”

93 Yèyè nè: “Èè, twètù tudi nè cileeeji nè tudi mwà kujaadika nè buloba bùdikù kùkaadi miliyò yà bidimu.”

94 Mémè nè: “Aci kacivwa naaci nè dipetangana nànsha dikesè to. Mu Genèsè 1:1, mMwambè nè: ‘Ku cibangidilu Nzambi wàkafùka maulu nè buloba.’ Citùùdilu! Ki cyònsò cidiku, wamònu’s. ‘Mpindyewu buloba bùvwa kabùyì mbùngakeenu, nè munda mutupù.’” Ki mémè kwamba nè: “Mémè ndi ngiitabuujja nè dimiinu nè dimiinu dyònsò divwa disanganyiibwa ànu mwómò amu mene, dyùmukila ku dishidimuka kampànda dikwàbò anyi cintu kampànda. Nènku màyi mmenze ànu ùmuka, nè bukènkè bùdilenga, ke mici nè byònsò abi kutòlokabi.”

95 Nènku ncintu cìmwècìmwè aci nè muntu, ncifwànyikijilu. Pààkuumukà di—di—difwima dyònsò, nè Bulelèlà bubuulwila dimiinu dilelèlà divwa disanganyiibwà mwómò amu adi, dicitu ànu ditòlwesha, nè Bukènkè bwà Èvànjeeliyò bùdi mwà kudilenga ku dishindikiiibwa dilelèlà dyà Dìyi, nediiikalè nè mwoyi. Didi nè Mwoyi munda mwàdi. Nediitabuujè. Kakùyì aci to, kadyèna mwà kwikala nè mwoyi nànsha; kadyèna nè Mwoyi munda mwàdi to.

96 Mènà àvwà mafùndiibwe mu Mukànda wà Mwoyi wà Mwàna wa mùkòòkò kumpalà kwà difùkà dyà dyulu nè buloba awu, neàpatukè ànu byètù byà cyà bushùwà ebi. Nènku ke bwà cinyi Yesù mmusòmbe Mwaba awu mene mwindile mu mudimu Wèndè wa butwàngaji, too nè ku dimiinu dyà ndekeelu adi. Nè Yèyè neàmanye ànu menemene dībà dyàlengiibwàdi.

97 Mùvwà Docteur Lee Vayle...Ngèèla meeji nè ùcidi ànu mu disangisha emu mwaba kampànda. Kwènjì matùkù àndi nciyi mumumòne to. Ncyèna ngèèla meeji nè ndi mumumòne to. [Mwanèètù kampànda wa balùme ùdi wàmba nè: “Ùdipù.”—Muf.] Ùdipù. Èè, ùvwa muntùmìne kabèjì aka ditùkù adi, pa cidi Irénée mwâmbè. Èè, mémè mvwa mwangàte Irénée, kùkaadi ntàntà mule nè, yèyè nguvwa mwanjèlò wa cikondo ciwàye aci. Kàdi ùvwa mwâmbè nè: “Piikalà cidimba cyà ndekeelu cyà Mubidi aci cibwelè,” mu cikondo cyà ndekeelu eci, “bìbwa bikèngela bwà kwikalabì...cintu aci cìvwa mwà kwikala cibuuulùdiibwe pa dībà adi.” S’ki cyòci eci. Ncyà bushùwà menemene. Nwamònu anyi? Tudi mu dyòdi ditùkù adi. Èyo.

98 Dībà adi, bàà ku Mpenta abu bàvwa nè disànka diyè nè mwà nàka. Bàvwa basalùdiibwe cyà bushùwà. Ndi ngèèla meeji nè, ke mùdici cyèenza muntu kanà yònsò.

99 Twànjàayi kwangata ànu katanci kakesè cyanààna. Twànjàayibi kutùma meeji kùdi Davidi. Wà—wàkasaluka bikolè bè, yèyè pèndè. Wàkamba nè: “Lupànza lwànyì lùdi lùyiila nè panshì.” Ngèèla meeji nè ùvwa cyà bushùwà mupetè bwalu bwà—bwà bunène bwenzèke mu nsòmbelu wèndè.

Ncinyi—ncinyi cìvwà cimufikishe ku dyenza nàнку awu aci? Pàvwàye mu Nyumà. . . Bwalu, ùvwa mupròfetà. Tudi bamanyè nè ncìvwàye. Ke mùdì Bible mwàmbè. Mupròfetà Davidi, mpindyewu, bwalu ùvwa mupròfetà, nè ùvwa mu Nyumà, nè kumònayè dibiìshiiibwa dyà ku lufù. Nwènù baswè kucibala, cìdì mu Misambu 16:8 too nè ku 11. Kwambayè nè, “Kàbìdì mubìdì wànyì wàkavwijiibwa nè disànka. Ekèlekèle! Ndi—ndi ngiikisha mu ditèkemenà, bwalu Wèwè kwàkushiyà musùukà wànyì mu ifernò to; anyì Kwàkwitaba bwà Wa Cijila Webè àmònè dibola nànsha.” Nènku mèmè ndi nkwàmbila nè, lupànza lwèndè lwàkabanga kuyiila pànshì, bwalu wàkamòna. Nànsha byòbì nè cìvwà ncinyi; kaa, wàkamòna dibiìshiiibwa dyà ku lufù, nè yèyè wàkalwa ànu menemene. . . nè lupànza lwèndè lwàkayiiila pànshì.

¹⁰⁰ Kàbìdì, Davidi wàkapeta lukwàbò lupànza lwàkayiiila pànshì, mu Samwèlè Mwibìdì, (bu mùdìbì nè nudi nè crayons yènù ku byanza), Samwèlè Mwibìdì 6:14. Kùvwa kwenzèke cipòòlò cyà mushipu.

¹⁰¹ Bàvwa bangàte mushèètè wà cipugidi. Mwena lukunà ùvwa mulwè mwanagàte mushèètè wà cipungidi wà Mukalenge, nè bàvwa bayè naawù bakawùtèèke kumpàlà kwà Dagònà, kàdì Dagònà kupònayè mutwà mpala pànshì. Ki kuyabò naawù mu cimenga cikwàbò, kàdì bipùpù kubùdikabì. Cìvwà. . . Aci ke cìvwà cintu cyà citàmbe kwikala cyòsha pa byanza cìvwàbò kabàyiku banji kupeta kacya, kuntwaku. Nènku kabàvwakù nè mùshindù wà kuwùmusha to, bwalu kawùvwa mu mwaba wàwù to.

¹⁰² Mpindyewu, pàakawùtèèkàbo mu ditempu dìvwà ngombe yìkòka, bàakabanga kwalukila. Nènku Davidi pàakamònayè mushèètè wà cipungidi awu wùlwa, nudi bamanyè cyàkenzàye anyì? Wà—wàkalwa mùle tètè, nè lupànza lwèndè lwakabanga kuyiila pànshì; disaluka's! Pàakamònayè Díyì munkaci mwà kubuuludiibwa dyàlukila cyàkàbìdì mu Izàlèlèlè, wàkajà maja mu Nyumà, ùnyùnguluka, ùnyùnguluka, ùnyùnguluka, ùnyùnguluka, ùnyùnguluka mùshindù ewu. Èyowà. Lupànza lwèndè kubangalù kuyiila pànshì, nudi numòna's. Bwà cinyì? Wàkamòna Díyì munkaci mwà kwalukila.

¹⁰³ Nènku mèmè ndi ngèèla meeji nè aci ncifwànyine kufikisha muntu kanà yònsò ewu ku disalukaka ndambù pàdiye ùmòna, paanyimà pàà bidimu byònsò ebi; nè pashìishe Díyì dilelèlè, ku mulayì wà nè mmùvwàbì mwà kwenzeka, diikàlè ditwàdiibwa nè dìshindikiibwa. Cikondo kaayipu's wè! Cikondo kaayipu's wè!

¹⁰⁴ Mpindyewu tùbalàayaaku. Ndi—ndi nditwa mu dyakula, mu mùshindù wà nè ncyàkufika ku cyòci eci to, nè nènshaalè neenù bwònsò kaaba aka too nè pa dībà dīkūmi nè tusunsa makūmi àsàtū wa dilòòlò. Mvwa munùpàtūle kumpàlà kwà dībà makèlèlè dilòòlò, pa nàнку bivwa bikèngela bwà nnulamèku

ntàntà bule bukùmbàne dilòlò edi. [Disangisha didi dyamba nè: “Amen.”—Muf.] Èyowà. Èyowà. Bwàlà, mvwa nñusuuya pàanyi nànkù cyanààna. Nwamònu anyi? Ndi. . . Tudi baswè ànu bwà Mukalenge àtùlombòlè. Mpindyewu:

*Nè pàakamanàye kukàngula cìtampì ciinâyì,
ngàkumvwa diyì dyà cifukùbwà ciinâyì dyamba
nè: Lwá. . . ùmonè.*

¹⁰⁵ Mpindyewu: “Nè pàakamanà Mwànà wa mùkòòkò kukàngula Cìtampì Ciinâyì.” Twánjàayi kwimanapù mpindyewu. Cìtampì Ciinâyì, mpindyewu, Nganyi wàkaCikàngula? Mwànà wa mùkòòkò. Muntu mukwàbò kanà yònsò ùvwa mukùmbànyìne anyi? Muntu mukwàbò nànsha umwe kàvwakù mwà kucyènzà to. To. Mwànà wa mùkòòkò ngwàkakàngula Cìtampì Ciinâyì.

¹⁰⁶ Nènkù Cifukùbwà ci—ciinâyì, Cifukùbwà cìdì nè mwoyi cifwànàngàne nè nyuunyi wa mukankù aci, kwambilaci Yone nè: “Lwá, ùmonè cìdì bwalu busokoka bwà ndongamu wa bupikudi, bùdì busokoka mu Mukàndà ewu abu,” bwalu Mwànà wa mùkòòkò ùvwa ùWùkàngula. Mu ngaakwilù mukwàbò, cyòci aci ke cìvwàci cyamba. “Kùdì bwalu busokoka bwinâyì kaaba aka. Mémè ngàakuleeji, mu cimfwànyì. Mpindyewu, Yone, ncyèna mumanyè ní udi uCùmvmwa, anyi to.” Kàdì, kufundayè cyàkamònàye aci, kàdì cìvwa bwalu busokoka. Pa nànkù, kufundayè cyàkamònàye aci.

¹⁰⁷ Mwànà wa mùkòòkò ùvwa ùlamuna Bitampì abi, kàdì Nzambì kàvwa ànu wànji kuCìbuulula. Cìvwa cishiya bwà matùkù à ndekeelu. Nwamònu anyi? Mpindyewu, tudì bapetè bimfwànyì, nè twètù kwenzapù bukebìkebi, nè babwènzè bwà bwìmpè menemene míngà misangu, nwamònu’s. Kàdì tudì bamanyè nè nCìtùngùnùke ànu nè kuya. Kàdì mpindyewu, mu matùkù à ndekeelu, tudì mwà kutàngila paanyimà kumòna nè mwaba wùvwàCi. Nè mbimanya nè cyòci aci ncìvwà nè cyà kwenjiibwa, ciinè aci, ku ndekeelu kwà cikondo cyà èkèleeziyà, pabwìpì menemene nè Dyambwibwa.

¹⁰⁸ Mùdìku muntu mwà kwamba nè Èkèleeziyà neàpicilè mu Dikènga dinène, mémè ncyèna mumanyèku to. Kàdì mbwà cinyi bùdìYekù mwà kupìcila mu Dikènga dinène, pàdìYe kàyi nè—kàyi nè mpèkaatù? Ndi njinga kwamba. . . Ùndì njinga kwamba kí ng’èkèleeziyà nànsha; èkèleeziyà yèyè neàpicilè mu Dikènga dinène. Kàdì ùndì ngamba m’Mukàji-musèla. Mukàji-musèla, to, Yèyè kèna nè mpèkaatù wa kuMubanda nendè to, nànsha kakesè. Ukaadi mumana kutòokesha, nè kakwènakù nànsha mene—mene. . . Kakwènakù nànsha mene kaamupùùyà kààci to, nè kantu nànsha kàmwè kashààle. Bwòbò mbapwàngàne, kumpàlà kwà Nzambì. Pa nànkù Dikènga dinène ndyà kubàkezula ku cinyi? Kàdì bwà bakwàbò abu kaayi nebàpicilèmu. Èkèleeziyà

yêyè neàpicilè mu Dikènga dinène, kàdi kí m'Mukàji-musèla nànsha.

¹⁰⁹ Mpindyewu, mpindyewu tuvwa bacyängàte ànu mu mîshindù yònsò yà bimfwànyì mpindyewu. Bu mùdi è—èkèleeziyà, Noà, cifwànyikijilu cyà bààkalaminyiibwà abu, kutùngunuka nè kuya kabwela mu mpèkaatù. Nwamònu's, mpindyewu, bàakaya cyà bushùwà luseke lukwàbò. Kàdi, Henòkà wàkaya kumpàla, aci cívwa cifwànyikijilu cyà bansantu bàvwà mwà kubwela, kumpàlâ kwà cipungu cyà Dikènga dinène.

Mpindyewu tudi tusangana nè, Mwànà wa mùkòòkò ewu ngwàkakàngula Cítampì aci.

¹¹⁰ Mpindyewu, Cifùkiibwà cyà kumpàla citwàsanganyì, bu nwènù mwà kumòna's, Cifùkiibwà cyà kumpàla citwàsanganyì, cívwa. . . Cifùkiibwà cyà kumpàla cívwa nyama wa ntambwe, Cifùkiibwà cìdì nè mwoyi; twàsanganyì aci mu mukàndà wà bitamp- . . . wà bikondo byà èkèleeziyà. Nè pashiishe Cifùkiibwà ciibìdì, ngèèla meeji, cívwa nè—nè mpàla wa ngombe, anyì wa mwànà wa ngombe. Nè Cifùkiibwà ciisátù cívwa nè mpàla wa muntu. Kàdi Cifùkiibwà ciinâyì cívwa nè mpàla wa nyuunyi wa mukankù. Mpindyewu awu ke menemene mùshindù wutùdì babìpetè, bilondangana ànu menemene mùshindù awu. Nènku ke mùshindù awu menemene wùdìbì bitèèkiibwe mu Mukàndà awu kaaba aka.

¹¹¹ Nènku musangu awu bu mulongeshi munène kampàndà, musangu kampànda mu Floride, ùlongesha, wàmba nè—nè. . . nè: “Mukàndà wà Byenzedi wùvwa ànu ciimanyinu cyà—cyà biibaki cyanààna bwà—bwà Èkèleeziyà. Èkèleeziyà ùvwa ùsanganyiibwa mu Èvànjeeliyò yinaayi.”

¹¹² Kàdi tudi tusangana, anyì bikùdimukila ku cyôci aci nè, Èvànjeeliyò yinaayi ayi nyidì yilamà Mukàndà wà Byenzedi. Nkwangacila ku Èvànjeeliyò yinaayi ayi kùdì Mukàndà wà Byenzedi mufundiiibwe, byenzedi byà Nyumà Mwîmpè mu bàpostòlò. Nè tudi tusangana, lwà mu Mukàndà awu amu nè, balami abu bàvwà basòmbe mwaba awu biikàle bàtàngila; esètè, nord, wesètè, nè sud. Nudi bavùlùke mutùvwà bacizòle kaaba aka amu anyi? Nè mùshindù mwìnè mulenga nè mupwàngàne wùvwà kantu nè kantu kwònsò ànu kàlenga kiipàcilâ kàakù's wè!

¹¹³ Mpindyewu ndi muswè bwà nwènù kumòna. Mmwàmbè nè: “Lwà ùmonè.” Yone. . . Mpindyewu ndi muswè bwà nwènù kumòna kàbìdì, kumpàlâ kwà eci nùnkù. Mpindyewu, ewu nùnkù ke wa ndekeelu wa ku babàndì bàà pa túbàlù, bwà kubuulula mudimu mukwàta kùdì mufwilakanyì nè Kilistò.

Mààlabà dilòlòlò, netùlengè misùukà yidì mwìnshì mwà choshelu.

Dilòlòlò dyàlondà, manyooka.

114 Dilòlò dyàlondà, dyumuka kuya, dyà—dyà ndekeelu wa cikondo, ndekeelu wa cikondo, dyà bintu byònsò, nwamònu's, pambwibwàYe. Ki bwà cinyi, ànu mu Citampì cyà Mwandamutekètè menemene amu, mmùdi dipòngolola dyà Mpànzà, nè bikwàbò byònsò bidi bipòngolodiibwa. Cidibi, mèmè ncyéna mumanyè to.

115 Mònaayi's. Kàdi mpindyewu, pa cyòci eci, tudi tusangana nè muntu ewu kaaba aka ùdi nyuunyi wa mukankù, muntu ewu udi. . . anyi Cifùkiibwà cidi nè mwoyi cidi cipòngòlòdiibwe kaaba aka eci. Anyi, mu ngaakwilù mukwàbò, kùdi bikondo byàCi bishìilàngàne binàayi. Kùvwa cikondo kampànda cyà nyàCi wa ntambwe. Nè, tudi tujandula nè, eci ncikondo ciinayi.

116 Nè yéyè wákamba nè: “Lwá ùmonè bwalu busokoka bwinayi bwà Mukàndà wà Bupikudi, bùdi busokoka mu Mukàndà ewu. Lwá, ùmonè.” Ke Yone kuyayè bwà kumòna, è kumònayè kàbalù kàà cisengàsengà. Nè, kàbìdi, mubàndi wa pa kàbalù ànu yéyè umwèumwè awu pa kàbalù kàà cisengàsengà aka.

117 Mpindyewu ùdi nè dìnà dibìikidiibwa nè n'Lufù. Mpindyewu mònaayi's, mukwàbò mubàndi wa pa kàbalù nànsha umwe, kakwàbò kàbalù nànsha kàmwè, anyi kacya musangu nànsha wùmwè wùkaadiku mubàndi wa pa kàbalù ewu mubànde pa kàbalù, kabàvwakù nè, muntu awu kàvwakù nè dìnà nànsha dimwè to, kàdi mpindyewu nyàwù ùkaadi ùbìikidiibwa nè n'Lufù. Kí mbacitèejèkù to. Nwamònu anyi? Nyàwù ùbuuludiibwa mpindyewu. Cidiye ndufù.

118 Èè, mùshindù mwinè wutùdi bafwànyine kushààla pa cyòci aci ntàntà mule bwà diyiisha, nè kucivwija citòoke tòò's wè! Kàdi cintu kanà cyònsò cidiku cifwilakanyi eci, cidi cibènganganà nè cidi cyà bushùwà, cidi nè cyà kwikala lufù. Bwalu, kùdi bintu ànu bibidi, bidi, Mwoyi nè lufù. Nènku aci cidi cijaadika nè dibuulula dyà cyòci eci dyà Nyumà Mwimpè, mu ditùkù edi, m'Bulelèlè menemene. Mufwilakanyi, yéyè ùdi lufù. Bwalu, Dìyi, mutwàmònà pashìshe kaaba aka, didi Mwoyi. Nwamònu anyi?

119 Kàdi muntu ewu yéyè ùdi ùbìikidiibwa nè n'Lufù. Mpindyewu, kabàvwakù bacitèèje mikwàbò misangu ayi to, bwà yéyè mubàndi wa pa kabalù ewu. Kàdi, kubangila ànu apu, mpindyewu mbacitèèle nè, yéyè ùdi ùbìikidiibwa nè n'Lufù.

120 Kàdi mu dibuulula dyà nyama wa ntambwe. . . Mpindyewu tàngilàayi. Mpindyewu ndi muswè kubala cyòci eci nè ntèmà, bwà mèmè kwikalakù mutwishìibwe; ndi mufunde kàmwè kaaba, kàndi mwimànyine kaaba aka. Mu, kabiyi mu dibuulula dyà cikondo cyà nyama wa ntambwe, anyi cyà cikondo cyà kumpàla, cikondo cyà ku ntwàdijilu to, Eci kacivwa cibuulula to. Cikondo civwà cilondèle civwa ncikondo cyà ngombe, cidi cikondo cyà mîdimà aci, bikondo byà pankaci, kacivwa cibuulùdiibwe mùvwàCi nànsha. Nànsha mene Cifùkiibwà cyà

cifwàngàngà nè muntu, cyà lungènyi, cìvwa cileeja balongolodi, Luther nè Wesley nè bakwàbò awu, KaCìvwa cibuułùdiibwe to. Kàdi mu cikondo cyà nyuunyi wa mukankù, cikondo cyà ndekeelu, cikondo cyà cipròfeta, mùdibi bikèngela bwà kujuukakù dipàtula dyà díyi dyà cipròfeta amu, nwamònu's, udi maalú masokoka àlwa kùdiye awu's! Mpindyewu, pòpò apu ke patùdì ànu . . .

¹²¹ Netwikalè mwà kushààla pa cyòci aci katanci kakesè, dilòòlò edi, bwà nwáfikakù ku dyumvwa kantu nè kantu. Mpindyewu, mu misangu yàbùngì, nutu nufika ku dyumva nè, ebi. . . Ncyèna ngàmbara ànu kasumbù aka nkààyakù to. Mikàbà yà mèyi eyi yiyaaya myaba yònsò, nwamònu's, nènku ndi nè cyà kucitòokasha. Bwalu, muntu kampànda neàpetè mukàbà wà mèyi wùmwe, nè pashiishe, yèyè kàyì mupetè mikwàbò ayi to, neikalè nè meeji mapampàlamùke, nwamònu's. Nzambi mmulayè Cyòci eci, nwamònu's, bwà ditùkù edi, bwà dyà ndekeelu, dijikija dyà bintu byònsò bishiiłèshiiłàngàne bitù bitungùnùke nè bibwejàkàjiiibwe ebi. Twètù tudi . . .

¹²² Tudi bapetè bivwàlù byà Eliyà. Tudi bapetè mìzàbì yà Eliyà. Kaa, kùukaadikù bantu bàdì. . . John Alexander Dowie mmujiikiiibwe kuntu kwàka, mujingila mu—mu mùzàbì kampànda. Úvwa wàmba mùvwàye Elishà. Nènku tudi bapetè bintu byà mìshindù yònsò byà bwena abi's. Ke binganyi biinè abi's, twamb'eku twamb'eku? Abi's bìdi ànu bwà kukèeka Bulelèlè bwikalà mwà kuleejiiibwa abu. Nwamònu anyi? Bwòbò's bàvwa nè baakilistò bàà mafi kumpàlà kwà cikondo cyà Yesù. Nwamònu anyi? Bàtu misangu yònsò ànu bènza mùshindù awu. Cintu's n'Satààna awu, udi wendesha cintu citentula, bwà kubindulula meeji nè diitabuuya dyà bantu, kumpàlà kwà cintu cyà dyà bushùwà kwenzekaci. Ki cyònsò cìdiku ncyòci aci.

¹²³ Gàmaalièlè kàakambilakù beena Yudà cintu cìmwècimwè aci mu ditùkù adi anyi? Wàkamba nè: “Kakwàkajuukakù muntu, wàmba mùvwàye Cikampànda anyi? Nè kuyabò nè bantu nkàmà yinaayi mu cipèèlè. Kubùtukabò, nè bikwàbò byònsò.”

¹²⁴ Yèyè wàkamba nè: “Ditàmba dyònsò didi Taatù Wanyi wa mu Dyulu kàyì mukùne,” mwàkambà Yesù, “nedijoomonyiibwè.”

¹²⁵ Gàmaalièlè kwambayè nè: “Bàlekèlaayi. Bwòbò biikàle, cyòci kaciyi cyà Nzambi to, kacyakuvwijiiibwa nè ncyà cyanààna anyi? Kàdi cyòci cyà Nzambi, nenùsanganyiiibwè nulwishangana nè Nzambi.” Muntu awu wàkakwàta mudimu nè lungènyi. Úvwa mulongeshi.

¹²⁶ Mpindyewu mònaayi's. Mpindyewu, bwà kutwà cishindaayi ku maalú masokoka wònsò aa, Nzambi mmulayè nè kùvwa mwà kujuuka Elishà mushùwashùwàlè, muntu kampànda mulaaba nè Nyumà awu, nènku úvwa mwà kubuulula. Mmucilayè mu Maalàkì 4. Kàdi ndi nè tubèjì nè mikànda mimfùndila byàmba nè kabyèna nànkù to, kàdi ndi muswè kuyiikilangana nè muntu

awu. Nwamònu anyi? Mòna's, kwéna mwà kucivilakù to. Mwena tèlòlòjì wa cyà bushùwà nè mwimpè ewu, mmumanyè nè aci cidi nè cyà kwikala Bulelèlà, nè mbabwíndile.

¹²⁷ Kàdi nebiikalè ànu mùshindù wùm wèwùm wè wàkalwilàbi ku Yonè awu, mudyànjididi wa musangu wà kumpàlà wà Kilistò. Mòna's, bwòbò kabààkamujingulula to, bwalu kùvwa bintu binène bitàmbe bìvwà byamba mu cipròfeta bwèndè yèyè. Mòna's, bìvwà bikèngela bwà “kwenzayè bwà myaba mitùmbùke yònsò yìlwe mipwekè, nè myaba mipwekè yònsò yìlwe mitùmbùke, myaba yònsò yà bimpòkòmpòkò yìlwe milàndàkàne.” Nènku, kaa, yèyè. . . Bapròfeta: Yeshàayi, bidimu nkàmà mwandamutekètè nè dikùmi nè bibidi kumpàlà kwà dilediibwa dyèndè; nè Maalàki, bidimu nkàmà yinaayi kumpàla kwà kubwelayè mu cyalu; bwònsò abu bààkamba bipròfeta bwèndè yèyè. Kàdi bwòbò bàvwa batekèmène bwà kajila kampànda kàa mu Dyulu kàtuuludiibwè, nènkù mupròfeta ewu àpatukè buludì nè dikombo dyèndè ku cyanza, ùfùmina kùdi Nzambi.

¹²⁸ Kàdi cyàkenzekà ncinyi? Muntu unùdi. . . uvwa kàyiku nànsha mwà kuleeja kartà kàa buumambàlà to. Kàyiku mwà kuleeja mikànda yà dijaadikiibwa naayi to. Ushààdila yèyè ànu mu cipèèlà; kàyì nànsha mene nè dilonga dyà kàlaasà kèètù kashààdile aka to. Tudi bayiilè, kùdi bafundì bàà maalumalonda nè, wàkuumuka kuya mu cipèèlà pàcìvwàye nè bidimu citèemà, paanyimà pàa lufù lwà tatwèndè nè mamwèndè. Nènku wàkakolela muntwamu. . . Wèndè mudimu wùvwa wà musinga mutàmbe bunène, bwà kubwelakana nè sèminèrè kampànda. Bùvwàye—bùvwàye naabù mbwà kumanyisha bwalu bwà Maasiyà.

¹²⁹ Nzambi kàvwakù mwà kukwàta mudimu nè muntu mupàya yèyè yònsò nè tèlòlòjì nànsha. Kèna mwà kwenzakù aci to, bwalu awu misangu yònsò neikalè ànu wàlukilakù. Ke wèndè njila udiyè ùlonda mu kuyiila kwèndè nyèyè awu. Ùdi wàlukila ku cyòci aci. Pa nànkù, pàdiye ùkèba kumòna cintu kampànda, ùdi ùteeta kwalukila ku civwà balongeshi bèndè bambè. Mbipiciibwe nè wèwè mudisàke kule nè bintu abi, kàdi kwitabuuja ànu Nzambi cyanàànà.

¹³⁰ Kàdi tudi tusangana nè bààkamupita ku luseke. Nànsha mene bàpostòlò bàvwà biimàne mwaba awu, bààkamupita ku luseke. Mòna's, bààkamba nè: “Bwà cinyi Mufundù wùdi wàmba, bafundì's, bàmba nè Eliyà. . .”

¹³¹ KwambaYè nè: “Èè, ùkaadi mumanè kulwa, kàdi nwènu kanwàkamumanya to.”

¹³² Nènku mwaba awu ke wùndì ncìfwànyikijangana nè dibìishiibwa dyà ku lufù, anyi Dyambwibwa. Nediikalè dimanè kupita, kàdi bwòbò nebiikalè. . . Ndi mumanyè nè aci cidi cìmwèka cyà mùshindù wà pawàci. Kàdi pàmwàpa

nenùtambèku kumanya kakesè ndambù paanyimà pàà dilòòlò edi, bu Mukalenge mwà kwanyisha, ànu mwikalàbi mwà kwikala cyanààna, nwamònu's. Neciikalè cyà mu musokoko menemene, mu mùshindù wà nè muntu nànsha umwe kàakucimanyakù to, byà bipeepele nunku. Bàà pa buloba nebèlè ànu meeji, nebàtungunukè ànu nè kwenda kuya mùtùbo bènza misangu yònsò amu, nwamònu's, kàdi ànu. . . Mùshindù awu ke wùtùYe ùcyènza misangu yònsò.

¹³³ Nudi bamanyè's, mémè ndi ngèèla mpatà bwà umwe—umwe. . . Ndi ngàmba nè, cyà makùmi citèèma cimwè pa lukàmà cyà bantu pa buloba, ní cyàkamanyakù nè Yesù Kilistò ùvwapù pàakalwàYe pánwapa apu's. Nudi bamanyè, pàakambà Eliyà cipròfetà aci apu, mémè's ndi ngèèla mpatà nè kuvwakù muntu kampànda mumanyè nè yèyè ùvwa. . . Bàvwa bamanè nè kuvwa muntu kampànda wa cimfiikààmùndà kuntwaku, mukùlumpe mukoleshi kampànda wa maalu, kàdi biikàle bamukine. Bushùwà. Ùvwa cìvwàbo bwòbò bàbiikila nè mmuntu wa wèndè mùshindù awu.

¹³⁴ Nènku ndi ngèèla meeji nè, mwena Kilistò mulediibwe cyàkàbìdi kanà yònsò ewu ùdi mu mùshindù kampànda muntu wa wèndè mùshindù, bwà—bwà bàà pa buloba, bwalu wèwè udi mùshintùlùke. Udi wa ku buloba bukwàbò. Webè Nyumà mmufùmine dyàmwàmwà dyà cipòngòpòngò aci. Nè cintu cidi apa eci ncintu cinyangakaja mu mùshindù wà nè, wèwè kùyì—wèwè kùyì mùshintùlùke to, kùdi cintu kampànda cidi kaciyi cyènda bimpè to; wèwè, wèwè ucicidi ànu mutàmbe kuswikakana nè buloba. Bìvwa bikèngela wèwè kwikala nè meeji matùma ku Dyulu. Nè Dyulu didi nè mwoyi ku Dìyi.

¹³⁵ Mpindyewu, tudi tusangana nè cintu cinène eci—eci ncyenzèke. Mpindyewu, tudi twitabuuja nè kùdi nè cyà kwikala dilwa dyà Nyumà mulelèlè wa Elishà. Mbidyànjala kwamba nè cìvwa mwà kwikalakù, nwamònu's. Nènku tudi nè cyà kuvùluka nè neciikalèku, mu movù nè cikondo cyàci sungasunga. Tudi pàmwàpa munkaci mwà kucitèèkela bishimikidi mpindyewu's. Nè kaciyèna. . . kaciyàkwikalakù bulongolodi nànsha.

¹³⁶ Ndi—ndi mbènga kupetangana ku mèyi nè mulundà wanyi mwîmpè kampànda, pa cyòci aci. Ùdi yèyè wàmba nè neciikalè kasumbù kàà bantu. Ndikù muswè bwà ùndeejè aci ku Mifùndu. Nzambì, Nzambì utu kàyì ùshintuiluka awu, kàcya Yèyè kàtukù ùshintulula ndongamu Yèndè nànsha. Yèyè ùshintuluka, dìbà adi Kèna Nzambì nànsha; aci's ncyà bushùwà, bwalu Yèyè ngwa cìfwàkà, nè mMumanyè ànu mùndi mémè mumanyè emu, nè Udi wènza bilèma.

¹³⁷ Kacya Nzambì kàtu mwanji kushintulula ndongamu Wèndè to, kacya ànu ku cikondo ciinè aci mu budimi bwà Edènà. Wàkenza ndongamu wa bupikudi; cìvwa m'Mashi. Kàdi twètù tudi bateetètèète dilonga dyà tulaasà. Tudi bateetètèète

cimbàmbilà. Tudi bateetètètèe dilonga dyà nsòmbelu. Tudi bateetètètèe cyena-màngumba. Tudi bateetètètèe bintu byònsò, bwà kusàka bantu bònsò ku didisanga, anyì ku dinangangana bantu bònsò, nè bikwàbò bònsò. Kakwèa mwaba mukwàbò wà bwobùmwe to ànu mwinshì mwà Mashì, too nè mpindyewu, mwaba wùmwepele wùdiku Nzambì ùsangila nè muntu.

¹³⁸ Nzambì misangu yònsò ùtu ànu ùkwàta mudimu nè muntu-nkààya. Bantu bàbìdì bàdì nè mmwènu yìbìdì. Kacya kakùtukù kwanjì kwikala bapròfeta banène bàbìdì pa buloba nànsha, bàmba cipròfeta musangu wùmwewùmwe awu. Elàayibi mèsù paanyimà nùmonè ní bàvwakù's. To, mukalenge. Bàdì bàtamba kwelakana! Bikèngela Àpetè muntu umwèpele mudilekèlèle ànu menemene, bwà kukwàta mudimu nè muntu awu. Ùdi ùkebangana nè muntu awu's.

¹³⁹ Kàdì nekwikalè umwèpele, musangu kampànda, muntu kampànda wìkala mwà kuMutèeleja, ku Dìyì nè ku Dìyì. Nànsha muntu mukwàbò ní nganyi wàmba, yèyè kàakuKùumukakù to. Aci's ncyà bushùwà. Neikalè mwindile EMU MMÜDÌ MUKALENGÈ WÀMBA. Nènku, dìbà adi, yèyè kàakunyungakù to ànu nè pààmupetàye. Yèyè neikalè mushindikìibwe mu mùshindù mukùmbànàngane. Wèwè newikalè. . .

¹⁴⁰ Mpindyewu, bantu bàà pambèlu nebàcìkinè, kàdì Dimiinu disungula, Dimiinu didyànjlà kusungula, mwàkadibi mu matukù à Yesù, pàateemà Bukènkè abu, Dimiinu adi nedilwe ku Mwoyi mùshindù *ewu*. [Mwanèètù Branham ùdi ùtuuta cishòntò—Muf.] Bwòbò nebàBùjingùlùlè. NebàBùmvwè. Kabyàkukèngela bwà wèwè kwambaPù bwalu to.

¹⁴¹ Mukàjì awu kwambayè nè: “Mukalenge, ndi njingulula nè Wèwè ewu udi Mupròfeta. Ndi mèmè mumanyè nè pàalwà Maasiyà, mbimanya nè Yèyè. . .”

Yèyè kwamba nè: “Mèmè's ki Yèyè awu.”

¹⁴² Balùmyànà, aci, aci's cìvwa cikùmbàne. Kabyàkakèngela bwà yèyè kujànguluka bufùkù bujimà abu nànsha, nè kujànguluka bufùkù bùvwà bùlondà. WàkaCipeta ànu apu mene. Wàkakwàta njila kuya. Wàkabanga kubàmbilaCi.

¹⁴³ Mpindyewu vùlukàayi, mpindyewu, mu cikondo cyà kumpàla cìvwa ncikondo cyà nyama wa ntambwe. Ùvwa n'Ntambwe wa cisàmbà cyà Yudà, Kilistò. Bwenzeji bwà nsòmbelu Wèndè Sungasunga, bwàkangata cikondo aci. Ke *Cifùkùibwà* cyà kumpàla ncyòci aci, udi umvwija “Bukolè,” wàkandamuna nè dìyì dyà muntu awu.

¹⁴⁴ Cikondo cyàkalondà cìvwa ncikondo cyà ngombe, anyì cikondo cyà mubàndì wa pa kàbalù kafìike. Nwamònu anyì?

¹⁴⁵ Mpindyewu, cìvwà cyenzè nè cikondo eci cìikalè cikondo citòoke, cìvwa mbwà. . . Ànu—ànu mùnkaadiku mumvùmve misangu yònsò bantu bàmba nè mubàndì wa pa kàbalù wa

kumpàla awu, kàà katòòke aku, cìvwa mbukolè bwà èkèleeziyà, muyè bwà kukwàtangana ku bukòòkeshi. Nènku tudi tujandula nè bààkamupèèsha cifulu cyà butùmbi, nè cìvwa ncyôci aci. Cìvwa ng'èkèleeziyà. Cìvwa ng'èkèleeziyà, kàdi kwàkayàye nkwépi? S'wàkaya ku Loomò. S'ki kwàkayàye. S'wàkapeta cifulu cyèndè cyà butùmbi.

146 Mpindyewu, cikondo ciibìdi cìvwa—cìvwa mmubàndi wa pa kàbalù kakúnze, cìvwà cikondo cyà mídima aci.

147 Nènku mpindyewu—mpindyewu, ci—cikondo cyàkalondà, cìvwa mm—mmuntu, cìvwà cikondo cìvwà mubàndi wa pa kàbalù kafiike. Nè yéyè awu úvwa cikondo cyà balongolodi, nwamònu's, mùvwà Dìyì dyà—dyàkaakulà adi. Mpindyewu, mubàndi wa pa kàbalù kafiike awu, úvwa mmufwilakanyi nè Kilstò. Kàdi Ewu uvwa wakula mu cyôci cikondo aci awu úvwa muleejìbwe bu muntu, nè cyôci aci ndungènyi, wà meeji matwè, wa budimù. Nwamònu anyi? Nènku kí mbacyúmfwè to, nwamònu's. Kabàvwa babiiikile... Kabàvwa bamwinyike dîna to. Nwamònu anyi? Bààkamba ànu nè kààkapàtuka.

148 Kàdi mpindyewu, pàdi cikondo cyà nyuunyi wa mukankù cilwa, cyôci aci ke cidi... Nzambi útú misangu yònsò úfwànyikija baprófetà Bèndè ànu nè nyuunyi yà mikankù. Údi údibiiikila Mukankù Yéyè mwinè's. Mukankù wùtu wùbànda muulu menemene, mùdi cintu nànsha cìmwè kaciyìku mwà kuwùlenga nànsha. Kabiyi ànu nè wòwò wùtu muulu mwàmwa to, kàdi mmwibaka bwà wòwò mwaba awu. Pàdiwu wùfika muulu amu, wùdi mwà kumòna mwaba wùdiwu awu. Bàmwè bantu bàtu bàkafika muulu amu kàdi kabàyi mwà kumòna nè bàdi penyì to, pa nànkú kabiyi nè dikwàcisha bwà kukafika muulu amu nànsha. Kàdi wèwè... .

149 Kàdi cikòlolò cididìngèbi ànu citeetè bwà kubùuka pàmwè nè mukankù, anyi kabemba, eci anyi eci, s'ncifwànyine kusùnsuluka's. Bikèngela cìikalè cyenjiibwe bwà kumanya mwà kulama dicìncimikiibwa dyà lupeepèlè bwà kùyaayàci.

150 Ke lutàtù lùdiku leelù ndwòlù alu, bàmwè bàà kutùdi kabèena bàfika ku dimanya dyà mwà kulama dicìncimikiibwa dyà lupeepèlè to. Tudi tutaayika ànu nè lùkàsà lwònsò, nudi numòna's, patùdi tutùpika apu. Nènku, kàdi, bikèngela bwà tùfikè ku dimanya dyà mwà kulama dicìncimikiibwa dyà lupeepèlè.

151 Paùdi ukafika muulu mwàmwa nè mwikàle nè lumònò lutwè lwà mukankù bwà kumòna bìdi bilwa, nè kumanya cyà dyanza... Mpindyewu, cikondo cyà nyuunyi wa mukankù nciCibuulùle. Mpindyewu tudi bajandulè nè, cikondo cyà nyuunyi wa mukankù aci cìvwa cilayìbwe mu Bwàkabuulwibwà 10:7 nè mu Maalàki...:1, 4. Aci's cìvwa mwà kwikala mu matùkù à ndekeelu, nwamònu's, ncyà bushùwà nè, cìvwa mwà kwikalakù. Eyo. Mònaayi.

152 Mpindyewu, mulũmyànà ewu, tudi tujandula nè mmubànde pa kàbalù kàà cisengàsengà. Kàà cisengàsengà! Kaa, ekèlekèle! Paanyimà, mònaayi paanyimà. . .

153 “Beena Mishònyì mìliyô makùmi àsambòmbò nè mwandamukùlù,” mutwácyǎngàci mu—mu mukànda wà *Dilongolola dyà Butùmbi* wà Schmucker, pa—pa dishebeyiibwa bwà diitabuuja kùdì Loomò, makèèlèlâ dilòòlò awu. Tudi basangàne nè, too nè ku cimanyinu cyà 1500, ngèèla meeji nè mmùvwàbi, anyì cyà dikùmi nè mwandamukùl—. . . Ncyèna muvùlùke ànu menemene mpindyewu to. Kàdi bàvwa mìliyô makùmi àsambòmbò nè mwandamukùlù bàakashebeyiibwà, bwà ditontolola dyà èkèleeziyà wa kumpàla wa Loomò, Loomò. Kabiyì bikèmesha to, ùvwa mwà kudifwànyikija yèyè mwinè mu dìnà difwànyikija dyà. . . nè kubìikidiibwa nè n’Lufù. S’ki civwàye cyà bushùwà.

154 Mpindyewu, ànu Nzambì nkààyendè ngudi mumanyè bùngì bwà bàakashebeyàye mu nyumà, ku dilongesha dyèndè dyà dibèngangana nè Bible, dibèngangana nè Diyì adi’s! Aba mbàakashebeyàye mìliyô makùmi àsambòmbò nè mwandamukùlù ku mwelè wà mvità, mubàshebèye. Kàdi pàmwàpa, byà cyà bushùwà ebi, mìliyaalà mbafwè mu nyumà, ku dilongesha dyèndè dyà mashimi adi. Kabyèna bikèmesha to mwàkangatàye dìnà dyà Lufù’s!

155 Nudi bamòne mubàndi wa pa kàbalù awu anyì? Dyàmbedi, bu mufwilakanyi nè Kilistò, ùvwa lufù, ànu kwine kwónso aku; kàdi ùvwa kàyì nè bubì bwenza to mwinè musangu awu. Pashiishe kupetayè cifulu cyà butùmbi, cyà ntòndo yisàtù; nè pàakacipetàye, dībà adi kusangayè, Sataànà kusangayè èkèleeziyà wendè nè mbùlâmàtadi, bwalu yèyù nguvwa kumutù kwà byònsò bibidì abi piine apu. Mufwilakanyi nè Kilistò ùvwa n’Sataànà, mu mmwènekèlu wa muntu.

156 Nèku pashiishe, kàbidì, Maatàayi Munsantu, ngèèla meeji nè nyèyè, nshapità mwi4, ùdi ùtwàmbila aci—aci. Sataànà wàkabàndisha Yesù, Mukalenge wetù, kuulu, è kuMuleejayè makalenge à pa buloba, wònsò, mu katanci kakesè, nè butùmbi bwàwù, kuMutèekelayèwu kumpàlà. Ke yèyè kwamba. . . Àvwa, àvwa èndè yèyè.

157 Pa nàнку, nudi numòna’s, dībà adi, yèyè mwà kusanga mbùlâmàtadi wendè nè èkèleeziyà wendè awu pàmwè, dībà adi mubàndi wa pa kàbalù kakùnze awu’s mmufwàyiine kwendela pa kàbalù aku, ànu byètù byà cyà bushùwà ebi. Nwamònu anyì? Bulelèlè’s! Mpindyewu, dībà adi, tudi tujandula bwalu busokoka bwèndè kaaba aka, mu èkèleeziyà wendè nè mbùlâmàtadi.

158 Citùpà ciinâyì cyà mudimu wèndè wà bwambi, ùdi ùbìikidiibwa nè nnyama wa lwonji. Dyàmbedi ùdi ùbìikidiibwa nè mmufwilakanyi nè Kilistò, nwamònu’s; pashiishe ùdi ùbìikidiibwa nè mmupròfetà wa mashimi; nè ùdi ùbìikidiibwa

nè nnyama wa lwonji. Mpindyewu tudi tumusangana apa ùbìkidiibwa nè nnyama wa lwonji. Mpindyewu, ndi muswè bwà nwênù kumòna nè, apu mpaanyimà pàà kàbalù kiinâyì.

¹⁵⁹ Nènku mu kàbalù kiinâyì aka, bu nwênù mwà kumòna, twònsò... Kàà kumpàla kàvwa katòòke; nè pashiishe kàvwa kalondèle kàvwa kakünze; nè pashiishe kàvwa kalondèle kàvwa kafìike; nè kiinâyì, tukwàbò twònsò tùsàtù etu tùvwa tuleejìibwe mu kwòkò aka; bwalu, cisengàsengà ndiikala dikünze disambakaja nè—nè ditòòke, nènku ewu, bisambakaja pàmwè. Nwamònu anyì? Yèyè... Tùvwa—tùvwa twònsò tusambakaja mu kabalù kàmwèpelè aka. Nwamònu anyì? Nènku ke yèyè awu mulwè bànaayi, anyì, bulelèlè menemene, bàsàtù abu mu umwèpelè. Nènku bìvwa byònsò bisambakaja mu cintu cimwèpelè.

¹⁶⁰ Mpindyewu ndi muswè bwà nùmonè bànaayi abu. Mònaayi cimanyinu cidì citèèka ku luseke aci, cyà ìnaayi, cyà mu makùmì à nyumà. Nzambì ùtu mu isàtù. Eyi nyinaayi. Yèyè ùdi mu ìnaayi, kaaba aka's. Dyàmbedi, mufwilakanyi nè Kilistò, katòòke; mwibìdi, mupròfetà wa mashimi, kakünze; mwisàtù, mupinganyi wa maulu nè buloba nè—nè mpùrgàtoriyò, kafìike; mwìnâyì, nyama wa lwonji, kàbalù kàà cisengàsengà, Sàtäänà mwipata mu Dyulu. Nudi baswè kubala aci anyì? Bwàkabuulwibwà 12:13, Sàtaanà mwipata mu Dyulu. Pashiishe mu Bwàkabuulwibwà 13:1, 8, mmwandàmùke mubidi mu mupersonà wa nyama wa lwonji.

¹⁶¹ Dyàmbedi yèyè ùdi mufwilakanyi nè Kilistò, ànu—ànu dilongesha cyanàànà bàdibìikila nè ncyena-Nikalàwù; pashiishe ùlwa, kùmukila ku aci, kùya ku mupròfetà wa mashimi. Pìikalàbi nè yèyè mmufwilakanyi nè Kilistò, mufwilakanyi nè Kilistò ùdi *ùbèngangana*. Cintu kanà cyònsò cidì cibèngangana nè Dìyì dyà Nzambì cidì cibèngangana nè Nzambì, bwalu Dìyì dìdi Nzambì. “Ku cibangidilu kwàkadi Dìyì, nè Dìyì dyàkadi nè Nzambì, nè Dìyì dyàkavwijiibwa mubidi, Kilistò, nè dyàkasombela munkaci mwètù.” Nènku mpindyewu yèyè ùdi ùbèngangana nè Dìyì, pa nàнку yèyè's mmufwilakanyi nè Kilistò. Kàdi nyumà kèna mwà kwashiibwa cifulu cyà butùmbi to; ke bwà cinyì kàakapeta cifulu cyà butùmbi to. Ànu nè butà bwà mikete cyanàànà, kàbùyi nè mikete to.

¹⁶² Nè pashiishe pàakalwàye, cikondo cyà dyashiibwa dyà cifulu cyà butùmbi aci, dìbà adi kulwàye mupròfetà wa mashimi wa dilongesha dyèndè dyà mufwilakanyi nè Kilistò adi. Nwacyùmvù anyì? Pashiishe ùdi ùpeta mwelè wà mvità, bwalu ùdi ùsanga makòlè èndè awu pàmwè, dìbà adi kabyèna bikèngela bwà kukonkayè muntu kampànda nànsha umwe to. Yèyè ngudi nguvènà wa mbùlámàtadì; yèyè ngudi nguvènà wa Dyulu. Ùdi ùpeta cifulu cyà butùmbi cyà ntòndo yìsàtù. Ùdi ùdyènzela yèyè mwìnè cingènyingenyi cyà cidìbo bàbìikila nè “mpùrgàtoriyò.” Cyà nè, bu—bu bàmwè bàà kùdìbo mwà

kwikala bafwè muntwamu, nè bwôbò nè mfranga, baswè kufuta bwà kubàpàtwishamù, yéyè úvwa mwà kusambila nè kubàpàtwishamù. Mbwalu, yéyè údi nè bukòlè bwà kwenza nànkù; yéyè m’*mupinganyi*. Ncyà bushùwà nè, ke cidiye. “Údi wàngata kaaba kàà Nzambì, pa buloba.” Aci cyòci kaciyi citòòke mùdi cintu kanà cyònsò to!

¹⁶³ Tudi tucisangana, tutùngunuka naaci, tucìpicishila mu Bible, nè twenza makùmì à nombà yèndè nè bikwàbò byònsò. S’ki yéyè ewu. . . ? . . . apa mene mu nombà inaayi, kí mmu nombà isàtù to. Nombà inaayi, nwamònu’s.

¹⁶⁴ Mpindyewu tùbuululààyaaku, mu Bwàkabuulwibwà 12. Tùbalàayi ànu eci kakesè cyanàànà, bwalu tudi—netwikalè nè dībà dyà kucibala. Nènku tùbuululàayi Bwàkabuulwibwà nshapità wa—wa 12 ku mvensà wa 13. “Nè pa dībà òmwèdimwè adi kwàkenzeka dizakala dinène dyà buloba. . .” To, ndi mwangàte—ndi mwangàte mwaba wùdi kawùyi wòwò to. Mvensà wa 13:

Nè pààkamòna dragon nè wàkiipaciibwa nè kwediibwa pa buloba, wàkakèngesha mukàji wàkalela mwànà wa balùme awu.

¹⁶⁵ Mpindyewu, nudi numòna’s, wàkiipaciibwa, kwediibwa pa buloba, nè wàkandamuka mubidi, mùvwa nyumà mufwilakanyi nè Kilistò mwandàmùke mubidi mu muntu amu. Muntu awu údi ùshintuluka ùmuka ku cintu kampànda ùya ku cikwàbò, ùmuka ku nyumà mufwilakanyi nè Kilistò ùya ku mupròfetà wa mashimi, nè pashìishe nyama wa lwonji ùbwela munda mwèndè.

¹⁶⁶ Ànu menemene mùdi Èkèleeziyà ùkola’s; wèndè èkèleeziyà mmuyè kuumuka ku—kuumuka ku mufwilakanyi nè Kilistò kuya ku mupròfetà wa mashimi, nè, mu cikondo cinènè cilwalwà, nyama wa lwonji wíkala nè cyà kuujuuka awu. Pa nànkù, Èkèleeziyà údi ùlwa mùshindù wùmwèwùmwè awu, ùpicila ku dibingishiibwa, dijidiibwa, nè dibàtiiza dyà Nyumà Mwìmpè, n’Kilistò munda mwà bantu, ànu menemene. Nè yéyè údi nè mubidi wà cintu wà Yéyè awu kwàka, mu. . . nwamònu’s, cifwànyikijilu cyà Yéyè awu’s wè, èyowà. S’ki yéyè awu, ànu menemene’s. Kì yéyè awu’s. Mmwipàciibwe mu Dyulu.

¹⁶⁷ Mpindyewu tudi tusangana, mu Bwàkabuulwibwà 13:1 to nè ku 8.

Nè ngàkiimana pa nsenga yà mbù, nè ngàkamòna nyama wa lwonji ùjuuka. . .

¹⁶⁸ Mpindyewu, kí 12 nyéyè ewu, mwàkiipaciibwàye amu. Mpindyewu tàngilàayi.

. . . ngàkamòna nyama wa lwonji ùjuuka ùpàtuka mu mbù, mwikàle nè mitù mwandamutekètè nè nsèngù dikùmi, nè pa nsèngù yèndè dikùmi ayi apu bifulu

*byà butùmbi dikùmi, nè pa mutù wèndè apu dínà dyà
kupenda naadi Nzambi.*

*Nè nyama wa lwonji úngàakamòná awu ùwva
mufwànàngáne nè nyama wa nkàshààmá, nè makàsá
èndè. . .*

169 Kaa, bu nè tuvwakù ànu nè díbà mpindyewu, tuvwa bafwànyine kwangata dilòòlò dijimà edi, ànu pa bimfwànyì abi nkààyaabi, nè kuleeja, kuya naabi cyàkàbidì buludì kùdiye. Yònsò, pàmwè nè bwònsò bàà kunùdì mbamanyè cyòci aci, babimanyine ku màleesòná makwàbò.

*. . . àwva . . . makàsá à nyama wa ours, nè mukana
mwèndè. . . mukana mwà nyama wa ntambwe: nè
dragon wàkamupèèsha bukolè bwèndè, . . . nkwasá,
nè . . . bukòòkeshi bwèndè.*

170 Huh! Sàtaanà mwandamùke mubidi's! Nwamònu anyi?

*Nè ngàkamòna wùmwe wà ku mitù yèndè bu nè
wùwva . . . mutàpa mpùta wa lufù; . . .*

171 Ànu nàнку too nè kwínshì, patùdì twenda tuya apu, nwènu baswè, panwàpetà mùshindù wà kutùngunuka nè kubala too nè kwínshì. To, twànjàayi—twànjàayi kubala ànu kakesè ndambù.

*Nè ngàkamòna wùmwe wà ku mitù yèndè bu nè
wùwva bu mutàpa mpùtá . . . lufù; kàdi mpùtá wèndè
wa lufù awu wàkondopiibwa: nè bàà pa buloba bujimá
bààkakèma paanyimá pàà nyama wa lwonji awu.*

172 Tàngilàayi ànu cyanàànà! Kanwikadikù nutàngila communismè nànsha. Awu ùdi ànu cyamù cyà mudimu cyanàànà, cikwàta mudimu mu byanza byà Nzambi, bwà kunwàmbulwisha nwènu dínghà ditùkù, bwà kwenza “busombwedi bwà mashi,” mutwàcyàngatá mààlabà dilòòlò. Nwamònu anyi?

Nè bààkakuukwila dragon . . .

173 Dragon awu ùwva nganyi? Sataànà. Mmwômò anyi? “Dragon mukúnze.” Eyo.

*. . . wàkapèèsha nyama wa lwonji bukolè awu (kùdiye
ùpetela bukolè bwèndè abu, nwamònu's): nè bóbò
bààkakuukwila nyama wa lwonji awu, bàmba nè:
Nganyi udikù bu nyama wa lwonji? nganyi udikù mwá
kumwenza mvitá?*

*Nè wàkapèèshiiibwa mukana mùvwá mwàkulá
bintu binène byà kupenda naabi Nzambi; nè bukolè
bwàkamupèèshiiibwa bwà kutùngunukayè munda mwá
ngondo makùmi ànaayi nè yìbidì.*

*Nè yéyè wàkatùbula mukana mwèndè bwà kwambayè
mèyi à bipendu à dilwisha naawù Nzambi, (Ki bwalu
mbwòbù abu's, nwamònu's. Eyo.) . . . bwà kupenda dínà*

dyèndè, (mumupèèshe mwânzù's) . . . ntentà wèndè (udi mwaba wà cisòmbedi cyà Nyumà Mwimpè awu), . . .

174 Bwà kucìvwija mwaba wà mu Loomò, Cimenga cyà Vatican. Nudi mwà kutungunuka too nè kwìnshi:

. . . nè aba bàdì basòmbèle mu dyulu.

175 Kubàpendayè, ùbàmba mùvwàbo baakwidyanganyi.

Nè wàkapèèshiiibwa bwà kwenzayè bansantu mvità (nè yèyè wàkacyènta), nè kubàtambayè bukòlè (wàkacyènta): . . .

176 Kubòòshilayè ku dikunji dyà dyoshilanganakù! Kubèèlelayè nyama yà ntamwe! Nè kubàshebeyayè mùshindù wònsò nàka wùvwàyèkù mwà kubàshebeya awu!

. . . ne bukòlè bwàkamupèèbwa kumutù kwà bifuku byònsò, . . . ndìmi, ne matungà.

177 Kacya kabìvwakù byanjì kwenzeka mùshindù awu mu Loomò to kumpàlà kwà Loomò wa cimpàngaanù awu kukùdimunayè mucimà kulwa Loomò wa ciipaapà, nè bukòlè bwà èkèleeziyà wa Kàtòlikè kutangalakabù pa buloba bujimà, kuvwijabù èkèleeziyà wa Kàtòlikè wa buloba bujimà.

Nè bònsò bàdì basòmbèle pa buloba nebàmukuulwilè, beena mènà àvwà kàyi mafùnda mu mukàndà . . .

178 “Kùlengi Maanyì Àànyì nè mvinyò nànsha!” Nwamònu anyì?

Nè bwònsò bàdì basòmbèle pa buloba nebàmukuukwilè, beena mènà àvwà kàyi mafùnda mu mukàndà wà mwoyi wà Mwànà wa mukòòkò mushebeya kacya ku difùkà dyà dyulu nè buloba.

Muntu kanà yònsò udi nè macì awu, ùmvwè.

Ewu udi ubwejangana mu bupika neàbwele mu bupika: ewu udi ushebeyangana nè mwelè wà mvità ùdi nè cyà kushebeyiibwa nè mwelè wà mvità. Apa ke pàdì lutùlù nè . . . diitabuuja dyà basantu.

179 Mpindyewu, twàmumònu ùlwa, makèlèlè dilòòlò, mwikàle nè mwelè wèndè munènè wà mvità awu, bwà kushebeyanganayè.

180 Tudi tujandula nè, yèyè ùdi ùshipiibwa nè mwelè wà mvità yèyè pèndè, mwelè wà mvità wà Dìyì. Dìyì dyà Nzambì, mmwelè wà mvità musàkisha, wà nseke yìbìdi awu, wùdi wùmushebeya, wùmubyànkula paanshi mbyànkù. Indilaayi too nè pàapàtulà Mikungulu Mwandangamutekètè ayi mèyì Ààyi kùdì kasùmbù kàà aba bàdì cyà bushùwà mwà kwangata Dìyì dyà Nzambì nè kuDikwàta mwaba awu, neDikosololè tutùpà tutùpà nè nedikosè. Nè bwòbò bàdì mwà kukànga mau. Bàdì mwà kukànga cikampànda, anyì kwenza cikansanga, cyònsò cìdìbo baswè kukànga aci. Butùmbi's wè! Yèyè's neàshebeyiibwè ku Dìyì dìdì dipàtukà mukana Mwèndè, dìdì ditwè kutàmba mwelè wà mvità wà nseke yìbìdi. Mbafwànyine kubiikila njiiji búngi

bwà kilô millyaalà lukàmà bwôbò baswè kucyènza. Amen. Cyònsò cidibo bamba aci, neciikalè mwà kwenzeka, bwalu Cidi Dìyi dyà Nzambi didi dipàtukà mukana mwà Nzambi. Èyowà's. Amen. Nzambi, misangu yònsò, Citu ànu Dìyi Dyèndè, kàdi Yèyè ùtu misangu yònsò ànu ùkwàta mudimù nè muntu bwà kuDifikisha ku dyenza mudimu.

¹⁸¹ Nzambi's ùvwa ànu kwikala mubiikile njiji ayi, mu Èjjiipitù mwàmwa, kàdi Wàkamba nè: "Mòsà, awu mudimu ngwèbè wèwè. Mèmè ngwàkwambila ànu cyà wèwè kwenza, pèèbè uya kacyènza." Wàkenza cyòci aci mu kaabujimà. Nwamònu anyi? Yèyè's—Yèyè's ùvwa ànu mwà kwikala musungùle bwà—bwà dîbà kuyibiikiladi, Ùvwa ànu mwà kwikala mwambile ngondo bwà kuyibiikilayè, anyi bwà lupepèlè kuyibiikilalù. Kàdi, Yèyè—Yèyè wàkamba nè: "Mòsà." Aci—aci's... Yèyè ùtu ùsungula muntu. Èyo.

¹⁸² Mpindyewu tudi tusjandula apa nè, Sàtaanà ewu, paanyimà pàà yèyè mumanè kwipaciibwa mu Dyulu, ùdi ùdyandamuna mubidi mu nyama wa lwonji. Nènku mpindyewu yèyè ùdi nyama wa lwonji; mufwilakanyi nè Kilistò, mupròfètà wa mashimi, nè mpindyewu nyama wa lwonji. Nè mmupèèshibwe dìnà nè n'Lufù! Nè Ìfernò ùdi ùmulonda! Sataànà mu kaabujimà, pa nkwasà wèndè wa butùmbi! Kaa, ekelekèle! Pa buloba, yèyè ùdi Sataànà, mwènàmpalà, pa buloba, bu mùdiye mpindyewu mfùmù wa makalenge à pa buloba, makalenge miinè àmwèàmwè àkatèèkelàye Mukalengè Yesù kumpàla mu Maataàyi 4 awu. Sataànà patùdi twakulangana apa ngudi ulwa mfùmù mu kaabujimà.

¹⁸³ Mpindyewu, eci necyènzekè pashiishe. Yèyè mmupròfètà wa mashimi mpindyewu. Nealwe nyama wa lwonji, pàanyimà pàà cikondo kampànda, pàanyangakajàye cipungidi cyèndè nè beena Yudà kuntwaku. Nudi bamanyè mutùvwà... Èyo, mònaayi mpindyewu, neapèèshibwè mwoyi wà nyama wa lwonji, pa dîbà adi, nè Sataànà neàdyàndàmùnè mubidi. Bwalu, pàdi Èkèleeziyà ùbànda, Sataànà ùdi wipaciibwa. Nwamònu anyi? Nwamònu anyi? Kwàjiki, dîbà adi, cidi, difùndangana dyèndè dyònsò didi dyumba dijika. Nwamònu anyi? Mpindyewu, pàcidibi ànu... .

¹⁸⁴ Tàngilàayi, pàcìcìdi ànu Mwakwidyanganyi pa Nkwasa wa butùmbi, Sataànà ùdi mwà kwimana mwaba awu nè kufùndangana, bwalu yèyè ki mulumbulwidyanganyi wa bàà luseke lukwàbò alu. Yèyè mmulwishì wa Kilistò. Nè Kilistò ùdi... . Mmwimàne mwaba awu, mu—mu—mulwishì mmwimàne mwaba awu, wàmba nè: "Kàdi, imànà! Adàmà's wàkadishinda! Adàmà's wàkenza *cikampànda*! Mèmè's ngàkamukwàta ku bukòokeshi bwanyi. S'ngàkafikisha mukàjèndè ku diitabuuja mashimi. Nè Wèwè ewu's wàkamba nè yèyè ùvwa mwà kupiishibwa bwà cyòci aci. Mèmè's nyàwù ngèdi kàmwè's!"

¹⁸⁵ Kàdi's ke Mwakwidyanganyi nyèwù mwimàne mwaba awu,

amen, Cilongo Cipikudi, amen, mwimàne mwaba awu nè Mashi àdi mwà kwangata mwoyi wà ngènzàmpèkààtù wa mutàmbe kubùipa awu nè kuwùshintulula. Mwakwidyanganyi ùdi pa Nkwasa wa butùmbi. Èyowà's, mukalenge.

Satàànà wàmbi nè: “Kàdi yèyè's mmupiile!”

Yèyè ùdi mwà kwamba nè: “To.”

¹⁸⁶ Javel awu wàkapeteka, anyi wàkenjiibwa, mbwà kuumusha dikeji, kuumusha diikala dyà màyi à mufundu anyi dikeji dikwàbò kanà dyònsò. Bàdi nendè. Nedidyengùlùle mu mùshindù wà kùciyikù mwà kudipeta kàbìdì nànsha. Nedyàlukilè ku ma-gaz, nè dyàlukila too nè ku bukènkè bwà mu cibwàshibwàshì. Nè nedipitè tusùnsukilà nè bikwàbò byònsò, too nè mwàlukilàdi ku muji kwàkafùmàdi. Mbufùki. Dìvwa nè. . . Bufùki, cìvwa nè cyà kwikala cìfùme kùdì Mufùki kampàndà. Kàdi bintu byònsò byà mùshindà bìvwà bikwàtakaja nè bisanga pàmwe abi, bìdì bipanduluka, nèku ke cyònsò cidìku bwàbì byòbì. Kabìcyènakù kàbìdì to. Nànsha mene byà màyi biinè—biinè abi, bìdì bisambakanangana nè Javel, mwine udi butù awu.

¹⁸⁷ Amen! Butùmbi kùdì Nzambì's wè! Byònsò abi mbisukula. Ke cidì Mashi à Yesù Kilistò ènzela mwànà mulelèlà wa Nzambì ewu aci's, pàdiye ùtonda mpèkaatù awu nè wìmana mwaba awu, mubingìshìibwe mu Lwèndè. . . Luse's wè! Nzambì wanyì! Bìdì mene bilenga byà dikèma mu mùshindù wà nè Nzambì mmwambè nè: “Ncyèna nànsha mene mwà kucìvùluka kàbìdì to. Nè yèyè kakùyì mpatà to mmwan'Àanyi wa balùme.”

¹⁸⁸ “Bulelèlà, Ndi nzwàmbila nè, wèwè mwambile mukùnà ewu nè: “Tentèmukà,” nè wèwè kùyì wela mpatà mu mwoyi wèbè to, kàdi witabuuja nè ciwàmbi aci necyènzekè, udi mwà kupeta ciwàmbi nè cìvwa mwà kwenzeka aci.” Wèwè's udi mwànà wa balùme mupikula. Amen! Mémè ndi mumanyè nè aci ncilelèlà.

¹⁸⁹ Mémè nkàadi mumòne nshindì yìmwènèka kuntu kwàka, misangu mishìilàngàne kí mmìngì kí mmìngì yisambòmbò, yìndìku mémè mumanyè, nè ànu mùdìbì nè nànsha umwe kí mmusòmbe mwaba ewu emu. Yèyè ùdi ànu. . . Yèyè ùdi mwà kufùka nshindì mùshindù ànu wùmwèwùmwè wùdìYe mwà kufùka njijì awu, anyi ndìmbà, anyi cintu cikwàbò kanà cyònsò. Yèyè—Yèyè ùdi Nzambì, Mufùki. Cyà bushùwà! Nè pàdì muntu wa cìfwàkà nànsha umwe. . .

¹⁹⁰ Kàdi pàdì mpèkaatu wa muntu wa cìfwàkà awu mutonda nè mumacisha mu Javel awu, wa bwanga butòokeshi bwà Yesù Kilistò abu, Ùdi ùtòokèsha mpèkaatù yònsò awu. Yèyè ùdi mukezùke kàyì musopakaja, kàyì mpèkaatù, kàyì kalèma to. “Ewu udi mulela kùdì Nzambì kàtu wènza mpèkaatù to, bwalu kèna mwà kwenza mpèkaatù to.” Bwanga butòokeshi bùdì búsanganyibwa pankacì pèndè nè Nzambì. Mmunyì mùdìyekù mwà kukafika nè kwìnè aku, pàdìbu bùmúsunsulula

nè bumwaluja buludi too nè kùdi ewu wakacinyangakaja awu's!
Amen!

¹⁹¹ Yoyöyò! Ngǔmvù bwena Nzambì bwàmbwedi. Ndi—ndi nnwàmbila's, ndi ngumvwa masaluka mpindyewu pàdi cyòci eci cibanga kubuuludiibwa apa.

¹⁹² Mònaayi, Sataànà mu kaabujimà, pa nkwasà wendè wa butùmbi. Eyowà's, mukalenge. Wàkaswa kumupèèsha Nzambì, wàkaswa kumupèèsha Mukalenge wetù. S'ki yéyè ewu, musòmbe kaaba aka, mwikàle nè mwoyi wendè wà nyama awu munda mwendè. Mpindyewu, s'ki muntu awu nyéyè ewu, nyama wa lwonji, dyabùlù mwandàmùke mubidi awu. Ùdi ùdìmwènesha pa buloba apa, nè didicinkila dyà mafi adi. Kaa, ekèlekèle, Nzambì wanyì! Nè didicinkila dyà mafi dyà mùdiye nè Dìyì dilelèlè, ùdi ùdiswikakaja yéyè mwinè nè Dìyì.

¹⁹³ Mmwenze ànu menemene cintu cìmwècìmwè cyàkenzà cifwànyikiji cyèndè—cyèndè aci, cìvwà Yudaàsà, kùkaadi bidimu binunu bibìdì. Cyàkenzàye ncinyì? Yudaàsà wàkabwela, bu mwena kwitabuujà, pèndè mwikàle démon kacya ànu ku cibangidilu aku. “Ùvwa mulela mwànà wa dibùtuka.” Kàvwa nè cìvwàye mwà kwenza bwà kukùtakaja Yesù nànsha, bwalu Yéyè ùvwa mumumanyè kacya ku cibangidilu; amen, bwalu Yéyè ùvwa Dìyì. Eyo. Nènku, vùlukaàyi nè, Yudaàsà wàkangata kaaba kàà mulami wa cibùcilu, nè wàkadishindila ku mfrangà.

¹⁹⁴ Ke mùdì kàbìdì èkèleeziyà wa leelù wènza! Èkèleeziyà wa Kàtòlikè, mutwámònu makèlèlè dilòòlò awu, ùtwilangana mishinga ya bijila byà matùkù citèemà, ùtwilangana mishinga ya masambila, nè ùtwilangana mishinga ya byònsò. S'cìdì ànu bu cintu cìmwècìmwè aci, nè mudìshindile ku cintu cìmwècìmwè aci bwà bânà bàà bakàjì bàà èkèleeziyà wa Kàtòlikè, bàvwà beena Mishònyì abu. Cintu mu kaabujimà ncikùta mu mfrangà. Ke kwàkadishindilà Yudaàsà nkòkò aku, nè kaaba aka ke kààkadishindilayè nkòkò aku, nè kwòkù aku ke kùdi beena Mishònyì bàdìshindila.

¹⁹⁵ Tagilàayi, mmubànde pa kàbalù kàà cisengàsengà pàdiye ùmwènèka pa dyendela dyèndè dyà pa kàbalù, dyendela dyà pa kàbalù dyà ndekeelu edi. Mmubànde pa kèndè kàà ndekeelu mpindyewu. Mpindyewu, adi kì nditùkù dyètù edi to. Aci necyènzèkè pashiishe. N'Citampì aci, cidyanjila kwamba. Bwalu, nwamònu's, Èkèleeziyà ùkaadi mumanè kubànda pìikalàla eci mwà kwenzeka. Pààmwènèkà Kilistò pa buloba apa, pàdi—pàdi—pàdi... Mulùmyànà ewu ùdi ùmwènèka, nè ùlwa dyabùlù menemene, menemene; kuumukila ku mufwìlakanyi nè Kilistò, too nè ku ndekeelu, ùpìcila ku mupròfetà wa mashimi, pashiishe ùbwela mu nyama wa lwonji, dyabùlù yéyè mwinè. Nènku mmubànde pa kàbalù kàà cisengàsengà, kàà meekala wònsò, nè masambakaja nè meekala

à mishindù yònsò, bwà kukàvwija kàà cisengàsengà nè diikala dyà dileeja lufù.

¹⁹⁶ Kàdi pààmwènekà Mukalenge wetù pa buloba apa, Yéyè neikalè mubànde pa kàbalù katòòke bu nējè. Nè Yéyè neikalè ànu menemene, mu kaabujimà, Èmanùwèlè awu, Diyì dyà Nzambì dyandàmùke mubidi mu Muntu. Nwamònu anyi? Ànu awu ke mùshindù wùdibo bashiilàngàne munkaci mwàbò. Ke dishiilangana didiku munkaci mwàbò ndyòdi adi.

¹⁹⁷ Mònaayi nè, mufwilakanyi nè Kilstò ùdi yéyè pa kàbalù kàà cisengàsengà, meekala masambakaja. Kàbalù nnyama udi uleeja bukolè kampànda. Bukolè bwàkù mbusambakaja bwònsò. Bwà cinyi? Kàdi cidiidi, kàdi—kàdi makolè à ditunga, kàdi makolè à ntèdeleelu, kàdi makolè à démon. Kàdi makolè à mishindù yònsò masanga pàmwè, kàvwa nkàbalù kàà meekala masanga, kàà cisengàsengà. Yéyè ùdi nè makolè à mishindù yònsò.

¹⁹⁸ Kàdi pààlwà Yesù, mpa kàbalù kàà diikala òmwèpelè dilamàkànàngàne, Diyì. Amen!

¹⁹⁹ Ewu yéyè ùdi ùsambakaja meekala èndè, dyà dikünze, ditòòke, difiike; meekala àsàtù èza òmwèpelè, maleejìbwe mu òmwèpelè. Nènku makolè àsàtù maleejìbwe mu òmwèpelè; kàbalù katòòke, kàbalù kafike, kàbalù kakünze. Nè bifulu byà butùmbi bisàtù, mu òmwèpelè. Nwamònu anyi? Bushùwà.

²⁰⁰ Mvwa mudimwène cifulu cyà butùmbi aci, mémè mwinè; mwimàne, kaa, pabwìpì mùshindù ewu ke mémè kucitàngila. Kabàvwa baswè bwà mémè kufikakù to, bwà lumwènu, pa cyòci. Pa nàнку ke cyòci aci mwaba awu, cikùvù cinène cyelakù, citèeka mu kashèètè: cifulu cyà butùmbi cyà ntòndo yisàtù. Pa nàнку ndi mumanyè nè mbulelèlè. Uh-huh. Pa nàнку, ke yéyè awu mwaba awu's, cifulu cyà butùmbi cyà ntòndo yisàtù, mupinganyi: Dyulu, mpùrgàtoriyò, nè buloba.

²⁰¹ Makolè àsàtù masanga pàmwè, nwamònu's, wònsò masambakaja mu diikala, dyà cisengàsengà. Lufù lwakula mu cintu cyònsò nkòong; makolè à cidiidi, nè—nè à ntèdeleelu, nè—nè à démon, masanga pàmwè. Cidiidi, yéyè's ke mfùmù wa cidiidi, Sàtaanà's. Wa meeji matwè! Yoyòyò! Bushùwà. Kùdìdingi wàteeta kumudimukila to. Ikàlà wèwè ànu—ànu mweyèmène Mukalenge. Kwàjiki.

²⁰² Byònsò ebi, ànu mùnkaadi mubikenkète kumpàla amu. Wa meeji matwè bikolè, malonga à tùlaasà nè bintu byà mùshindù awu, bifùmìne ku luseke lubì. Bilondèshaayi ànu mu Mifundu, nùsanganè ní ncyà bushùwà. Londèshaayi bânà bàà Kaayinà nùmonè cyàkalwàbo. Pashiishe londèshaayi bânà bàà Setè, nùmonè ciwàbo. Kì nnè ndi ntwa dipanga nyama ku mikòlò to, nànsha kakesè. Bwàlà's, mukalenge. Kàdi angàtaayi bantu kanà bwònsò, pàmwè nè bwònsò, bàà mu Bible abu, mpùùkàpùuka menemene . . .

203 Kàdi kùdi umwèpelè dyèndè m’Pòlò, uvwa muntu wa meeji matwè, kàdi wàkamba nè byàkakèngela bwà kupwàyè mwoyi byònsò bìvwàyè mumanyè, bwà kumanyayè Kilistò. Wàkamba nè: “Kacya ncyàkalwàku kunùdì nè méyi à àkòkangana ntèmà à lungènyi lwà bantu nànsha, kàdi ngàkalwa kunùdì mu Bukolè bwà dibìkà dyà ku lufù dyà Kilistò.” Aci’s ncyà bushùwà, Bukolè bwà Nyumà Mwîmpè’s!

204 Tàngilàayi bakwàbò abu. Bàmwè bàà kùdìbò kabàvwakù nànsha mene bamanyè nè cyanza cyà dyàbalùme ncyèpi nè cyà dyàbakàji ncyèpi to. Nè—nè, kaa, tàngilàayaaku mu cikondo cyà baprófetà, nè kùvwàbò bwòbò bàfùmìna, nè bikwàbò. Nudi bamòne cìndì njinga kwamba aci anyi?

205 Nwamònu’s, cìdi mmeeji matwè, mamanya à mu mitù, nè lungènyi. Lungènyi kàdi’s ke cintu mene cìdi cikusàka kule nè Nzambi.

206 Yèyè ùvwa nè makolè àsàtù, anyi—anyi myaba yìsàtù yà bukòòkeshi: buloba, Dyulu, nè mpùrgàtoriyò.

207 Ùdi, yèyè mwinè, búsàtù. Ke cìdiye mwenza naaci ncyòci aci. Nè yèyè ùdi wèndela pa kàbalù mu búsàtù. Bukolè bwèndè bùdi mu búsàtù. Cifulu cyèndè cyà butùmbi cìdi mu búsàtù. Kàbalù kèndè kàdi mu búsàtù. Ke cìdiye ncyòci aci, búsàtù; bukolè bwà búsàtù, cifulu cyà butùmbi cyà búsàtù, kàbalù (dyèndela dyà pa kàbalù) kàà búsàtù; aci’s mbwà midimu yèndè, ìnaayi cyàkàbìdì, nwamònu’s, ìnaayi cyàkàbìdì. Èyo.

208 Bitùpà bisàtù byà mudimu wèndè wà bwambi, bìmuvwija mupèrsonà umwèpelè, Sàtaanà mwandàmùke mubidi. Bitùpà bisàtù byà mudimu wà bwamb- . . . mufwilakanyi nè Kilistò, muprófetà wa mashimi, nè nyama wa lwonji. Bisàtù abi, bileeja mu cifwànyikijilu, nwamònu’s. Mpindyewu kùdi bifwànyikijilu bisàtù, mpindyewu, ke bìdi bìmwenzà mbyòbi abi.

209 Nzambi, Nzambi ùdi ùDìmanyisha, kàbìdì, mu mâyi, Mashi, Nyumà; cìvwija mwena Kilistò mwànà wa Nzambi, ku Dìyi dyà Nzambi. Nwamònu anyi? Nè makolè àsàtù aa àdi àmuvwija yèyè démon. Nwamònu anyi? Kaa, Eci kaaba aka, cìdi mâyi, Mashi, nè Nyumà, bìdì byà kùdì Nzambi abi. Nènku aci’s ncidìdì, ntèndeleelu, nè bukolè bwà démon, bisambakaja pàmwè, ke bìdì bìmuvwija dyabùlù.

210 Dilwa dyà kumpàlà dyà Kilistò, wa cifwàkà. Yèyè ùdi ùlwa misangu yìsàtù. Kilistò ùdi mu isàtù. Nwamònu anyi? (Tàngilàayi mùdiye yèyè ùlwa; yèyè ùdi ìnaayi ayi.) Tàngilàayi Kilistò. Dilwa dyà kumpàlà, Wàkalwa wa cifwàkà, bwà kwela mashi pànshì nè kufwà. Mmwòmò anyi? Adi ndilwa Dyèndè dyà kumpàlà. Dilwa diibìdì n’Dyambwibwa; tudi tukatwilangana Nèndè mu mauulu, wa kàyì mwà kufwà to. Dilwa Dyèndè diisàtù, Ùdi Nzambi mwandàmùke mubidi. Amen! Nzambi, Èmanùwèlè, bwà kukòòkeshi pa buloba’s! Ncyà bushùwà, ànu isàtù.

211 Mpindyewu, citùpà ciinâyì cyà mubàndi wa pa kàbalù awu, tàngilàayi. Citùpà ciinâyì cyà mubàndi wa pa kàbalù ewu cidi cìbìikidiibwa nè n’Lufù. *Lufù* mbwena kwamba nè “ditàpuluka dyà Cyendèlèlè nè Nzambi.” Aci ke cidi lufù luumvwija, kwikala mutàpùlùke Cyendèlèlè nè Nzambi.

212 Mpindyewu, piikalàbi nè tudi beelè mulùmyànà ewu patòòke, nwènù kàlaasà, piikalàbi nè tudi baleejile ku Bible nè mulùmyànà awu nganyì, nè tudi mene bangàte tukùnà atu, mwaba mene nè myaba yònsò, basùnsùle ànu menemene, too nè ku ndekeelu. Nènku mpindyewu, yéyè mmubiikidiibwe, kùdi mukankù nè, “Lufù.” Ke cidi Ye ùmubiikila ncyòci aci. Vùlukàayi nè, kaaba aka, nwamònu’s, lufù nditàpuluka dyà Cyendèlèlè.

213 Vùlukàayi nè, bansantu kabàtu bàfwa to. Bwòbò bàdi bàlààla tulù, kabèèna bàfwa nànsha. “Ewu udi utèèleja Mèyi Àanyi, nè witabuujà Ewu udi muNtùme, ùdi nè Mwoyi wà Cyendèlèlè.” Aci’s ncyà bushùwà. “Yéyè kààkupita ku cilumbulwidi nànsha; mmuumùke ku lufù muyè ku Mwoyi. Mémè ndi Dibìshiiibwa dyà ku lufù nè Mwoyi,” mwàkambà Yesù. “Ewu udi ungiitabuujà Mémè, nànsha byòbì nè mmufwè, nànsha nànkù neikalè nè mwoyi. Nè ewu yònsò udi nè mwoyi nè ungiitabuujà Mémè kàadyàkufwàku nànsha.” Lazàrò, mufwè anyi? “Mmulààle tulù.”

214 “Kùciinyi nànsha, mwànà wa bajkàji awu kí mmufwè nànsha, kàdi mmulààle tulù.” BààkaMuseka byà bàdyombola. Mmwòmò anyi? Kaa, ekèlekèlè! Nwamònu’s, bansantu kabàtu bàfwa nànsha.

215 Ditàpuluka nè Nzambi ke cidi lufù, lufù lwà Cyendèlèlè. Nènku mulùmyànà ewu ùdi ùbìikidiibwa nè “Lufù,” pa nànkù shààlaayi kule nendè. Yéyè ùdi cinyi? Mudivwijè bulongolodi, ndongolwelu wa bulongolodi; èkèleeziyà wa nzànzànzà, wa kumpàla, wa mudivwijè bulongolodi, nè pàakangatàye dyumvwa dyà—dyà Constantin, ku Nsangilu wa Nicée.

216 Tuvwa batwàle bwalu bwà bakàji abu, dilòlò adi, nè twètù kuleeja mùvwà Evà, mukàji—musèla wa mbedyambèdi awu, kumpàla mene kwà bàyendè kuseemenayè kùdiye, wàkadishinda, ku dibènga—kwitabuujà Diyì dyà Nzambi mu Edènà. Mukàji—musèla wa nyumà wàkaleidiibwa mu Ditukù dyà Mpenta wa Kilistò awu, kumpàla kwà Yéyè kàyi mwanjì kuseemena kùdiye, cyàkenzekà ncinyi? Wàkadishinda, ku Loomò. Cinyi? Wàkajimija ngiikàdilù mulenga wa Diyì, ku mèyi maswika. Amen. Kaa, ekèlekèlè!

217 Nyèwù—nyèwù—nyèwu ngumvwa disaluka dilwa cyàkàbidi pambidi pàanyi, èyowà’s, mukalenge, pàndi ntùma meeji ku cidi. . . Ncyèna nè meeji à kwenza maalu bu mupàle nànsha. Ncyèna nè awu meeji to. Kàdi ndi ànu. . . Kanwèna bamanyè cidi cyòci aci cingenzela to. Ndi musòmbe mu bintu ebi matukù ànaayi majimà patùdi twakulangana apa. Ànu. . . nè

bìdi ànu nè bìdi bikèngela bwà ngǎmbèku cintu kampànda, cyà cìmfikishakù ku didyùmvwà cyàkàbìdì bu muntu. Nwènù's nudi bamanyè cìndì njinga kwamba aci. Èyowà. Èyo. Ubanga kwakula mùshindù awu, nè umòna bikèènà-kumòna bìbwayika mu mwaba mujimà ewu. Ncyà bushùwà's. Nwamònu's, ki bwà cinyi ndi ngambakù cintu kampànda cyà cingaaluja kù mu mèmè cyàkàbìdì, nè cinyùkusha bwà kungaaluja cyàkàbìdì. Nwamònu anyi?

218 Nukàadikù bamòne pântù ngenza mulongo wà dijingulula apu anyi? Nèngǎmbè cintu kampànda, cìikalà mwà kufikisha bantu ku difwà mu tuseku; pashiishe nèngǎmbè cintu kampànda, cìfikisha bantu ku didila dyà myadi; pashiishe nèngǎmbè cintu kampànda, cibàfikisha munda. Ndi nè cintu kampànda cìndì mumòne. Nènku nèngǎmbè cintu kampànda, bwà kumòna mùdici cyèenza, pashiishe ndi mmòna nè mbukènkè bwà mùshindù kaayi bùdì pamutù pààbò, cìdì cyènzekà. Dìbà adi ndi mmanya nè cìdì mwaba kampànda, nè mmanya ní Cìdì cibìikila anyi to. PìikalàCi kaciyi cibìikila to. . . Udi musòmbe mwaba awu awu, yèyè mwena kwitabuuja mushùwashùwàlè, mbìmpè. Udi umubiikila, wamba nè: “Wèwè, *Kampànda.*” Nwamònu's.

219 Nènku paùdì upweka mu ndòndò, Nyumà ùbanga kulaaba, dìbà adi udi umòna dipòdyà dyà makènkè adi dyènzeka myaba yònsò, nwamònu's, ànu mùshindù awu, myaba yònsò, myaba yònsò mu cibambalu amu. Pa nànkù, ki bwà cinyi ntu ngamba cintu kampànda, byènzè bu nè ndi mbangulula, mbanga cyàkàbìdì, nwamònu's.

220 Kacya ànu ku dyàlumingu dishààle aku, ndi ànu musòmbe mu cibambalu kampànda, mumònàngàne ànu nè kusambila, kwàjikì, nè mwikale mwinshì mwà dilaabiibwa. Nènku ndi mumanyè nè Eci ncyà bushùwà. Nwènù nwitabuuja Nzambì, ndi mumanyè nè nudi nwitabuuja, nùtangilàayi ànu ku ndekeelu kwà lumingu aku. Uh-huh. Nwamònu anyi? Nwamònu anyi? Èyo. Nwamònu anyi?

221 Mpindyewu, *lufù* mbwena kwamba nè “Ditapuluka dyà Cyendèlèèlè nè Nzambì.” Nènku nwàvulukaaayi mpindyewu nè, bansantu kabàtu bàfwa nànsha.

222 Vùlukàayi nè, wendè mukàji-musèla bààkamupèèsha kàbalù kàà cisengàsengà, kàà. . . Ndi njinga kwamba nè, mubàndi wa pa kàbalù ewu bààkamupèèsha kàbalù kàà cisengàsengà, bwà—bwà kupàtukayè naakù. Bààkamupèèsha kàbalù kàà cisengàsengà aka—aka, bwà kuyayè naakù. Nè yèyè wàkabànda kàbalù kàà cisengàsengà aka, kàà lufù's. Mpindyewu tudi bamanyè nè cyòcì aci civwa ncinyi. Tudi bamanyè nè civwa ng'èkèleeziyà kaayi awu.

223 Nènku vùlukàayi nè, mu dilòòlò dishààle adi, kàvwa ànu “mukàji wa masandi” cyanààna to, ùvwa “mamwèndè wa

bandumbà.”

224 Nènku tudi tujandula nè, cyàkenza nè yêyè ìkalè mukàjì wa masandi, civwa nè, mmukàjì udi mukàjì wa mùshindù awu. Mémè ndi ànu . . . Mmwàkù wà ciipanshi, wà kwamba munkaci mwà batèèleji basambàkàne. Kàdi Bible’s ngudi wamba cyòci aci, nudi numòna’s. Nànku, dîbà adi, tudi tumanya nè awu—awu mmukàjì udi nè nsòmbelu kàyì wa lulamatu ku micìpù yèndè yà dibàkà to. Nènku nudi numòna’s, pèndè ùdi ne cyà kwikala, mùdiye yêyè mwinè wàmba, ùdìbìikila nè, “Mukalenge-mukàjì wa mu Dyulu.” (Awu’s mmufwànyine kwikala Mukàjì-musèla wa Nzambi. Nzambi’s n’Kilistò.) Nènku tudi tusangana nè yêyè ùdi wènda masandi, nè ùdi ùfikisha bamfùmù bàà pa buloba ku dyenda dyà masandi, nè babanji bwònsò, nè bantu banène. Bàà pa buloba bujimà bàkamulonda. Nwamònu anyi?

225 Nè pashìishe tudi bajandùle nè mmulelè ndambù wa bàna bàà bakàjì, nè bwòbò aba bàvwa bandumbà. Ndumbà nganyi’s pìikalàyi kàyì mukàjì wa masandi, cintu ànu cyòci cimwècimwè aci; ngèndààmàsàndì mujikè, masandi à mu bujikè, bubì, masandi à babàka, baènda’s. Ncinyi civwàbo benzè? Badìvwijè bulongolodi, bapetè ndongolwelu kampànda, balongèshangàne ndongolwelu mikwàtakaja kùdi bantu, Mpenta nè musùmbà mujimà awu!

226 Mpindyewu, kwèdi kondò kèèbè—kèèbè kàà mwoyi mu mpaaya nànsha, wèwè Mpenta. Lekèlaayi nnwàmbilèku cintu kampànda. Twànjàayi kutàngila bwalu abu cimònààmèèsù. Tukàadi baye bikolè be mu njila mpindyewu bwà kubanga kudyà cibànga. Tàngilàayi kùneeku.

227 Tudi nè mwoyi mu Cikondo cyà Èkèleeziyà wa Laòdikiyà. Nè cyòci aci kàdi ke cikondo cyà citàmbe kwikala cyà macimbu ku bikwàbò byònsò, cyà civùmvù, nè cimwèpelè civwàku Kilistò ùsanganyiibwa pambèlu, ùteeta kwalukila bwà kubwela. Nè cyòci aci ke mukenji wà cyena-Mpenta wùdi wènda ùya, wàmba nè: “Mémè ndi mubanji!” Balùmyàna, wèwè’s uvwa mupèlè, kumpalà kwàka. Mpindyewu wàlu mubanji ànu wetù wa cyà bushùwà ewu, wamònu’s. “Ncyèna nkèngela cintu nànsha cimwè to!” Nè—nè, kaa, cyùvwà ciinè’s!

228 KwambaYè nè: “Wèwè’s udi butakà, mwena dikènga, mpofu, mupèlè, mukèngeledi wa luse, kàdi kùyì nànsha mucimayè to.”

229 Mpindyewu, bu nè muntu ùvwa butakà, mu mùsèèsù mwàmwa, nè mucimanyè, mòna’s, s’mmufwànyineku kudipàtula mu cyòci aci. Kàdi pàdiye—pàdiye kàyì mucimanyè to, nè wèwè pèèbè kùyikù mwà kumwambila bwalu kukuumvwayè to, dîbà adi yêyè ùdi mu mùshindù mubì. Nzambi àmuumvwilèku luse. Cyà bushùwà. Mònaayi’s. Kaa, ekèlekèle!

230 Mpindyewu vùlukàayi nè, mufwilakanyi nè Kilistò ewu yêyè mwinè, bu mùdiye muntu mulùme, mukàjèndè-musèla, udi èkèleeziyà wèndè awu, “bàakamupèsha cipòlò bwà

kuningalalayè, kàdi kàakanyingalala nànsha,” mu cyôci cikondo cyà èkèleeziyà aci, cyà Twatilà aci. Nudi bacivùlùke anyi? Nudikù mwà . . . ?

²³¹ Èè, twánjàayi kwalukilakà paanyimà bwà katanci kakesè cyanààna. Kabyàkutwenzela bibi bwà kwalukilakù paanyimà bwà katanci kakesè cyanààna nànsha. Twánjàayi kwalukilakù paanyimà, ku nshapità mwi2, ànu bwà katanci kakesè cyanààna. Netùcibalè ànu cyanààna, nshapità mwi2 wa . . . mpindyewu, Twatilà. Mpindyewu tàngilàayi eci nùнку, ànu lùkàsàlùkàsà mpindyewu. Ekèlekèle, tukàadi pabwipi nè dîbà dyà kujikija, kàdi pèètù katuyi nànsha banjì kubanga to. Kàdi, mōnaayi, Twatilà. Mpindyewu, ncibangile ku mvensà wa 18 wa—wa nshapità mwi2.

. . . fundilà mwanjèlò (ke mùsànjeelà nyèyè awu) wa èkèleeziyà wa Twatilà nè; Bintu ebi mbidibo bàmba kudi Mwànà wa Nzambi, udi nè mèsù menzè bu ndimì yà kapyà . . . nè makàsà èndè menzè bu cyamù cyà kabanda pa cyôci;

Ndi mumanyè byenzedi byèbè, nè luse lwèbè, nè mudimu wèbè, nè diitabuujà dyèbè, . . . lutuùlù lwèbè, nè byenzedi abi; nè udi nè byábùngi kutàmba byà . . . nè byà ndekeelu bitàmbè byà kumpàla.

Nànsha nàнку ndi nè ndambù wa tuntù tùndi mbèngangana neebè, bwalu wèwè udi witaba bwà mukàji awu Izàbèlà, . . .

²³² Kàdi's ki bwalu abu. Nwènu's nudi bamumanyè, mu Bible. Ùvwa mukàji wa Aakàbà. Kàdi's ke mukàji awu nyèyè ewu, èkèleeziyà, Izàbèlà, mukàj'a mupròfetà wa mashimi awu, udi nnè mmupròfetà mushùwashùwàlè wa Nzambi awu, paapà; cyà bushùwà, mupròfetà mushùwashùwàlè nè mukàjèndè, Izàbèlà. Mpindyewu, bìvwa bimanya nè Aakàbà ùvwa mwena Yudà mushùwashùwàlè, kàdi ùvwa musenji, bwà aci kaayi's nudi bamanyè, bwalu mukàjèndè wàkamulombola ànu mùshindù wònsò wùvwàye muswè awu. Tudi tujandula nè, Izàbèlà awu ùdi wàngata mfrangà yèndè yèyè ùbàlombola bwôbò aba mu mùshindù wùvwàbo baswè awu, bwôbò pààbò.

. . . udi udibùkila mùdiye mupròfetà mukàji, (nwacyùmvù anyi?), bwà kulongesha nè . . . kuvwiya mwìnshì mwà bukòntononyi bwèndè basadidi bàányi (nwamònu's, dilongesha dyà Izàbèlà adi dyàkatangalaka mu ditùnga dijimà) bwà kwendabò masandi nè . . . kudyàbo bintu bilàmbula mpingù.

. . . ndi mumupèeshe cipòdòlò bwà kunyingalalayè (nwamònu anyi?) ku masandi èndè awu; kàdi kì mmunyingàlale to.

²³³ Tàngilàayaaku mvensà udi ulonda ewu.

...mèmè nèmukùpè mu bulààlù kampànda (ke ifernò awu), nè bàdì bènda nendè masandi à babàka abu mu makènga manène,...(Mbwena kwamba nè nebàbwelè mu Dikènga dinène. Mpindyewu, kî ng'Èkèleeziyà to)... ambà ànu bwòbò banyingàlale ku byenzedi byàbò abi.

234 Mpindyewu nwatàbaleelaayi, apa's.

...nènshebeyè bânà bèndè (bandumbà bèndè abu) nè lufù (lufù lwà nyumà);...

235 Nudi nuciitabuuja anyi? Aci's ke Dìyì. "Nèmbàshebèyè nè lufù." Nènku bwòbò bashebèyiibwe, mbatàpùlùke Cyendèlèlè. Èyo. Vùlukàayi nè, Wàkamupèèsha cipòòlò bwà kunyingalalayè.

236 Cikondo cyà Twatilà civwa ncikondo cyà mîdimà. Mubàndi wa pa kàbalù kafiike wàkendela pa kàbalù mu cyòci cikondo aci, pàvwàbi bikèngela bwà misà yònsò nè bikwàbò byònsò kufuciibwàbi, nè masambila, nè—nè bijila byà matùkù citèemà, nè bikwàbò. Mpindyewu mōnaayi kàbalù kèndè kafiike aku, dîbà adi, paanyimà pàà yèyè mumanè kubènga bwà ku kunyingalala apu mu cikondo cyà Twatilà, (cinyi?) ùdi ùshintulula lwendu lwèndè lwà pa kàbalù ùmuka pa kàbalù kafiike ùya pa kàà cisengàsengà, lufù, bwà mudimu wèndè wà bwambi wà ndekeelu.

237 Mpindyewu, ndi mufwànyine kupèeshakù muntu dinyùkushiibwa dikesè kaaba aka. Kubènga Nzambì, kubènga dibìikila dyà Nzambì, wadyàkubenga bwà musangu wà ndekeelu musangu kampànda. Nènku, ànu mwàkenzà èkèleeziyà awu amu, kwàjikì. Nzambì, lutùùlù, kààkukòkangana misangu yònsò nè muntu nànsha. Nwamònu anyi?

238 Nè mukàjì awu pààkaCibèngàye, nè kubèngayè bwà kuCìitaba, dîbà adi wàkashintuluka nè wàkaya...Nènku mpindyewu wàpèci dîna dibìikidiibwa nè "Lufù," ditàpuluka. Nzambì wàkamba nè: "Nèngàngatè mene nè bânà bèndè, beena Mishònyì abu, nè yònsò wa kùdibo Nèmbàshebèyè nè ditàpuluka dyà Cyendèlèlè." Ki bwalu mbwòbù abu's, Cikondo cyà Twatilà, cikondo cyà mîdimà aci. Kàbalù kèndè kafiike aku mpindyewu kàdi kàndamuka lufù, bwà mudimu wèndè wà bwambi wà ndekeelu.

239 Nwamònu mùdi bikondo byà èkèleeziyà bibwelakanangana nè Bitampì amu anyi? Ànu bipwàngàne menemene. Nè tudi bamanyè nè Cìdi cyà bushùwà. Nyumà Mwîmpè kàtukù wènta cilèma nànsha cimwè to. Yèyè wàkatùpèèsha dishindika dinène dyà dikèma, musangu mushààle, patwàjikìjì bikondo byà èkèleeziyà abi mwaba awu, nudi bamanyè's.

240 Mōnaayi mwoyi mule wà Nzambì, mùdiwu nè dinanga! Kumpàlà kwà kukòsaYè cilumbù cyèndè, Wàkamupèèsha kaaba kàà kunyingaleelayè. Nè mu Dîna dyà Mukalenge mmùndi ngàmba cyòci eci emu: Yèyè mmupèèshe èkèleeziyà wa

Mishòònyì cintu cimwècimwè aci, kàdi kí mmuswè kucyènza nànsha. Mukenji mmunyùkùshe myaba yònsò, kàdi kí mmuswè kucyènza nànsha. Yéyè neikalè mwà kwangata méyì èndè maswika nè twitabàayi yèndè sungasunga, nànsha wèwè mumuumvwijaCì bishi.

241 Ànu mûmvwà mwâmbè mu Chicago mwàmwa, ditùkù adi, kumpàlà kwà bambi búngì butàmbe bwà bantu bàdi basòmbe kaaba aka ebu! Nè mwaba awu bàvwa bancincimike, pa Dilongesha, dimiinu dyà nyòka nè cikwàbò cintu cyònsò eci. Mémè kwamba nè: “Muntu àngatè Bible wendè, dîbà adi àbandè kaaba aka imanè ku luseke lwànyì eku.” Nènku muntu nànsha umwe kàakamba cintu nànsha cimwè to.

242 Tommy Hicks kwambayè nè: “Mémè—mémè nciitukù mânji kuumvwa Aci mùshindù awu kwònsò eku to, Mwanèètù Branham. Ndi dijinga nè mikàbà yà méyì nkàmà yìsàtù's. Nènyitùminè bambi bàànyì bwònsò.”

243 Bàvwamu bìipacila ku makùmi àtaanu, anyì makùmi mwandamutekètè nè bàtaanu, bàakambà nè: “Nèndwe kuntwaku bwà kubàtijiibwa cyàkàbìdì.” Bàakalwa anyì? Nànsha umwe wa kùdìbo. Bwà cinyi? Wàkabàpèèsha cipòòlò cyà kunyingalalabò! Nè Yéyè neakupè bánà bèndè balela abu mu lufù, lufù lwà nyumà.

244 Netwàngatè aci mààlabà dilòòlò, bu Mukalenge mwà kwanyisha, anyì mu disambòmbò dilòòlò, pà Bipùpù bìvwàbo bapìcile abi. Nùtangilàayi bwà kumòna cìdì cyènzekà kuntwaku.

245 Ànu mwàkapèèshàYe Èjjiipitù, Wàkapèèsha Èjjiipitù cipòòlò bwà yéyè kunyingalala. Kàdi cipùpù cyà ndekeelu aci civwa ncinyi? Cìvwa ndufù.

246 Ke cipùpù cyà ndekeelu ncyòci aci cìdì cituutè èkèleeziyà wa beena Mpenta, ndufù lwà nyumà. Yéyè's mmufwè. Aci mmu Dìná dyà Mukalenge. Mmufwè mu nyumà. Yéyè wàkamupèèsha kaaba kàà kunyingaleelayè, kàdi kuCibèngayè. Patùdì twakulangana apa mmufwè. Kààkujuukakù kàbìdì to.

247 Nènku bantu bàdi kuntu kwàka abu, bàteeta bwà kubweja ba-Épiscopaliens nè bansaserdòsè, nè bikwàbò, nè bàbàbiikila nè, “Taatù wa Bunsantu *Kampànda*.” Mòna's, s'biwva bikèngela kudyumwabò bwòbò biinè bundù! Mmùshindù kaayipu wùdì bantu mwà kulwa mpofo's? Yesù kèna wàmbakù nè, pàakalwà virgò mukùtākàne awu bwà kusumba Maanyì, kààkaÀpeta anyì?

248 Bantu bwònsò, nutu nuumvwa bantu bàmba nè: “Ntu mupetè Nyumà Mwimpè. Ntu mwakùle mu myakulu.” Kàdi kabàyikù baswe kuseemena pabwìpì nè èkèleeziyà bu ewu nùnkù nànsha. “Kaa, udi mumanyè's, ncyèna ngiitabuuja nè ndikù muswè kuseemena pabwìpì nè mwaba wà mùshindù wàwa to.” Cìbì wamba mùdì nè Nyumà Mwimpè anyì?

249 Kàdi nudi baswè mishindù yèù yà muntu udi uđineemeka ayi. Nudi baswè kushààla mu Baabùlòònà cibi biikàle nusànkila mabènesha à ku Dyulu's. Bikèngela nwènzè disungula. Kanwèna mwà kushààla mu maalu à pa buloba amu cibi musangu wùmwèwùmwè awu nukwàcila Nzambì mudimu nànsa. Yesù wàkamba nè kwèna mufwànyine kukwàcila Nzambì mudimu nè mamònà nànsa. Nàнку pawikalà kùyi utèkemena . . .

250 Wèwè musùngidìibwe cyà bushùwà, neùsankilè masangisha mùdi Nyumà Mwimpè ùdishindika Yèyè mwinè nè ùleeja nè Dìyi dyà Nzambì didi nàнку.

251 Muntu kampànda ùvwa wàmba nè: “Bantu abu bàdi bènza mutooyi mupite búngi. Bidi bimbìndulula mèmè.” S'neùbinduluke wèwè mufika mu Dyulu. Kàdi anjì elà ànu meeji cyanààna, piikalà bwònsò abu Mwòmò amu, díbà adi ciwàmbà ncinyi? Kaa, ekèlekèle! Mùshindù mwinè wùdi Mukalenge muswè bwà . . .

252 Yèyè ùdi nè mwoyi mule, ànu mwàkadìYe mu matùkù à Noà amu. Wàkateeta nè mwèndè mwònsò. Wàkatwàla ntàntà mule, munda mwà bidimu lukàmà nè makùmi àbìdì, bwà kubàfikisha ku kunyingalalabò. Bwòbò kabààkaswà kunyingalala nànsa.

253 Mu matùkù à Èjjiipitù, Wàkatùma bipùpù nè bikwàbò byònsò. Bwòbò kabààkaswà kunyingalala nànsa.

Wàkatùma Yone. Bwòbò kabààkaswà kwalukila nànsa.

254 Wàkatùma Yesù, bwà àfwe, àsungilè kasùmbù kajimà kàvwà mwà kutèèleja Dìyi aku.

255 Nè mpindyewu, mu matùkù à ndekeelu emu, mMulayè cyàkàbìdì nè Ùvwa mwà kutùma Mukenji bwà kuMupàtula, nè kwalujulula Diitabuaja dyà ku cibangidilu ku Cyòci aci, kudyaluja ku Dìyi, kàdi bòbò kí mbaswè KuDyàkidila nànsa; mbatàmbe kudìswikila mu mèyi àbò maswika nè twitabàayi, mu mùshindù wà nè kí mbaDiswe nànsa. Kaa, bàdi bàdyàmbidila nè bu nè bàvwakù nè . . . bu Mwanjèlò kampànda mwà kutùuluka kwendela panshi apa, kàdi Nzambì kàtu wènza byà nàнку awu nànsa.

256 Yèyè ùtu wàngata muntu cinyònga nè mukùtàkàne, muntu udi kàyì mene mumanyè ABC anyì—anyì ní ncinyì cyònsò to. Nènku díbà adi Ùdi wàngata muntu wa mùshindù awu, bwalu Yèyè ùdi mwà kwàngata cintu kampànda cidì cintu cyanààna aci kàdi kukwàcilamù mudimu. Pàcidì ànu muntu ùdyàmbidila mùdiye cintu kampànda, díbà adi kabèna mwà kwenza neendè cintu nànsa cimwè to. Kì cikaadiYe mwenzèze misangu yònsò. Bikèngela ùlwe cintu cyanààna, bwà wèwè kulwakù muntu kampànda kùdi Nzambì. Kaa, ekèlekèle!

257 Mònaayi, nànsa nàнку: “Wàkamupèesha cipòlò bwà yèyè kunyingalala, kàdi kàakanyingalala nànsa.”

258 Yèyè's mmucyènzè kàbìdì; kí mmuswè kucyènza to. Dibèngà dyèndè adi, mùshindù kampànda, didi dimuvwiya, anyi, dibèngà dyèndè adi didi dilwa mùshindù mupwàngànè bwà Sàtaanà kubwelayè munda mwèndè nè kwandamuka mubidi. Aci's mmwòmò. Wàndamuka mubidi buludì munda mwèndè, bwalu mmubènge Dìyì. Nè ncintu ànu cyòci cìmwècìmwè aci cìdì èkèleeziyà wa Mishònyì mulwè, ndumbà, mbwalu ùdì ùbènga Bulelèlà bushindika bwà Dìyì dyà Nzambì, nènku aci cìdì cipèèsha dyabùlù kaaba bwà kubwelayè buludì nè kudyàndamuna yèyè mwinè mubidi. Nènku neènzè cimfwànyì bwà nyama wa lwonji pàadyènzàbo bwònsò cimùkù, kuntwaku mpindyewu mene, nè byènzeka ànu menemene mwàkambàYe amu. Ncyà bushùwà's. Amen.

259 Bu nè mèmè ewu mvwakù nè kàlaasà kalonga, mvwa mwà kuCipàtula patòoke. Mèmè ncyèna nè kàlaasà kalonga to nànsha kakesè. Ndi ànu ntèkemena bwà Nyumà Mwimpè ànùbulwilèCì. Nè Yèyè neàcyènzè, bwà aba bàdì. . . Aci's ncyà bushùwà. Neàcyènzè. Eyowà. Mònaayi's.

260 Mònaayi mùdì, cidiye mwenzè kaaba aka. Mmubènge Mukenji wà Nzambì wà ne ànyingalala awu. Wàkabanga, mufwilakanyi nè Kìlistò, nè cyòci aci's ke cyàkadiye. Kulwayè, mupròfetà wa mashimi, démon mwandàmùke mubidi, nè, pààkenzàye nànkù apu, nè dilongesha dyèndè dyà mashimi adi. Ke pashiishe, mu byònsò abi, Nzambì kumupèèshayè cipòòlò bwà kunyingalalayè, ùteeta bwà kumupeta.

261 Nwamònu mùdì mwoyi mule anyi? Dinanga kaayi dilengèlèngèlèè's wè! Kakùtukù dinanga bu adi nànsha! Tàngilàayi bwòbò abu, nànsha mene nè bààkaMutwilà matè mwìsù abu nè bikwàbò, Yèyè kubàfwilà luse. Ke Nzambì àwu's, nwamònu's. Kanwìkadi. . .

262 Ùbènga Mukenji wà Nzambì! Tàngilàayi, bààkamulòmba bwà kunyingalalayè, bwà kwalukilayè mwaba wàkadishindilayè awu.

263 Nè yèyè wàkadishindila penyì apu's? Pa Dìyì. Cyà bushùwà. Evà wàkadishindila penyì apu's? [Disangisha didi dyamba nè: "Pa Dìyì."—Muf.] Dìyì's! Dingumba dyàkadishindila penyì apu's? ["Ku Dìyì."] S'ki bwalu mbwòbù abu. Nwamònu anyi? Kakwèna mukwàbò mùshindù nànsha. Ànu, musangu wònsò, kwalukila ànu buludì ku Dìyì, kwalukila ànu buludì ku Dìyì. Nwamònu anyi? Kàdì bwòbò bàdì bàkabwela mu ndongolwelu udi ubààluja kule nè Dìyì, ùbàtùma kule nè Dìyì pamutù pàà kubààluja ku Dìyì. Mònaayi's.

264 Tàngilàayi, bààkamupèèsha cipòòlò bwà kunyingalalayè, bwà kwalukilayè. *Kuningalala* mbwena kwamba nè "kwalukila, kukùdimuka paanyimà, kukùdimuka kutàngila kùdì ufùma." *Nyingàlàlà*, "alùkilà." Nènku bààkamupèèsha cipòòlò bwà kwalukila ku mwaba wùvwà. . .

265 Mpindyewu vùlukàayi nè, yêyè nguvwa Èkèleeziyà wa mpenta, wa ku cibangidilu, uvwa Nyumà Mwimpè mwicikijile, mu Ditùkù dyà Mpenta awu. Mbúngì kaayi bwà balongi bàà Bible bàdi bamanyè aci? Bushùwà, ùvwa nyêyè. Nwamònu mwaba wàkumukàyè awu anyi? Wàkadishindila ku Dìyì, nè kwitaba mèyi maswika. Wàkindila... Pamutù pàà Nyumà Mwimpè, yêyè wàkaswà muntu munsantu: “Docteur LL., Ph., Q.U.” nè pashìshe yêyè kumuvwija paapà. Nwamònu anyi? Bushùwà. Kàdi, yêyè, ke cyàkaswàye aci's, muntu wa kwikala kumwenzela masambila. Muntu kampàndà... Yêyè ùdi ùfuta ànu mfrangà yèndè cyànaàna, nènku ke cyònsò cìvwa cìkèngela bwà kwenzayè aci's. Nwamònu anyi?

266 Mpindyewu, ncintu ànu cyòci cìmwècìmwè aci leelù ewu. Pàdibi ànu nè bàdi nè cibàsà cyà mu èkèleeziyà cyà kusòmbabò, nè kwela dintàmfulù dyà mfrangà mu dilòngò dyà disangishila milàmbù, aci ncikumbàne. Yêyè's ncidimba cyà èkèleeziyà. Kùmwbaidiku wèwè kantu nànsha kàmwè kààCì to; kì mmuswè kumanya nànsha. Ke bânà bèndè bàà bakàjì mbòbò abu.

267 Mpindyewu, mwaba wàkadishindilàye awu mpenyi? Nku Dìyì dyà ku cibangidilu dyà cìpostòlò dyà bàpostòlò nè baprófetà. Ke mwaba wàkadishindilàye awu's. Ke mwaba wàkadishindila beena Mishòonyi awu.

268 Nyingàlalaayi! Alùkilaayi! Kùdimukàayi kumpalà kwà dībà kwikaladi dimanè kupita. Dībà kì ndyanjì kwikala dimanè kupita to. Dimwè dyà ku matùkù aa Mwàna wa mùkòòkò neàshiyè mwaba Wèndè, nènku dībà adi byònsò byàjiki. Ke mùdi kàbidi bânà bèndè bàà bakàjì bālòmbiibwe mpindyewu, kumpalà kwà kulumbulwishiibwabò pàmwè nendè, bwà “kukùdimuka.”

269 Mpindyewu, Mukenji wà ndekeelu wùdìbo bàpeta, mpàdi muprófetà ewu, ùndi ngamba ewu... Bidi nè, mèmè ndi mubalè mikàndà yàbúngì pa Cyòci aci. Nè ndi mumanyè nè bantu bàà cyà bushùwà, bàà lumvu, bàà ngeelèlù wa meeji wa nyumà mbamanyè nè Cyòci aci cilwalwa. Mbamanyè nànu awu. Mbamanyè nè Cilwalwa, nwamònu's. Bàdi... Kàdi lutàtù pa bwalu abu lùdi nè, bwòbò mbatùngùnùke nè kwamba nè: “Tudi naaCì dijinga. NeCìikalè mwà kulwa,” kàdi pààlwàCì apu, pààbò biikàle badipwekèshe menemene, pàmwàpa nebàCìpìcìlè ku luseke ànu mwàkenzàbo mu cikondo cikwàbò amu. S'ncyà bushùwà. Bantu nebìikalè bàfùnda pa bwalu bwàCì, nè bikwàbò, bàmba nè: “Kaa, èyowà's, bìkèngela Cìlwe,” kàdi dībà adi bàCìlekela ciikàle cìleejiibwa kumpalà kwàbò mene, kàdi pààbò batùngùnùke bènda bàya, nwamònu's. Pa nànu's ncikaadibo benzèze.

270 Tàngilàayaaku mpindyewu, Dìyì dyà ku muji adi. Bàdi bànying-...bàdi...Bikèngela ànyingalalè, àlukilè, nànsha

nàнку, ke cidi cilòmbiibwe kàbidi kùdi bânà bèndè bàà bakàji. Bwà kwenzejiibwabò. . .bòbò's nebàlumbulwishiibwè, nè bàkupiibwè mu bulààlù bùmwebùmwe nè bàshebeyiibwè pàmwe nendè. Mbabàlòmbèlòmbè bwà kukùdimukilabò ku Diyì dyà ku muji, kwalukila ku Dilongesha dyà bàpostòlò. Kàdi, mbaswìkìibwe bikolè ku twitabàayi yàbò nè bikwàbò abi, mu mùshindù wà nè kabààkùcyènzakù to. Bàdi bwòbò ànu bàCyèlulwila.

²⁷¹ Dìbà adi cidìbo bènza ncinyì? Ndekeelu wa byònsò bàdi bàdyènza mu cimfwànyì cyà nyama wa lwonji, bukolè bukwàbò's; mònaayi, nè yèyè, bènzela Mukàji-musèla wa Mwàna wa mùkòokò, mwàkenzàye mu Bwàkabuulwibwà 13:14 amu. Cyòci aci ke cidìbo bènza, ànu kukèngeshangana, ànu cintu cimwècimwè aci. Èkèleeziyà yidi yèlulwila Mukàji-musèla mulelèlè wa Kilistò, ànu mùkaadi Loomò mwenzènze kacya kwìnè kwònsò aku amu. Ànu nàнку menemene. Èyowà's, mukalenge. Bènzela Mukàji-musèla mu—mulelèlè wa Kilistò ànu menemene mwàkenzàye mu Bwàkabuulwibwà 13:14 amu.

²⁷² Mpindyewu mònaayi. Tudi tumòna, ku Diyì dyà mulayi dyà Nzambì nè, Yèyè—Yèyè neàshebeyè bânà bèndè, màngumba, bânà bèndè bàà bakàji abu, nè lufù lwà nyumà. Mpindyewu, aci's m'Bwàkabuulwibwà 2:22. Kanùcipu mwoyi nànsha. Kushebeya, nkufila lufù. Nè *lufù* lùdi “ditàpuluka dyà Cyendèlèèlè nè Bwikadi bwà Nzambì.” Elàngànaayi meeji pa bwalu abu, nwènù balundà bàànyì. Elàngànaayi meeji pa bwalu abu. Kanwèyemenyikù twitabàayi mikwàtakaja kùdi bantu ayi nànsha bàyamba nè nyà bishi to. Cyònsò cidi cibènganganà nè Diyì aci, shààlaayi kule naaci.

²⁷³ Mpindyewu tàngilàayi, tàngilàayi mu Bible emu. Mbàmbè nè dìnà dyèndè òvwa Ifèrnò, nè . . . ndi njinga kwamba nè:

. . .dìnà dyèndè òvwa *Lufù*, nè ifèrnò òvwa wènda ùmulonda.

²⁷⁴ Mpindyewu, ifèrnò ùtu misangu yònsò ànu wènda ùlonda lufù, mu mubidi emu. Pàtù muntu wa mubidi ùfwa, ifèrnò ùtu ùmulonda; mbwena kwamba nè lukità, ngenà, nwamònu's, aci mmu mubidi emu. Kàdi mu nyumà, n'Dijiba dyà Kapyà, nwamònu's, èyo, kubwela mu ditàpuluka dyà Cyendèlèèlè, mùdìbo bwòshiibwa bàbùtuka.

²⁷⁵ Nè—nè Maalàki 4 mmwàmbè nè: “Kadyèna dibàshiila nànsha cicolakola, anyì ditàmbà, anyì kantu nànsha kàmwe to.” Mmùshindù wùdi naawù buloba bwà kudikezula cyàkàbìdi, bwà Bukalenge bwà bidimu cinunu. Nwamònu anyì?

²⁷⁶ Nwamònu nè, mubàndi wa pa kàbalù awu ùdi “yèyè mulùme anyì”? Nè “yèyè mulùme awu” ùvwa mu cyanza “cyèndè” nè; “mulùme,” mupròfetà wa mashimi. Kàdi mukàjèndè-musèla ùdi ùbìkidiibwa nè èkèleeziyà, “yèyè mukàji,” Izàbèlà. Aakàbà;

Izàbèlè. Mòna's, s'mbipwàngàne ànu mùdì nì ncinyì cyònsò eci's. Nwamònu anyi? Nwamònu anyi?

²⁷⁷ *Bàna bèndè bàà bakàji* mbwena kwamba nè “yèyè mukàji,” yèyè pèndè, kàdì kacya kabàyikù bàpetakù bumfùmù bwà muntu umwe to; beena Mishòònyì, bwà aci nànkù, kàdì biikàlè ànu ndumbà bwà kwanji kwamba's, ku dilongesha dyàbò, dīngumba, ndongolwelu. Aci's cidi ànu . . . Ke cidici cyàmba.

²⁷⁸ Mònaayi. Byònsò ebi bìdì bìkoobeka ku cinyi? Mpindyewu, tudì ànu nè tusunsa dikùmi nè túbidì, dikùmi nè tūnaayi kaaba aka, ngèèla meeji. Anjì tângilàayi ànu nè byònsò ebi bìdì bìkoobeka ku cinyi. Ncinyi aci? Biyaaya byalùkile ànu mùshindù wùvwàbi bilwè, nè bibangile mu Dyulu. Biyaaya kwobeka ku mvità yà ku cikondo cyà nshùkidilu.

²⁷⁹ Cintu cyà kumpàla, mu Dyulu, cìvwa mvità. Lusifèrè wàkiipaciibwa, nè wàkalwa pa buloba. Pashiishe kukooyishayè Edènà; pashiishe ke kubangayè kukooyishanga kàcya ànu piinè apu. Nènkù mpindyewu, kwangacila ànu ku mvità yà mu Dyulu ayi, bikaadi bitàngile ku mvità pa buloba; nè yidi ne cyà kujikila ku, pa buloba, ku cikondo cyà nshùkidilu, mu mvità yidi yibìkidiibwa nè Hààmàgiidònà. Mpindyewu, muntu kanà yònsò mmumanyè aci. Mvità ayi yàkabangila mu Dyulu, yà cijila, nè pa nànkù wàkiipaciibwa. Mikàèlè nè Banjèlò Bèndè kumutònkolabò, kwipaciibwayè. Nè pààkenzàbo nànkù, kumatayè buludì mu Edènà, nènku ke mvità kubangayi pànwapa. Kutwilanganayè . . .

²⁸⁰ Nzambì ùvwa mwelè bàna Bèndè mu bimanu byà Diyì Dyèndè. Kàdì Evà kudileejayè nè nshingù mwolola, kwambayè nè: “Ndi ngèèla meeji nè wèwè udi mubingè's, pàmwàpa.” Nènku ke bwalu bumba bùbangila ànu apu's. Nènku ke mùkaadibi nànkù, kacya ànu piinè apu. Pashiishe Nzambì kutùluka, nè mpindyewu bìdì bikèngela bwà Yèyè . . . KutùlukaYè bwà kupikula aba bàvwà mwà kupweka abu.

²⁸¹ Ànu mùmvwà mwambè nè, Nzambì mmufwànàngàne nè mwibaki munène wa nzùbu. Ùdì wàdija panshì byamù Byèndè byà mudimu, nè pashiishe Wìbaka nzùbù Yèndè. Mpindyewu vùlukàayi nè, kumpàlà kwà kwikalakù lutètè lwà—lwà dimiinu kampànda pa buloba, kumpàlà kwà kwikalakù díbà kampànda divwàku mwà kutwà nsèsà pa buloba, mubidi wèbè awu wùvwa wùsanganyiibwa pa buloba apu, bwalu wèwè udi lupwishi lwà buloba. Nwamònu anyi? Ke cyùdì. Nzambì mWibaki wa nzùbu.

²⁸² Mpindyewu, mùshindù wùvwàYe muswè kucyènza, wùvwa ngwà kwolola cyanza nè kwangata (mwàkenzàYe nè Adàmà amu) ndambù mukesè wa kàlisyumù, binshidimba, nè bukènkè bwà mu cibwàshìbwàshì, kwenza nè: “Hyu!” Wàmba nè: “Ke mwan'Àanyì mukwàbò wa balùme nyèyè awu.” Nwamònu anyi? Pashiishe Ùvwa mwà kwambula ndambù mukwàbò, nè: “Hyu!” “Ke mukwàbò nyèyè awu.”

283 Kàdi Evà wàkenza cinyi? Wàkakooyisha mùshindù awu. Ke kuciyiishilaye ku cyenzi cyà disangila dyà mulùme nè mukàji, dîbà adi lufù kucituitalu.

284 Mpindyewu cidì Nzambi munkaci mwà kwenza ncinyi? Ùdi nè mamiinu awu búngi cyanààna muntwamu, àdi madyànjila kulongolola; búngi kampànda, madyànjila kulongolola. Nènku pashiishe, ku cikondo cyà nshikidilu, Yèyè kàakwamba nè: “Evà, lwàku ùlele mwàna mukwàbò to.” Yèyè (“Hyu!”) neàbiikilè, nè Mémè nêngitabè. Kwàjiki. Ke cyôci aci. Ke cingenyinyenyi ncyôci aci. Pààbwejiibwà wa ndekeelu awu, aci ncidi cikòsa bwalu.

285 Mpindyewu, mvità yàkabangila mu Dyulu. Neyijikilè pa buloba, mu mmwènekelu wa Hààmàgiidòna.

286 Mpindyewu tütangilàayi bwà tùmone mùdici civunguluka. Nè tudi pàmwàpa mwà kucivungulula. Mukalenge àtùkwàcishèku mpindyewu mene bwà kwenza cyôci eci mpindyewu. Cítàngilaayi mùdici civunguluka.

287 Mubàndi wa pa kabalù udi kàyì ùmwika awu, tàngilàayi cidie wenza mpindyewu; “mukàndàmàne,” mubenge bwà kunyingalala nè kwalukila ku Dìyi dyà Mashi dyà ku cibangidilu adi. Dìyi dyàkalwa Mashi nè mubidi. Nwamònu anyi? Wàkabènga bwà kwalukila ku Dyôdi. Mmufwilakanyi nè Kilistò! Mukàji-musèla wa Dìyi dilelèlè, ùdi ukàndam-... yèyè awu ngudi ukàndameena Mukàji-musèla wa Dìyi dilelèlè. Wàngata wendè mukàji-musèla sungasunga! Ùdi ukàndameena Mukàji-musèla mulelèlè ewu, kàbidi. Nè ùdi wàngata wendè mukàji-musèla sungasunga, nè ùlwa nendè kùdiye, mu mmwènekelu wa ntèndeleelelu udi ubiikidiibwa nè ntwitabàayi nè méyi maswika. Nwamònu anyi? Nènku mpindyewu, pàdiye ùmòna Mukàji-musèla wa cijila, ùdi ùbèngangana Nendè. Kàdi ùdi ùkwàtakaja wendè wukàji-musèla, udi ubiikidiibwa nè mmufwilakanyi nè Kilistò, ku dilongesha dyà mufwilakanyi nè Kilistò, cidì ciikàle cibènganagana nè Kilistò. Nudi numòna mùdiye nè budimù amu anyi? Kàdi mpindyewu, pamutù pàa kwikala nè bwobùmwe bwà dinanga, ùkòntonona, kukuukwila mwinshì mwà Mashi, yèyè ùdi nè dīgumba. Pamutù pàa kwikala nè Dìyi, yèyè mmwàngate twitabàayi, méyi maswika, nè bikwàbò.

288 Cileejilu, nè beena Mishòonyi bàmba nè: “Ditaba dyà Bàpostòlò.” Mémè ndikù muswè nùleejè mwàkù bu wówò awu mu Bible. Mùpostòlò, kakùtukù Diitaba dyà Bàpostòlò mu Bible nànsha.

289 Mùngàmbi kaaba aka, mpindyewu, kí nkwanji kwenza ntàntà mule to, anyi mwaba kampànda. Bu nè bàpostòlò bàvwakù nè twitabàayi kampànda, s'm'Byenzi 2:38. Ànu menemene cyòsò cindì mémè mumanyè nè ùvwakù naaci aci. Cyôci aci ke cyàkalòmbàbo bantu bwònsò bwà kwenzabò.

Pàakasanganàye bàmwè bààbò bàvwà bàmwèka bu nè bàvwà beena Kilistò, wàkamba nè: “Nukàadi bapetè Nyumà Mwímpè kacyà nwítabuuja anyi?”

Abu nè: “Katwèna bamanyè ní kùtùkù. . . .”

Yèyè nè: “Dìbà adi nwàkabàtijiibwa munyi?”

²⁹⁰ Mpindyewu, kwikala mubàtijiibwe mu Dìna dyà Yesù, anyi mu Dìna dyà Mukalenge wetù Yesù Kilistò’s wè, èyowà’s, aci, mbímpè, kàdi kí ncyànji kwikala cyònsò nànsha. To, mukalenge. Wèwè udi mufwànyine kubàtijiibwa misangu makùmi àtaanu, mùshindù awu, kàdi aci kacyèna nè dikwàcisha nànsha dikesè to pàdi mwoyi kawùyi mushintulula kùdi Nyumà Mwímpè. Bikèngela bwà byònsò abi byèndelè pàmwè. Mònaayi’s, cidi—cidi n’Kilistò!

²⁹¹ Mufwilakanyi nè Kilistò yèyè ùdi ùbènga Dilongesha dyà Mukàji-musèla dilelèlè, nènku ki bwà cinyi ùdi wàngata mukàji-musèla wendè yèyè sungasunga mpindyewu nè ùmwibakila, mwinshì mwà twítabàayi wendè yèyè sungasunga. Wàngata mukàji-musèla wendè sungasunga awu nè ùmuvwija dngumba! Awu pèndè ùmba ùlela makwàbò màngumba, mùdici citèèdiibwe mu Mifùndù Minsantu eyi; ùlela bânà bàà bakàji. Wa bwalu kàyì. . . Ewu pèndè ùlwa ànu mùdi mamwèndè amu, wa mu mubidi, wa maalu à pa buloba, wa cyena-màngumba; ùkàndameena Mukàji-musèla wa nyumà, Dìyi.

²⁹² Kabèènakù bàmba nè kabèèna beena èkèleeziyà to. Anji akulabi nè muntu wa cyena-màngumba tũng. “Cyà bushùwà’s, mèmè’s ndi mwena èkèleeziyà.” Wèwè udi mwena Kilistò anyi? “Mèmè’s ndi mwena èkèleeziyà!” Aci kacyèna nè dipetangana naaCì to! Bàdi bàmba. . . Kwèna mwena Èkèl-. . . Wèwè, wèwè udi mufwànyine kwikala mwena cidìbo bàbùikila nè ng’èkèleeziyà aci, wamònu’s, kwikala mwena èkèleeziyà kampànda. Aci kí ng’Èkèleeziyà nànsha. Ayi nànkù kí ng’Èkèleeziyà nànsha. Awu mmaswa àdi bantu bàdisangishilamù, nè bantu bàà bu mùdi: “nyuunyi yà masàla mafwànàngàne.”

²⁹³ Kàdi nwènu nudi ànu Èkèleeziyà umwèpelè, nè mwinè awu ke Mubidi musokòmè wà Kilistò. Nè kwèna ukadilamika ku Awu to. Udi ulediibwaMù.

²⁹⁴ Ànu múnkaadi mwambàmbe misangu yònsò nè, mèmè ndi mu díkù dyà beena Branham kùkaadi bidimu makùmi àtaanu nè bisàtù, kàdi kacya nciitukù mukadilamikekù nànsha. Ntu mulediibwemù. Nwamònu anyi?

²⁹⁵ Mpindyewu mònaayi. Mbileejjiibwe ànu bilenga be mu cifwànyikiji. Ndi—ndi nè. . . Mufùndu mufùnda kaaba aka, kàdi ndi. . . katwèna nè dìbà dyà kufikakù to; Esawù nè Yakòbò.

²⁹⁶ Mpindyewu, Esawù ùvwa muntu mutèndeledi, kàvwa wàmba nè ùvwa mwena bupidyà nànsha, ùvwa mwitabùuje

Nzambi ànu ùmwèùmwè uvwa Yakòbò mwithàbùùje awu, Nzambi ànu ùmwèùmwè uvwa papa wendè mwithàbùùje pèndè awu, kàdi yéyè ùvwa ànu mwenji wa maalu makònyàngàle, anyi, mfwilaayikù luse bwà cyakwidi aci, ànu, kàvwakù yéyè nè mushinga nànsha. Yéyè—yéyè ùvwa, mpindyewu, pa bivwà bitàngilà kwikala nè nsòmbelu mulenga, ùvwa cyà bushùwà muntu wa—wa byenzeni byà nsòmbelu mulenga kutàmba Yakòbò. Kàdi, nudi numòna's, kàvwakù yéyè wèla meeji. . . “Kaa, ndipetangana kaayi didi bukenji bwà bwanààbutè abu nè Cyôci aci?” Ke kusùmbishayè Yakòbò bukenji bwà bwanààbutè abu. Nwamònu anyi?

297 Kàdi, Yakòbò, kàvwakù yéyè nè bintu binène, mùvwà naabi Esawù amu nànsha. Kàvwa nè bumpyànyì mùvwà yéyè awu naabù amu nànsha. Kàdi kùvwa cintu ànu cimwèpelè cívwa Yakòbò ùkèba, cívwa mbwanààbutè abu. Kàvwa ùcyùka bwà mùshindù wùvwà wùkèngela bwà kubùpetayè nànsha; ùvwa ànu ne cyà kubùpeta. Nè Nzambi wàkamutwà mushinga.

298 Nènku, díbà adi, ncintu ànu cyôci cimwècimwè aci leelù ewu, kùdi muntu wa mubidi, wa meeji à musunya, wa meeji à pa buloba. “Èè, mémè's ndi mwena èkèleeziyà wa ditùnga. Ndi mwena èkèleeziyà *kampànda*. Ndi mwena èkèleeziyà *kansanga*.” Aci kacyèna naaCì nè dipetangana to nànsha dikesè.

299 Tàngilàayi, ùyisangisha mpindyewu pa kàbalù kèndè kàà meekala masambakaja aku. Ùdi munkaci mwà kuyisangisha pàmwè, pa kàbalù kèndè kàà meekala masambakaja aku, bwalu yéyè ùdi nè bukòlè bwà cidìidi.

300 Kanwènaayikù nwithabuuja nè ùdi naabù anyi? Mfùmù wa ditùnga ewu mmusungùdìibwe bìshi utùdi nendè ewu? Ciinè aci ncidifindèku nànkù bìshi's? Uh-huh! Balwè muneemu emu bwà budìshikaminyi bwà ntèndeleele; kàdi nwènù musùmbà wà ba-démocrates aba bàdi baswè kusùmbisha bwanààbutè bwènù ku cidìidi! Mémè ncyèna nè. . . Kasùmbù kàà ba-démocrates kàdi ànu kimpè; twónsò túbìdi ntubolè. Mémè ndi ngàakula bwà bwena Kilistò. Kàdi nwènù mbàdi bàsùmbishà bwànààbutè bwènù, pa dileeja dyà mpàla dyà ba-démocrates, bwà kusungula cintu cyà mùshindù awu. Bundù bwènù's!

301 Kanwènaayikù bamanyè nè ditùnga edì, ànu mùdìbi menemene, didi cimfwànyì cyà Izalèlèlà anyi? Izalèlèlà wàkenza cinyi? Wàkalwa mu buloba bwenyi, nè kwipata beena kalaba nè kubàshebeya kumana, kubwelabò è kukwàtabò buloba abu. Cyôci aci ke citùdi twètù benzè; ba-Indiens. Bwòbò abu ke beena Àmèrikè balelèlà bàmwèpelè bàdiku, mbalundà bèètù ba-Indiens abu.

302 Nè pashìshe bààkenza cinyi? Izalèlèlà wàkapeta bàmwè bantu banène. Lwà ku mbangilu. . . Bààkapeta Davidì, nè bààkapeta Solòmò. Bààkapeta bantu banène. Ke ndekeelu

wa byònsò kupetabò muntu kampànda mupidyè diitabuujá muntwamu, Aakàbà, wàkasèla Izàbèlà, mwena bupidyà.

³⁰³ Èè, s'ke cintu ànu cyòci cimwècimwè aci citùdi twètù benzè. Tudi bapetè Washington nè Lincoln, kàdi anji tàngilàayi ànu citùdi naaci mpindyewu. Nè cintu ciinè cìdiku, cìdi nè, mmusèlàngàne, nè mutùkija nè mulaaba mpenci mu myòsà yà mùkòòkò bwà Izàbèlà. Yèyè's mmufwànyine kwikala mulùmýànà wa mùshindù mulengakù ndambù, kàdi mukàji ngwìkala mwà kulombola maalu. Nènku nwènu's nudi bacimòne mpindyewu, dìkù dijimà didi munkaci mwà kubwela.

³⁰⁴ Ncinyi cyàkangambilà Nyumà Mwimpè, kùkaadi bidimu bitwè ku makùmi àsàtù nè bitaanu? Nè nwènu bàà bikondo byà kale abu's nudi bacimanyè, bintu mwandamutekètè bìvwà mwà kwenzeka kumpàlà kwà kwenzekabi. Nè eci ncintu cyà ndekeelu, cyà kumpàlà kwà cyà ndekeelu, cìvwà cìlwa. Bikwàbò byònsò mbyenzèkè ànu kantu nè kantu, too nè ku mvità nè bikwàbò byònsò. Nwamònu anyi? Nè patùdi twakulangana apa didi mu byanza, muntu mukàji, bwà kukookesha ditunga edi. Izàbèlà! Nwamònu anyi?

³⁰⁵ Kàdi, vùlukàayi nè, mu matùkù à Izàbèlà awu, muntu kampànda cyà bushùwà wàkabàmbila cìvwàbu. Nwamònu anyi?

³⁰⁶ Didisanga, pa kàbalù kààbò kàà meekala masambakaja aku. Nènku, nwamònu's, ùdi munkaci mwà kusanga cintu eci, cisambakaja nè twitàbàayi, dingumba, malongesha makwàtakaja kùdi bantu. Ncyà bushùwà anyi? Bushùwà, diikala disambakaja, diikala disambakaja dyà kàbalù kafwè, kàà cisengàsengà kàà pa buloba! Mpindyewu, aci ncyà bushùwà. Meekala masambakaja à mmwènekèlu mufwè, wa pa buloba wa kàbalù kàà cisengàsengà, kaa, ekelekele, kakuyi Mashi à cijila à Dìyi to, nànsha kakesè!

³⁰⁷ Nènku tàngilàayi. Kuumukila mu ditengu... “Kuumukila ku ntengu yinaayi yà buloba, nkùdìbo bàbàsangisha; ùbàsangisha ku Hààmàgiidònà,” mùdi Bible mwambè. Mèmé ndi nteeta kwela meeji ku Mifundu, mùndi muyifunde kaaba aka. Ncyèna nyitèèla to; kàdi ànu mwaba wùdiyì mifùndiibwe, kumòna cidiyi. “Ùdi ùbàsangisha pàmwè, bwà ditùkù dinènè dyà mvità dyà Mukalenge Nzambi.” Tàngilàayi. Mpindyewu, pa kàbalù kàà meekala masambakaja aka, kàà pa buloba, kàà cisenàsengà, kàdi kàsaamà aku, anji elànganaayipù meeji; nudi bamanyè's, aci's ncintu cibi. Mpindyewu tàngilàayi nùmonè kùdiye ùkabàsangishila: “Kuumukila ku ntengu yinaayi yà buloba.” Bàdi munkaci mwà kudìsangisha mpindyewu bwà diteetangana dyà makàndà. Diteetangana dyà makàndà nedìikadilè ku “Hààmàgiidònà,” bilondèshile Dìyi. Nwamònu anyi?

³⁰⁸ Pa kàbalù kàà cisengàsengà, mubàndepù, nè “Lufù” lulamika, anyi, nè dìnà dimulamika nè “Lufù,” mufwilakanyi

nè Kilistò awu's! Tèelejàayi. Mufwilakanyi nè Kilistò, dingumba dyà kumpàla (aci kí ncyà dyela mpatà to); mwikàle nè Izàbèlà wendè, ndumbà bwà Dìyì; mwikàle nè bânà bèndè bàà bakàjì, pàmwè nendè, beena Mishòonyì; biikàle bàdisangisha pàmwè mpindyewu mu bwobùmwè's!

³⁰⁹ Nuvwakù bumvwè ba-Baptistes bàakula dīngà ditùkù kaaba aka, nudi bamanyè anyì? Huh? “Kaa, katwàkudisanga naabò to, kàdi netwikalèku—netwikalèku nè musàngeelu wà mu mùshindù kampànda bwà kudyà naabò bulundà. Kabyàkukèngela bwà twètù kwikala bàà mu èkèleeziyà wabò to, kàdi...” Ki byalu mbwòbù abu's. Ki bwalu mbwòbù abu's, ànu menemene cyàkambà Dìyì's. Nwamònu anyì? Nwamònu anyì? Ndumbà wa kale's, ànu kwìnè kwònsò aku, nwamònu's.

³¹⁰ Mpindyewu's ki bwòbò aba, ùbàsanga pàmwè, batàngile ku diteetangana dyà makàndà adi, ku Hààmàgiidònà aku, nè mubànde pa kàbalù kàà meekala masambakaja; mwikàle nè kàbalù kàmwè kàà katòoke, kàbalù kàmwè kàà kakünze, kàbalù kàmwè kàà kafiike. Tùsàtù atu, tushìllàngàne: bukolè bwà maalu à cidiidi—maalu à cidiidi, bukolè bwà maalu à nyumà, bikòntonona kùdi bukolè bwà démon, mbwena kwamba nè mufwilakanyi nè Kilistò. Mwikàle ùsambakaja byònsò abi pàmwè, nènku udi upeta kàà cisengàsengà, cintu cyà mmwènekèlu wa lùyòwayòwa cidiye mubàndepù. Cyà bushùwà. Mpindyewu mònaayi. Tàngilàayi cidiye mubànde aci, kàbalù kàà mmwènekèlu wa cisengàsengà, kàà diikala difiikùlùke, disambakaja nè difiike, dikünze, nè ditòoke; mutàngile ku mvità, ùsangisha bantu bèndè bùùmukila mu ditungà dyònsò mwinshì mwà Dyulu! Danyèlè kààkumvwijakù cilòòtà, nè kààkamònakù kashoonyi kàà cyamù cifiike aku kabwelè mu bukalenge nè bukalenge bwònsò anyì, kàà Loomò aku? S'ki bwòbò bàlwalwà aba, biikàle bàdisanga.

Mpindyewu shààlaayi basòmbe bapùwe bwà kujikija, ànu bwà katanci kakesè, nè tèelejàayi nè ntèmà.

³¹¹ Ke kudisangabò eku mpindyewu bwà kucyènza, mwikàle ùtwàla bantu bèndè bàfùmina ku ntengu yinaayi yà buloba; mubànde pa kàbalù kàà cisengàsengà, kàà lùyòwayòwa, kàà meekala àsàtù, masambakaja. Muntu umwèumwè awu's!

³¹² Mpindyewu, mu Bwàkabuulwibwà 19, kabiyi ànu nè yèyè ùdi munkaci mwà kudilongolola to, kàdi Kilistò ùdi munkaci mwà kudilongolola bwà kutwilangana nendè. Mvità ayi neyìikalè yà kàmpudimàta nè yà basùminyinàngàne naayi. Kilistò, mu Bwàkabuulwibwà 19. Kilistò mmusangishe Bèndè, kabiyi kuumukila ku ntengu yinaayi yà buloba to, bwalu nekwikalè bàshààdilè ànu bakesè menemene. Yèyè cidiye wènza ncinyi? Ùdi ùbàsangisha kuumukila ku ntengu yinaayi yà Dyulu. Netùbàngàtè, “misùukà yidi mwinshì mwà cyoshelu ayi,” mààlabà dilòòlò, nènku nenùmonè ní ncyà bushùwà, ní kí ncyà

bushùwà. Ntengu yinaayi yà Dyulu; pa kàbalù katòòke bu nêjè aku's!

313 Yèyè ùdi pèndè nè Dìnà, kadiyi lufù to, kàdi, “Díyì dyà Nzambì,” Mwoyi. Amen. Ùdi naadi difùnda pa cibelu Cyèndè apa nè: “Díyì dyà Nzambì.” Aci ki Mwoyi wùmwèpelè, bwalu Nzambì ngudi mfùky'a mukèlè umwèpelè wa Mwoyi wà Cyèndèlèlè wudikù. Zoe! Ncyà bushùwà anyi?

314 Nènku Yèyè mmufunde nè: “Mwoyi,” mubànde pa kàbalù katòòke; kàdi ke muntu nyèyè ewu mwikàle nè makolè àsàtù mashìilàngàne masambakaja, bàmubiikila nè “Lufù.” Mwikàle ùsangisha baaminyàmpalà bèndè bàdi bàsanganyibwà pa buloba; nè Kilistò ùdi ùsangisha bantu Bèndè, bansantu, bàdi balediibwe mu Dyulu abu. Wàwa yèyè ùdi nè dìnà nè “Lufù” dimufùnda pambidi; Kilistò ùdi nè dìnà nè “Mwoyi” diMufùnda pambidi.

315 Bàdi Nendè abu, bwòbò pààbò, mbabànde pa túbalù tutòòke, nè bàdi bàbiikidiibwa nè: “Basungula kumpalà kwà difùkà dyà dyulu nè buloba.” Amen! Nè bwòbò bàdi nè lulamatu ku Díyì. Amen! Yoyòyò! Mémè ndi muswè aci nànkù's. “Babiikidiibwe, basungula, kumpalà kwà difùkà dyà dyulu nè buloba.” Nè pashìishe, biikàle nè lulamatu ku Díyì, ku disungula dyàbò, bwònsò basalùdiibwe kùdi mvinyò mupyamùpyà nè Maanyi, biikàle ànu bènda bàlwa babànde pa túbalù, bènda bàpweka bwà kuya katwilangana nendè. Mbamanyè nè Mikungulu nyiikalà mwà kumanyisha cintu aci bwètù twètù, àbìdì àdì panshì aa. Nwamònu anyi?

316 Tàngilàayi. Mmunyi mùdiye ùcyènza? Pa nànkù, piikalàbi nè Yèyè ke udi Díyì, nè Dìnà Dyèndè diikàle Díyì, dîbà adi Díyì's ndidì Mwoyi. Mufwilakanyi nè Kilistò; cyònsò cidi *cifwilakanyi* cidi “cibèngàngàne,” pa nànkù *cifwilakanyi* mbwena kwamba nè “cibèngàngàne” nè Kilistò, Díyì. Pa nànkù, cidi nè cyà kwikala twitabàayi, anyi dingumba, bìdì bibèngàngàne nè Díyì.

317 Mòna's, mémè ncyènàku mmòna muwikalà mwà kucipicila ku luseke to. Bu wèwè—wèwè mwà kucyumvwa, mmunyi mùdiku mufwànyine kucipicila ku luseke? Mémè ncyènàku mumanyè muwikalà mwà kwenza nànkù to.

318 Nènku aci's ncilelèlè. *Mufwilakanyi* mbwena kwamba nè “mubèngàngàne.” Aci kí mmwòmò anyi? “Kuumushila ku.” Ke civwàye yèyè ncyòci aci. Yèyè mmubànde pa kàbalù kèndè kasambakaja aku. Twacimònu apa mene mu Díyì dyà Nzambì emu.

319 Tudi bacimòne mu bikondo mwandamutekètè byà èkèleeziyà mene amu. Ke Yèyè ewu ùcyàluja cyàkàbìdì mu Bitampì abi, ùkàngula nè ùleeja bintu bivwà byenzèke abi, mu bikondo byà èkèleeziyà amu.

320 *Mufwilakanyi* mbwena kwamba nè “mubèngàngàne” nè Díyì. Nudi numòna nè mbwà cinyi, twitabàayi, bwà cinyi

tudi tutàmba kubèngangana nè twitabàayi nè màngumba anyi? Mbwalu bìdi bibèngangana nè Dìyi. Nwamònu anyi?

321 Ki twètù aba tumòna Mwoyi nè lufù bikafika ku mvità yàbì yà ndekeelu. Kàbalù katòòke, kàà Mwoyi mulelèlà; kàbalù kàà cisengàsengà, kàà twitabàayi misambakaja. Bàdi bàmona cintu aci cikafika ku—ku diteetangana dyà cyà bushùwà dyà makàndà.

322 Mpindyewu ndi muswè kwambakù cintu kampànda kaaba aka. Nudi bafwànyine kubènga kucitabuujà. Kàdi mvwa mucikenkète, bwà kwikala mutwìshìibwe. Kùtu diikala dyà ku cibangidilu ànu òmwèpelè, nè diinè adi nditòòke. Mbanganyi bàdi bamanyè nàнку awu? Kùtu diikala dyà ku cibangidilu ànu òmwèpelè. Cìkwàbò cintu kanà cyònsò, ncisambakaja.

323 Kilistò ùdi pa Dìyi ditòòkè dyà tòò, kadiyi disambakaja to, kacya ku cibangidilu. Amen! Amen! Diikala dyònsò edi òvwa òfwànyine kwikala ditòòke bu nè mushìndà kampànda kawùvwa mwenzelamù to. Amen! Butùmbi's wè! Èkèleeziyà yònsò ewu ùvwa mufwànyine kwikala mwimàne pa Dilongesha dyà bàpostòlò dyà Dìyi dyà Nzambi, nè Nzambi mwikàle ùDishìndika, bu nè kàvwakù nè twitabàayi anyi màngumba masambakajaMù to. Ki bwalu mbwòbù abu's.

Kaa, Mwanèètù Evans, ndi ndyùm vwa bìmpè mpindyewu mene's! Èyowà's, mukalenge. Èyowà's, mukalenge.

324 Diikala dyà ku cibangidilu ànu òmwèpelè, diinè adi nditòòke. Kacya kaditukù—kacya kaditukù disambakaja nè màngumba anyi twitabàayi to. To, mukalenge.

325 Nènku, vùlukàayi nè, bansantu Bèndè mbavwàdika mìzàbì mìtòòke, kayiyi misambakaja nè màngumba nè twitabàayi to. Mpindyewu tudi tujandula nè, twitabàayi yà màngumba ayi, ki pòpò apa panùdi nupetela diikala dyènù disambakaja adi. Kàdi apa mpa diikala dyà ku cibangidilu pàdìYe mubànde. Diikala dyà ku cibangidilu òdì pa bantu Bèndè. Nè bwòbò mbazabika mu Mashi, àdì makezùle civwàlu aci awu, nè macyàlùje buludi kwàka. Nwamònu anyi? Aci ncyà bushùwà.

Aba bàdi basambakàjìibwe, mbandàmùke balwè cisengàsengà nè bàyaaya ku lufù.

326 Nditwìshà maalù katungu, dinyangakaja, bwà kusambakaja meekala nè ditòòke; udi unyangakaja diikala dyà ku cibangidilu. Ncyà bushùwà anyi? Pìikalàbì nè diikala dyà ku cibangidilu, diikala òmwèpelè adi, nditòòke, nè wèwè usambakajamu cintu kampànda, s'udi unyangakaja kiipàcilà kààdì kàà cyà bushùwà. Amen. Ncyà bushùwà anyi?

327 Nènku, òbà adi, pìikalàbì nè Yèyè ùdi kàbalù katòòke, nè Ùdi Dìyi; òbà adi, kusambakaja cintu nè Cyòcì aci, twitabàayi wa mùshìndù kana wònsò, kuKùsàkidila òyi òmwè, kuKùùmushila Dìyi òmwè, aku nkunyangakaja kwà cintu

cyònsò mu kaabujimà. Kaa, ekèlekèlè! Ndamèku pàmwè nè Dìyì's, Mukalenge!

³²⁸ Bulelèlè nè ntùpàkànyì's! Kaa, ekèlekèlè! Nànsha cyòci aci ciikàlè cìmpè cyà bìshi. . . Bulelèlè nè ntùpàkànyì kabyèna mwà kusambakanakù to. Kabyèna mwà kusambakanakù nànsha. Anyì cìdi EMU MMÜDÌ MUKALENGE WÀMBA anyì ncyà mashimi. Nànsha byòbì nè ntaatù kaayì wa bunsantu udi mucyàmbè, Bonifer Munsantu, anyì—anyì mwèpiskòpò wa mutàmbidile wa mu Canterbury; mèmè ncyèna mumanyè nè nganyì udi mucyàmbè to. Cyòci cibèngangana nè Dìyì, ndinyangakaja. Kacyàkusambakanakù to. Wèwè wamba nè: “Mòna's, muntu ewu's mmwenzè. . .” Cìdiye mwenzè nànsha ciikàlè cinganyì, nànsha yèyè mwikàlè wa cijila mùshindù kaayì, anyì cintu kanà cyònsò cyà mùshindù awu. *Eci* ke Bulelèlè bùmwèpelè bwà buludì butùdiku naabù. Èkèleeziyà nànsha umwe, twìtabàayi nànsha umwe, kèna nè Bulelèlè nànsha bukesè to, pìikalàbi pambèlù pàà *Eci* nùnkù.

³²⁹ Kàdi wèwè ndeejèku umwèpelè udi naaBù. Ndi muswè ànu, ndi muswè bwà ùngambilè. Mèmè nèmбуululè dibèji mu Bible, nkuleeje cintu kampànda. Nwamònu anyì? Anji tèèlabì umwèpelè cyanààna. Wèwè udi wamba nè: “Beena Mpenta.” Kaa, ekèlekèlè! Ndi mfùma ku dibàkula meejì awu kùdi muntu kampànda kunùdi aku. Ke bwà cinyì ngàmbì cyòci aci. Mbipicìibwe nè mèmè mucilekèlè, mpindyewu mene, bwalu ngàmònu cyòci aci cikasalùlè bwalu bwà bùfìikishangana munda. Ncìvwa—ncìvwa muswè kukutàpa ku mwoyi to, kàdi mvwa—mvwa muswè ànu bwà wèwè kumanya ne ndi mumanyè cyúvwà udyàmbidila aci. Wamònu anyì?

³³⁰ Aba bàdi basambàkàje, bakùdimùne (mufwilakanyi) cilwè lufù abu. Bàdi bàkùdimuna diikala dyà lufù, paùdi usambakaja cintu kanà cyònsò cyà mùshindù kanà wònsò nè cyà ku cibangidilu.

³³¹ Bìdi ànu mwàkamba Kilistò bwà lutete lwà mùtâdà amu's. Kàdi pààbì, nkaalutete kàa katàmbe bukesè ku ntete yònsò, kàdi kakàakubwelakanakù nè cintu nànsha cìmwè to. Mùtâdà kawàkubwelakanakù to. Lwòlò mmùtâdà mushùwashùwàlè. Pa nànkù wèwè nè diitabuuja bùngì abu, ikàlà ànu mushààle ànu kacya wakwàtakù.

³³² Mònaayi's. Mwoyi wàkalonda, mubàndi wa pa kàbalù katòòke, Úvwa Dìyì, Mwoyi, mushìndika kùdi bansantu Bèndè babìke ku lufù bàvwàYe Naabù. Mpindyewu mvità ayi neyènzekè bìshi?

³³³ Yesù wàkamba nè: “Ewu udi ungiitabuuja Mèmè, nànsha byòbì nè ùvwa mufwè, nànsha nànkù yèyè neikalè nè mwoyi.” KwambaYè nè: “Wèwè mungiitabùùje Mèmè, nànsha byòbì nè uvwa—uvwa mufwè, nànsha nànkù newikalè nè mwoyi. Nè ewu yònsò udi nè mwoyi nè ùNgiitabuuja kàadyakufwàku to.”

Kàbidì, Yéyè wàkamba nè: “Ewu udi ungiitabuuja Mémè. . . Yéyè neàmupèèshè Mwoyi wà Cyendèlèlèlè, neàmubiishè ku lufù ku matùkù à ndekeelu.” Awu mMufùndù Wèndè mulaya.

334 Ke Sataànà ulwàlwa ewu, nè ntengu yònsò yinaayi yà buloba, nè beena Mishòònyì bèndè nè beena Kàtòlikè bèndè—bèndè abu, nè bwònsò abu pàmwè, bènda bènda batàngile ku Mvità yà Hààmàgiidònà. Èyo.

335 Kàdi ki Yesù ulwàlwa ewu, wènda ùtùùluka ùfùmina mu Dyulu, pàmwè nè bansantu babiishibwe ku lufù, Dìyi dishindika.

336 Ntu mwambè nè, piikalàbi nè Nzambi ngudi mwakùle, anyì ngudi ukutùma, Yéyè ùdi. . . Ùdi—Ùdi ùtwa byùdi wamba abi nyama ku mikòòlò. Nwamònu anyì? Mònaayi nè, pawikalà mùlòpò wa ku Dyulu, Dyulu dijimà didi paanyimà pèèbè. Nè Dyulu ndyenza nè Dìyi. Uh-huh.

337 Mònaayi nè, mpindyewu, mMulwè nè bansantu babiishibwe ku lufù, mwikàle ùshindika nè Dìyi Dyèndè ndilelèlè.

338 Pa nàнку Sataànà ùdi ùmanya, dìbà adi nè, ciinà cidi kaciyi nè ndekeelu cikaadi cimana kumulongolwela. Nwamònu anyì? Kaa, ekèlekèle! Dìbà adi, lufù lùwwa lubànde pa kàbalù kàà cisengàsengà, twitabàayi nè màngumba bisambakaja, biikàle bìmulonda, kaa, ekèlekèle, bitàngile ku ditàpuluka dyà Cyendèlèlèlè nè Nzambi. Kwòkò aku ke kùvwàye ùya naabò mubàbànde, ku ditàpuluka dyà Cyendèlèlèlè.

Kilistò ùwva ùya mu Butùmbi mubànde pa Èkèleeziyà Wèndè, mu dibìshiiibwa dyà ku lufù.

339 Mònaayi mvensà wa 8 mpindyewu, ànu mene. . . citùpà cyà ndekeelu cyà mvensà wa 8 awu aci, patùkaadi tujikija apa, nwamònu’s.

. . . bukòlè bwàkabàpèèbwa. . .

340 Mbanganyi “abu”? Nwamònu anyì? Èyo. Mufwilakanyi nè Kilistò, ùbiikidiibwa nè “Lufù.” “Ìfernò ùwva wènda ùlonda.” Tàngilàayi nùmonè màyelèlè èndè à bintu binaayi awu.

341 Mufwilakanyi nè Kilistò, kàbalù katòòke; ùshebeyangana mu nyumà, mwikàle mufwilakanyi nè Kilistò; dishebeyangana dyà mu nyumà.

342 Nombà mwibidi, kàbalù kakùnze; ùshebeyangana ku mwelè wà mvità; bukòlè bwà cidiidi, pàakadisangà èkèleeziyà nè mbùlámàtadi.

343 Kàbalù kafike; misùkà, pàakapàtulàye dilongesha dyèndè, nè kwenzayè mwaba awu nè masandi èndè awu. Nèngu kupimayè bujitu bwà byàkudyà byàbò, ku. . . kubàsùmbishayè byàbò. . . bivwàbo bàfila bu byàkudyà abi, bwà cipimu cyà bujitu, nè meeyà, nè bikwàbò.

344 Ciinâyi, kàbalù kàà cisengàsengà; ditàpuluka dyà Cyendèlèlè nè Nzambi. Kàbìdì, inaayi, nwamònu's. Kaa, ekèlekèlè!

Butùmbi bwikalè kùdì Nzambi's wè!

345 Mpindyewu, cyà ndekeelu, mu kujikija emu. Bwà aba... Nudi nè... Ngàpìcishi dîbà, kàdì nudikù mwà kuswà bwà kumpèèshakù tusunsa tukwàbò tutwè ku dikùmi anyi? [Disangisha dìdì dyàmba nè: "Amen."—Muf.] Ndi mupetè mabiikila búngì cyanààna, leelù ewu, pà—pa dyakula dyànyì dyà kaaba aka edi.

346 Kùkaavwa kujuukè dikolesha dyà maalu búngì cyanààna, pa bwalu bwà Eliyà, mu mùshindù wà nè bìdì ànu... Bàdì—bàdì bàpooelapù bamba kufwà. Nè wèwè udi mwà... Èè, lekèlè ànu... Nzambi ànkwàcìshèku bwà mèmè nnùkwàcìshe bwà nwènù kumòna cìndì munkaci mwà kutàngila eci. Nudi baswè nàнку anyi? Twánjàayi ànu kuteeta's, nwamònu's.

347 Mpindyewu mònaayi, bwà kujikija, bwà aba bàdì kabàyi bìtabuuja nè mùsànjeelà wa ndekeelu wa cikondo cyà ekèleeziyà ng' Eliyà mupròfètà, muntu mulaaba mu mulongo awu.

348 Paanyimà pàà lufù... Tàngilàayi. Paanyimà pàà lufù, lwà cikondo cyà ekèleeziyà cyà ndekeelu eci... Mpindyewu, nùmònaayi cyàkenzekà, nwamònu's. Paanyimà pàà lufù, mibidi yàbò mifwè mmisùnsulula kùdì nyama yà cisuku. Aci's nudi bamanyè. Mpindyewu, aci ncilelèlè. Ànu mùvwà yàbò amu, yivwa nè cifwànyikijilu cyà Izàbèlè.

349 Mpindyewu buulùlaayaaku mu Bwàkabuulwibwà 2:18 nè 20. Ndi ngèèla meeji nè twangàci aci kwènji ànu ndambù wa tusunsa cyanààna. Kî mmwòmò anyi? Èyowà, ngèèla meeji nè tùdì tufùma ku dicyàngata. Mvwa mucifunde kaaba aka kùkaadi ndambù wa... Èyowà. Cikondo cyà dinyanguka dyà maalu à nsòmbelu, ke cìvwàci's. Mònaayi mùvwàbì, mwàkabwelà Izàbèlè. Mpindyewu, Izàbèlè mmaèkèleeziyà, ekèleeziyà wa cyena-leelù ewu; mpindyewu, kî m' Mukàji-musèla to. Izàbèlè, mu Dipungila Dikùlukula, ùdì cifwànyikijilu cyà ekèleeziyà leelù ewu, bilondèshìle Dìyì dyà Nzambi, dyà Bwàkabuulwibwà 2:18, 20.

...wèwè udi witaba bwà mukàji awu Izàbèlè, udi mudìbùkìlè mùdiye mupròfètà mukàji, ...

350 Nwamònu anyi? Mmwòmò anyi? Mpindyewu, mmuleejìbwe ànu menemene mu cifwànyikijilu cyà Izàbèlè. Mpindyewu, wa kumpàla...

351 Tudi bafwànyine kunùpèèsha ànu Mufùndù ku Mufùndù, nwamònu's, bwà nè cikondo cyà ndekeelu m' Mukenji wà cipròfètà mutùmina Èkèleeziyà, wùbàbìkila bwà kwalukilabò ku Dìyì dyà ku cibangidilu. Mpindyewu mònaayi. Mmwòmò anyi? Maalàkì 4 mmwambè nàнку, nè mikwàbò,

Bwàkabuulwibwà 10:7, ànu nànkù. Nwamònu anyi? Yesù Yéyè mwinè wàkadyànjila kucyàmba, ànu nànkù, ànu nànkù, ànu nànkù. “Ànu mwàkadibi mu matùkù à Lotà,” nè bikwàbò byà mùshindù awu, ànu nànkù. Mbitùngùnùke nè kwenda kulwa ànu nànkù.

³⁵² Izàbèlè ùdi cifwànyikijilu cyà èkèleeziyà wa cyena-leelù leelù ewu bwalu Kàtòlikè nè Mishòònyi mbadisangè mpindyewu. Kakwèna—kakwèna dicicinguluka nànsha dikesè to. Wònsò àbìdì awu mmàngumba, pa nànkù àdi ànu—àdi ànu maamù nè mwanèdè wa bakàjì, kì cyònsò cidiku. Bàdi bàkòkangana nè bàtàngangana ewu nè ewu, kàdi bàdi cintu ànu cyòci cìmwècìmwè aci, bwònsò bàbìdì bàdi baandumbà. Mpindyewu, kì mmémè udi udyàmbila aci to. Ndi ncitèèla kwangacila mu EMU MMÙDÌ MUKALENGE WÀMBA. Nwamònu anyi? Èyo.

³⁵³ Mpindyewu tudi tumòna nè, wàkashebeyàbo ku díyì ditùmà dyà Nzambì awu, ùvwa ny’Izàbèlè, wàkashebeyiibwa bwalu Nzambì wàkatùma Yehù kuntwaku nè kumwimanshilayè pambèlu pa dididiishì, nè kushebeyayè Izàbèlè awu. Nè mbwa yàkadyà munyiinyi wèndè (Mmwómò anyi?), Izàbèlè wetù wa mubidì awu. Aakàbà, mfùmù wèndè, mutù wèndè awu, mbwa yàkalàka mashi èndè, ànu mwàkadyànjilà kwamba Eliyà wa kumpàla awu. S’nudi bamòne kutùyaaya, kì mmwómò anyi?

³⁵⁴ Bwà cinyi? Eliyà wa kumpàla awu ùvwa muntu mubèngiibwe, kùdì maèkèleeziyà. Nènku Izàbèlè nè Aakàbà ke bàvwà kumutù kwà maèkèleeziyà awu, èkèleeziyà nè mbùlámàtadi, byònsò pàmwè. Nènku Elishà wàkabuulwila Aakàbà mpèkaatù yèndè, nè wàkatùmina èkèleeziyà mujimà díyì bwà kukùdimukabò kwalukila ku Díyì dilelèlè.

³⁵⁵ Aci cyòci kaciyi ànu menemene cìdì Eliyà mwibidì nè cyà kwenza pààlwàye kùdì èkèleeziyà ewu mu ditùkù edi, “kwalujulula Diitabuuja dyà ku cibangidilu” to! Mémè ncyèna mmòna munwikalà mwà kupàndukaKù to. Ncyà bushùwà. Kùdimukàayi nwàlukilè ku Díyì dilelèlè! Ncyà bushùwà.

³⁵⁶ Mpindyewu nwènù baswè kumòna mibidi yàbò, tùbuululàayi mu Bwàkabuulwibwà 19 emu, paanyimà pàà—paanyimà pàà Díyì dimanè kubàshebeya. Mpindyewu, Díyì ndiikalà mwà kubàshebeya. Aci kaayi nudi bamanyè. Èyo. Mpindyewu anjàayi ànu kutàngila bwà kumòna díbà dyà Dilwa dyà Kilistò, mu Bwàkabuulwibwà 19, kubangila ku mvensà wa 17.

Nè ngàkamòna mwanjèlò kampànda mwimàne mu díbà; . . .

³⁵⁷ Mpindyewu, apu ndyàkàmwè paanyimà, tàngilàayi kumutù eku: “Nè cinkutu Cyèndè cìvwa cizabika mu mashi. Nè Ùdi ùbìkidiibwa nè MFUMÙ WA BAMFUMÙ, NÈ MUKALENGE WA BAKALENGE.” Mu mvensà wa 13: “Ùdi ùbìkidiibwa nè n’Diyi dyà Nzambì.” Nwamònu anyi? Mpindyewu, apa

Ûdi: “MFÛMÛ WA BAMFÛMÛ, NÈ MUKALENGE WA BAKALENGE.”

Nè ngâkamòna mwanjèlò kampànda . . .

358 Mpindyewu tàngilàayi. Ûdi ùseemena.

Nè mukana mwèndè mùdi mùpàtuka mwelè wà mvità musàkisha, bwà wàmòna mwà kutàpa naawù matùnga: . . .

359 “Mukana Mwèndè mùpàtuka,” byenzè bu kupàtuka mukana mwà Nzambì kuya mukana mwà Mòsà’s. Nwamònu anyi?

. . . nè yèyè neabàkòòkèshè nè dikombo dyà cyamù cifiike: nè . . . ùdi ùdyatakaja cikàminu—cikàminu cyà mvinyò wa lwonji nè ciiji cicolè cyà Nzambì wa Bukolè bwònsò.

Nè ùdi pa cinkutu cyèndè nè dìnà . . . pa cibelu cyèndè dìnà difùnda nè: MFÛMÛ WA BAMFÛMÛ, NÈ MUKALENGE WA BAKALENGE.

Nè ngâkamòna mwanjèlò kampànda . . .

360 Mpindyewu tàngilàayi. Mpindyewu Ûdi ùseemena, munkaci mwà kutàpangana. UdiYè ùtàpa nganyi? Izàbèlè nè Aakàbà wèndè awu, mupròfetà wa mashimi awu.

Nè ngâkamòna mwanjèlò kampànda mwimàne mu dibà; nè wàkeela lubilà lwà dìyi dikolè, wàmabila nyuunyi yònsò yà mu lupeepèle munkaci mwà dyulu nè: Lwàyi nùdisangìshe bwònsò pàmwè ku cyàkudyà cyà dilòlò cyà Nzambì munène.

361 Ûdi ùbèèlela nyama nè nyuunyi. Mpindyewu tàngilàayi lwà apa mu nshapità mukwàbò ewu emu, wa Mukàndà wà Bwàkabuulwibwà ewu. Nènku, katanci kakesè cyanààna: “Kushebeya nè mwelè wà mvità, nè lufù, nè nyama yà pa buloba.” Nwamònu anyi? Èkèleeziyà Izàbèlè, mubidi wèndè (wòwò mwine,) ngwà wùdiibwa kùdi nyuunyi nè nyama yà pa buloba. Ànu menemene mwàkadì Aakàbà nè Izàbèlè amu, mu mubidi emu, ki mwikalàbo nè cyà kwikala, nè mmmwènekelu wa nyumà, èkèleeziyà. Nudi bamòne cìndi njinga kwamba aci anyi? [Disangisha didi dyàmba nè: “Amen.”—Muf.] Èyo.

362 Eliyà . . . Kaa! Eliyà ùvwa mupròfetà mu matùkù à Aakàbà nè Izàbèlè, mu mubidi. Nè mbilaya nè yèyè neenzè cintu cimwècimwè aci, bilondèshile EMU MMÛDÌ MUKALENGE WÀMBA, mu Dìyi, kùdi Izàbèlè, mu nyumà; mmmwènekelu wèndè wa Nyumà wa mudimu wà bwambi.

363 Tàngilàayi. Eliyà, nànsha nànkù, mu ditùkù dyèndè, mushìndìkùibwe mu mùshìndù mukùmbànàngàne nè wà ndòndò, kààkapeta mwà kubàkùdimuna kubààluja ku Dìyi to. Mmwòmò anyi? Nànsha nànkù, Eliyà wàkateeta, nè mwèndè mwònsò. Wàkenza mwèndè mwònsò. Wà—wàkabàleeja bimanyinu nè

maalu à kukèma; kàdi bwòbò bàakamuseka bamutàngile mumpàla. Mùshindù wùmwèwùmwè awu ngwènzàbo nè wa nyumà ewu, nwamònu's. Kààkapeta mwà kubàkùdimuna kubààluja ku Dìyì to. Pa mìliyò. . .

³⁶⁴ Mpindyewu tèelejàayaaku, èkèleeziyà, nè ntèmà mpindyewu, nwènu bàdi nè cibwejàkàji ndambù pa bwalu ebu.

³⁶⁵ Pa mìliyò yìvwàku pa buloba, mu matùkù Eliyà, pàvwà Izàbèlè nè Aakàbà bàkòokesha, bu—bu cifwànyikijilu cyà mubidi wà cintu leelù ewu; pa bùngì bwà bàà pa buloba bujimà, kùvwà ànu nkàmà mwandamutekètè bàvwà basùngidiibwe, ku diyiisha dyà Eliyà. Ncyà bushùwà anyi? Ncyòci aci menemene.

³⁶⁶ Tàngilàayi, Eliyà kàvwakù nànsha mene mumanyè nè umwe wa kùdìbo ùvwa mu mùshindù awu to. Ùvwa ùdyàmbidila nè yèyè ke umwèpelè uvwa musùngidiibwe, too nè pàakalwà Nzambi kukàngula cimwè cyà ku Bitampì nè kumuleeja bwalu busokoka mu Mukàndà amu nè, Ùvwa naabò nkàmà mwandamutekètè bàvwà kacya kabàyikù batwè cinù kumpàlà kwà twitabàayi yìvwàbo naayi ayi to. Pàakakàngwilà Nzambi Eliyà Mukàndà Wèndè awu, wàkamba nè: “Mpindyewu anjì indilà kakesè, mwanàanyi. Ndi nè nkàmà mwandamutekètè bàdi balama, kuntu kwàka, bàdi nè mènà mafùnda mu Mukàndà kacya ku difùkà dyà dyulu nè buloba. Mbàanyi Mèmè.” Yoyòyò! Nzambi kukàngula Bitampì.

³⁶⁷ Ke bwà cinyi ndi ngèlè meeji nè Yone ùvwa munkaci mwà kwela mbilà bùngì cyanààna dilòlò adi. Ùvwa nè cyà kwikala mumòneMù dìnà dyèndè, nudi numòna's. Nwamònu anyi?

Dìngà ditùkù, Nzambi wàkakàngula. . .

³⁶⁸ Elishà, ùvwa muyiishè. Wàkenza byònsò, nè—nè—nè wàkayiisha mwoyi kumushiikila. Wàkenza byònsò bìvwàyèkù mwà kwenza abi, kàdi nànsha nànu bwòbò bàvwà ànu bàdibàndisha, nè bàakamwamba mambàvi à mishindù yònsò, nè bàakamba nè: “Wèwè ewu's ke mwena bùyaaya ebu. Wèwè's udi mwena lubùkù. Wèwè ewu's ke mukèbi wa lutàtù lwònsò lùdi lùlwa elu. Udi mùpùile's ngwèwè,” nè bikwàbò byònsò byà nànu awu. Wàkamwamba mambàvi wònsò. Izàbèlè wàkakàna bwà kumukòsa mutù, nè bikwàbò byònsò. Aci's ncyà bushùwà. Bwònsò bàvwà bàmulwisha.

³⁶⁹ Ki dībà adi kwambayè nè: “Mukalenge, paanyimà pàà mèmè mumanè kwenza aci nànu, byònsò byÙvwa mungambile bwà kwenza! Ndi mushààle ànu menemene nè Dìyì Dyèbè. PaWàkangambila cintu kanà cyònsò, ncìvwa nè bwòwà nànsha. Ndi muyè tamàkàtamàkà too nè mwisù mwà mfùmù, nè bikwàbò byònsò, mèmè kubàmbila nè: ‘EMU MMÙDÌ MUKALENGÈ WÀMBA.’ Nè Wèwè kwèna mungambile cintu, nè mèmè ncyènakù mubàmbile cintu nànsha cimwè, cidi kaciyikù cyenzèke to. Kàdi patùdi twakulangana apa ki mèmè ewu,

umwèpelè udi mushààle, mu musumbà mujimà awu. Mémè ke umwèpelè udi mushààle, nè bàdi bàteeta bwà kunshebeya.”

³⁷⁰ Nzambì kwambaYè nè: “Nêngiikalè mwà kukàngula cìmwè cyà ku Bitampì bwà kukuleeja cintu kampànda.” Yéyè kwamba nè: “Udi mumanyè’s, Ndi nè nkàmà mwandamutekètè kuntu kwàka, bàdi kacya kabàyikù batwè cinù kumpàlà kwà... banjì kudilamika ku nànsha umwe wa ku twitabàayi ayi, ku màngumba awu to. Bàdikù nkàmà mwandamutekètè badilongölöle bwà Dyambwibwa, nwamònu’s.” Kaa! Kaa! Wàkambila mupròfetà Wendè, udiYè ùbuulwila Dìyì Dyèndè, nwamònu’s, ku Mifùndu. “Ndi nè mènà nkàmà mwandamutekètè àcìdì malongolola, à mu bàà mu lukòngò elu; nkàmà mwandamutekètè yà bwòbò abu. Kì mbatwilekù binù nànsha bùmwe bwà,” (bu nè mvwakù mufwànyine kucyàmba mu ditùkù edi) “malongolodi à ntèndeleeleu, nè bwòbò kì mbuujìibwe tètè nè twitabàayi nànsha, munda mwàbò amu.”

³⁷¹ Nudi bamòne cìndì njinga kwamba aci anyi? Dìbà adi, bikèngela ànu bìikalè nànkù. Bidi bikèngela ànu bìikalè nànkù. Nè mbilondèshìle Dìyì. Pààfikà muntu awu mu cyalu, neikalè mupròfetà. Ànu mùdìbi cyà bushùwà nè mémè ndi mwimàne mu cyambilu eci emu. Nwamònu anyi? Nè yéyè neàshaalè ànu nè Dìyì adi. Kàakushiilakù twitabàayi anyi cikwàbò cyònsò cyà muntu nànsha umwe kaaba to. Ncyà bushùwà. Neikalè mulùmyànà wa mùshindù wà muntu wa mwitu, mùvwà Elishà amu, yéyè... nè ànu mwàkalwà Yone amu. Yéyè—yéyè neàkinè bakàji, (balùmyànà wa yààyà!) bakàji bàà nsòmbelu wa masandi! Yoyóyò! Balùmyànà, yéyè’s neàbàbwelèlè nè mvità! Eliyà wàkacyènza, nè Yone pèndè wàkacyènza. Nwamònu anyi? Nwamònu anyi? Nè neikalè mululàme ànu mu njila wa Dìyì. Nè neikalè—neikale ùbèngangana nè malongolodi. Bulongolodi anyi? “Kanùdyèlèdì meeji bwà kudyàmbidila munda mwènù amu nè: ‘Tudi nè Abraham bu taatù’ nànsha, bwalu ndi ngàmba nè Nzambì ùdi nè bukolè bwà ku mabwe aa kujuudila Abraham bàna.” Nwamònu anyi? Mmucyènzè cyà bushùwà.

³⁷² Mpindyewu, ki bwalu mbwòbù abu’s, nwènù balundà bàanyi. Cìtampì Ciinâyì’s ke cyòcì eci, cikàngula. Nè babàndì bàà pa tùbalù tùnaayi abu mbabuulula, ku dyànyì pàanyì dimanya. Mpindyewu, ebi ke byònsò bìdì byènzèke pa buloba.

³⁷³ Cìtampì cyàlondà, mutùdì tumòna, mmu Dyulu, mùdì misùkà yìdì mwinshì mwà cyoshelu ayi amu.

³⁷⁴ Mpindyewu, ànu bwà kujikija, ndi muswè kwamba ndambù wa bintu ebi... ànu tuuméyì tukesè cyanàànà, kaaba aka mene, tùndì mufunde. Tutùdì batùpìke, pa Bitampì ebi, Bitampì binaayi byà kumpàla ebi.

³⁷⁵ Mpindyewu, mààlabà dilòlò, tudi—tudi tushintulula cyalu, kuumuka ku bintu bìdì byènzèkà pa buloba. Ùdi ùtàngila muulu

emu nè ùmòna misùùkà yìdi mwinshì mwà cyoshelu, cyoshelu cyà cilàmbùla.

Dilòòlò dyàlondà, dilumbulwisha dìdi dìdikùma.

³⁷⁶ Nè dilòòlò diináyì, anyì dilòòlò dyà ndekeelu, mu dyàlumingu dilòòlò, ncyèna mumanyè nè ncinyì to. Ncyèna mumanyè nè ncinyì cìdì bikwàbò ebi byùmvwija to. Nkààdikù ànu mubìbalè cyanààna, munùkaadi benzè amu. Kàdi: “Kwàkenzeka cinyàànyà munda mwà tusunsa makùmi àsàtù,” kàdi kùdi cintu kampànda cyàkenzekà. Ndi ntèkemena nè Yèyè neàCìbuululè. Ke cyènzàYe. Ndi mutwìshìibwe ne neÀcyènzà.

³⁷⁷ Byàkakèngela bwà twètù kuya, ku myaba mishìilèshìilàngàne yà Mifùndu, too nè ku Bwàkabuulwibwà 19, bwà kuleeja nè Dilwa dyà Kilistò ndyàshebeyà mufwilakanyi nè Kilistò. Ke bwà cinyì bìvwa bikèngela bwà mèmè kulekela ebi, kwangata ànu mvnsà yìbìdì ayi. Kukèngelabi bwà mèmè kuya ku bitùpà bishìilèshìilàngàne byà Mifùndu, bwà kujaadika bintu ebi. Pa nàнку ke bwà cinyì mvwa muyè ku Bwàkabuulwibwà 19, bwà kuleeja ndekeelu wa mufwilakanyi nè Kilistò nè, neciikalè dishebeyangana; dyà Kilistò, pààlwàYe, Yèyè neàshebeyè mufwilakanyi nè Kilistò.

³⁷⁸ Too nè ku Bwàkabuulwibwà 10, bwà kuleeja nè Mukenji wà mwanjèlò wa mwandamutekètè newiikalè muntu kampànda, mu matùkù à ndekeelu aa, mulaaba kùdi Nzambì bwà mudimu wà bwambi ànu mùdi naawù Eliyà mupròfetà amu, mùdìbi bidyànjlila kwamba mu Maalàki 4, bwà kubuulula Dìyì dilelèlè (dyà ku muji) dyà Nzambì mu lukòngo elu, Dìyì dyà ku muji dyà Nzambì mu lukòngo elu. Mwàkenzelàye Izàbèlè wa mubidi amu, ke mwenzelà kàbìdì muntu ewu Izàbèlè wa nyumà, èkèleeziyà yà cyena-màngumba eyi. Byàkakèngela bwà mèmè kuya ku nshapità wa 7. . . ku nshapità wa 10, mvnsà 1 too nè ku 7, bwà kujaadika nè civwa cyà bushùwà. Nè mu Maalàki, nè mu Amosà, nè bikwàbò, bwà kujaadika cyòci aci.

³⁷⁹ Eliyà ùvwa mmupròfetà wákamba cipròfetà nè kupiisha Izàbèlè, mu lukòngo alu sungasunga.

³⁸⁰ Nè Eliyà kààkafwàku to. Ncyà bushùwà nè kààkafwàku to. Wàkamwènèka cyàkàbìdì, bidimu bitwè ku nkàmà mwandamukùlù paanyimà, ku luseke lwà Yesù Kilistò, pa Mukùnà wà Dikudimuka dyà mpàla. Kí mmufwèku to.

³⁸¹ Mpindyewu, tudi tusangana nè bìdì bikèngela bwà Nyumà wendè àlaabè muntu kampànda, bilondèshile mulayì wà Nzambì, mu matùkù à ndekeelu; wàkalaya bwà kwenza cintu cìmwècìmwè aci mu Izàbèlè wa nyumà, mwàkenzekàbi mu Izàbèlè wa mubidi, mu cikondo cyà ndekeelu.

³⁸² Ki bwà cinyì ndi—ndi muyè ku myaba yàbùngì yà Bible, bwà kuciijaadika, bwà kakwikadi kwàlwa kushààla lukonko mu meeji ènù nànshà. Lwòlòkù, nwàngambilaayi. Èè, numfùndile mukànda anyì kabèjì kakesè.

383 Nè bidi bibwelakana ànu menemene, too nè ku nyama yìdì yìbutula mibidi yàbò yà cifùkìlu mu ditùkù dyà ndekeelu, bàyìdya bàyìmina mwàkenzàbo musangu awu amu.

384 Ku dyànyì pàànyì dibuulula, òwà Nzambì mumpèèshe nè didyànjlà kwamba nè cìvwa mwà kwenjiibwa adi, eci ke Bulelèlà bwà babàndi bànaayi bàà pa túbàlù abu, ku dyànyì pàànyì dimanya.

385 Nudikù pèènu nwela meeji kaayi bwà Yesù?

Ndi muMunangè, ndi muMunangè
Bwalu Yèyè wàkannanga kumpàla
Nè wàkampetela lupàndu
Pa mucì wà Kàlvaryò.

386 Mpindyewu vùlukàayi nè, kàyikù nè . . . (Ke cyòci aci; kuya ànu kumpàla; abi's mbìmpè.) Nciyikù nè njiyà mibì bwà bantu kampànda mu bulongolodi nànsha bùmwe to! Bwalu, Nzambì ùdi nè bàna mu ndongolwelu wa Kàtòlikè. Ùdi nè bàna mu ndongolwelu wa ba-Méthodistes. Ùdi nè bàna mu ndongolwelu wa ba-Baptistes. Mbanganyì bàà mu yòyi ayi, ndongolwelu yònsò mishiilèshiiàngàne ayi, yìdì mileejiiibwe mpàla kaaba aka dilòlò edi ayi, bàdi bapàtùkemù panwàkamònà Bukènkè? Twànjàayi kumònabi byanza byènu. Mpindyewu, vùlukàayi nè, kùdi bantu mwòmò amu ànu munùdì nwènu amu. Kàdi ndongolwelu ngudi ushebeyangana, nwamònu's. Ndekeelu wa byònsò nyumà mufwilakanyi nè Kìlistò ngudi ubàfikisha mu mùshindù wà kabàyi bàswa kutèèleja Bulelèlà to.

387 Nèku nudikù bavùlùke dilòlò adi, pàmvwà nkenketa ditwà dyà citampì apu anyi? Pàvwà muntu ùmvwa dibiiikila dyà cibilù cyà cyanga adi, kàdi ùbènga bwà kupàtuka kuya mudishikàmìne, bàvwa bàya nendè ku dikunji nè mulonda wùvwa wùmutwà cimanyinu ku dici. Ku dici nkùdì utèèlejila. "Nè diitabuuja didi difùma ku ditèèleja." Dìbà adi pàdiye ùCitàèleja, kàdi ùbènga bwà kwitaba budishikaminyi bwèndè, dìbà adi ùdi . . . ùdi nè cyà kukwàcila mfùmwendè wa cyena-màngumba awu mudimu matùkù èndè wònsò à mwoyi. Amen.

388 Kaa! Kaa, ekèlekèle! Yèyè kì mmulenga mulayà anyi?

Ndi muMunangè, ndi . . .

Twèlàayi ànu byanza byètù muulu cyanààna mpindyewu nè tùmukuukwilaayi.

Bwalu Yèyè wàkannanga kumpàla (Butùmbi's
wè!)
Nè wàkampetela lupàndu
Pa mucì wà Kàlvaryò.

389 Mpindyewu inyikaaku ànu mutù wèbè cyanààna, nè tùmukuukwilèku mpindyewu patùdì tuwìmbila mu matàma apa.

³⁹⁰ Mukalenge, mùshindù mwìnè wutùdi nè kusàkidila's wè! Tudi nè disànka bè, Mukalenge, nè musàngeelu be Bwèbè nè bwà cisàmbà Cyèbè. Éyì Mukalenge, Wèwè ngwàkatùpetela lupàndu ku Kàlvariyò. Tudi tuciitaba nè disànka dyònsò's, Mukalenge.

³⁹¹ Mpindyewu tùteetèkù, Mukalenge, ku Nyumà Webè. Nè kwòkò bubì kampànda munkaci mwètù, Mukalenge, bupidyà kanà bwònsò ku Dìyì, bantu kampànda mwab'ewu, Taatù, bàdi kabàyiku baswè kutwà *amen* ku mulayi wònsò wà Nzambì, swàkukù bwà Nyumà Mwímpè àpwekè mpindyewu, Mubàndi wa pa kábalù katòòke awu, pàcidi Nyumà Wendè, Nyumà wa Kilistò, kumpalà kwà mufwilakanyi nè Kilistò, nè ùbiikila Bèndè Sungasunga apa. Bàbiikilèku bwà bàpatukè, Mukalenge.

³⁹² Swàkukù bwà bànyingalalè mpindyewu, bàlwe lubilu kùdi Wèwè nè bùùjiibwè tètè nè Maanyi nè mvinyò; nè bàshintulukè bùùmukè ku mùzàbi wà cyena-màngumba wà lufù lwà Kaayinà awu, bàye ku mùzàbi mutòòke bu nèjè wà Mwoyi wà Cyendèlèèlè, mufidiibwe kùdi Mubàki awu. Nènku dībà adi dīngà ditùkù nebàye ku Didyà dyà Dibanjì, mu Dìyì dishindika dyà dibìshiihwa dyà ku lufù. Enzàku nàнку, Mukalenge. Kenkètàku myoyi, pàcidiku bantu baKwindile apa. Mu Dīnà dyà Yesù!

³⁹³ Mpindyewu, kenkètàku ànu mwoyi wèbè awu, wèwè mwanèètù wa balùme, wèwè mwanèètù wa bakàjì, wèwè mulundà wanyì. Ndi neenù kwénjì ntàntà mule. Bidimu mbyòbì ebi bitwè ku makùmi àsàtù nè bisàtù. Kacya nkààdikù munwàmbile cintu kampànda mu Dīnà dyà Mukalenge citù kaciyiku cyenzèke anyì? [Disangisha didi dyàmba nè: "To."—Muf.] Kèba Kilistò mpindyewu paucidiku nè mpungà apa. Bidi mwà kwenzeka àbidi àdi pànshì aa nè ùpangè mwà kucyènza. Nwamònu anyì? Bidi mwà kwenzeka nè, pa dībà kanà dyònsò, Yèyè àjuukè mu nkwasà wa dyakwilangana awu; dībà adi ùdi mufwànyine kudila mwadi nè mwoyi wèbè wònsò, udi mufwànyine kutuuta makàsà pànshì, udi mufwànyine kwakula mu myakulu, udi mufwànyine kunyeemakanangana ubànda upweka mu cibambalu emu, udi mufwànyine kwenza ní ncinyì ní ncinyì cyònsò cyùdiku ujinga kwenza aci, nè kuya kashààla wa mu èkèleeziyà nè èkèleeziyà yònsò wa pa buloba bujimà, kakùyì cintu nànsha cimwè, kakùciyì kàbidi bwanga butòòkeshi bwà mpèkaatù webè—webè nànsha. Dībà adi, ncinyì ciwènzà, udi penyì dībà adi?


³⁹⁴ Èè, mèmè ndi ngiitabuujà, nè mwoyi wànyì wònsò nè, nkwasà ùcidi ànu mukàngula. Mèmè ndi ngiitabuujà nè Yèyè ùcidi ànu pa Nkwasà wa butùmbi wa Nzambì. Kàdi àbidi aa Yèyè neikalè mwà kjuuka mpindyewu, nè kuseemena, bwà kunana bìdiYe mupikùle. Ùdi munkaci mwà kwenza mudimu wà Cilongo Cipikudi, pàcidi Luutà mwindile apa.

³⁹⁵ Kàdi àbidi aa, nudi bamanyè's, paanyimà pàà Boàzà mumanè

kwenza mudimu wà cilongo, dībà adi wàkalwa kunana bìvwà bu byèndè. Nè cyôci aci menemene ke cidi Bible mwambè nè ke cidiYe mwenzè: “Wàkaseemena nè kwangata Mukàndà awu.” Dībà adi dyakwilangana dyàjiki; Yèyè ùmùkù pa Nkwasa wa butùmbi; kakùcyèna kàbidi Mashi pa Nkwasa wa Ngàsà to. Nènkù dībà adi ncinyi aci? Nkwasa wa Cilumbulwidi.

³⁹⁶ Kwìtabikù bwà òmwè dyà ku matùkù aa, byàmbiibwè nè, “Pàànyì’s mvwa ngèèla meeji nè Dyambwibwa òvwa nè cyà kulwa.” Kàdi kuumvwa Dìyi dyàmba, paanyimà nè: “Dikaadi òmanè kupita.” Nzambì àkwambùlwishèku!

Mpindyewu twìnyikàayi mitù yètù.

³⁹⁷ Mwanèètù Neville, lwàku, bwà ditangalajangana anyi cyònsò cidi cikèngelà bwà wèwè kwenza aci. Nzambì àkubènèshè, too nè màalabà dilòòlò. [Mwanèètù Neville ùdi ùsambila—Ed.] 

63-0321 Cítampì Ciinâyì
Branham Tabernacle
Jeffersonville, Indiana États-Unis

CILUBA

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org